

**NATIONAL ASSEMBLY OF
SEYCHELLES**

Thursday 11th December 2025

The Assembly met at 9am

National Anthem

Moment of Reflection

Madam Speaker in the Chair

MADAM SPEAKER

Bon mon ava dir bonzour tou Manm Onorab. E tou dimoun ki pe swiv nou. E osi bann dimoun ki pe swiv nou *live*. Avan nou rebran nou azanda pou ozordi, mon ti a zis demann Lasanble pou permet mwan pou *issue* en *apology* pou sa konfizyon ki'n arive yer dan letan ki nou ti pe regard *Committee Stage*.

Koman *Head of the Institution*, mon osi i *share the responsibility* pou sa ki'n arive. *Unfortunately, that was not a satisfactory process*, ki *internally* nou bezwen fer li vin en bon pe pli annord ki sa. Nou fer sir ki tou keksoz i ganny fer byen.

E mon realize ki in afekte prosedir Lasanble, in afekte ki mannyer keksoz in deroule yer. E mon *issue* mon *apology* lo lapar ladministrasyon, lo lapar

sekretarya Lasanble Nasyonal. Nou ava aprezan *proceed* parey nou ti'n *discuss* yer. Mon a demann sekretarya pou fer *Vice-President* antre avan silvouple.

Bonzour Vis-Prezidan avek bonzour reprezantan sorti AGs Office. Parey nou ti'n yer ler nou'n ariv lo sa pwen kot avan nou fer *Third Reading pursuant to Order 76(2)*, nou vwar ki sa bann lamannman ki ti pe ganny propoze par *Attorney General* in aprezan ganny byen sirkile avek tou bann Manm.

E koman Speaker, *I am giving permission* ki nou pran sa bann *correction before Third Reading*. Me ki nou prezan pou bezwen se en Mosyon *for the recommitment of the Bill to the Committee Stage*, pou nou kapab agree lo sa bann *amendments*.

If I may have a Motion from the House to recommit the Bill?
Onorab Lemiel?

HON SYLVANNE LEMIEL

Mersi Madanm Speaker. Bonzour Madanm Speaker, tou mon bann koleg Manm Onorab. Tou dimoun a lekout. Madanm Speaker, mon pe demande ki Lasanble i rekonveni dan Komite pou ki nou kapab rebran sa *Bill* pou nou kapab fini avek ozordi. Mersi.

MADAM SPEAKER

Onorab Gill?

HON CHURCHILL GILL

Mersi Madanm Speaker.
Bonzour VP. Bonzour tou
dimoun. *Motion seconded.*
Thank you.

MADAM SPEAKER

Eski nou annan lagreman *of the House* pou nou *recommit the Bill to the Assembly*? *We have agreement* or nou bezwen pran en vot? *We have agreement. Alright.*

Savedir nou ava al prezan dan *Committee Stage, Sergeant-At-Arms*. Onorab Gill?

HON CHURCHILL GILL

Mersi Madanm Chair. Dapre lamannman ki'n ganny propoze par AG's Office, premye landrwa ki sipoze annan sanzman lo *Bill* se *Section 11 (1)*. E sa lalis i kler tou Manm in vwar ki kalite sanzman ki sipoze annan.

I zis en *matter* pou nou ti'n dakor ki tou sa bann sanzman i ganny agree pou li antre, dapre lord ki'n ganny *submit*.

MADAM CHAIR

Mersi. Eski nou annan okenn komanter? Onorab Georges.

HON BERNARD GEORGES

Bonzour Madanm. Bonzour Vis-Prezidan. Mr Hill, tou bann Manm koleg Onorab. E tou dimoun ki pe swiv. Yes, Madanm Chair, mon annan 2 pti komanter.

Enn vreman senp. Me lot, e mon pe fer li la par pou okenn rezon akòz *it is something* ki menm pwen ki mon'n *raise* dan sa *Bill* ki pe vini apre APDAR. E mon pa kapab pa mansyonn sa la, e mansyonn li taler akòz sansan mon ava ganny akize konmkwa mon pa'n fer mon travay.

Essentially, si nou regard *the proposed new clause 14*, sa se *termination of appointment*. Dan ka APDAR taler mon ava redir sa, nou napa okenn problemm avek sa bann kondisyon kot en lapwentman CEO, Deputy CEO i kapab ganny *terminate*.

Me i ti ava swetab, mon pa'n anmenn en lamannman alor mon pe zis mansyonn sa *for the purpose of the panel* - i ti ava'n swetab si sa bann kondisyon *or at least* "(a), (b) mon pe koz "14 (a), (b), (c) ek (e) me non pa (d) ti ava bann kondisyon *against the appointment in the first place* pa zis pou *termination*.

E nou'n vwar sa dan plizyer lezot *Bills* ki'n vin devan

nou dan leparse. Kot en dimoun ki'n *guilty of misconduct and discharge of insolvent or bankrupt, convicted of an offence or mentally or physically incapable pa ganny apwente in the first place.*

E (b) osi sa se si bann keksoz i vin pli tar, i ava en rezon pou zot ganny *terminated*. Mon pe zis mansyonn sa la parey mon dir aköz pou fer menm pwen taler dan sa menm lot *Bill*. Me napa en *amendment to the amendment to the amendment* devan nou.

However, avek ou permisyon Madanm Chair, mon ti a kontan propoz 2 *very simple amendments* tou lede i parey to the *amendment* ki devan nou. E sa se dan "13" ek dan "14". In the *chapeau* dan "13(1) *There shall be a Deputy Chief Executive Officer*".

E lo dezyenm laliny, on the *recommendations of the Board*. E parey dan 14(1) dan *chapeau* "the *President may on the recommendations of the Board*" - mon krwar sa i devret *recommendation in the singular*. Me non pa *recommendations*.

Annefe, nou vwar dan 11(1) ki the *word recommendation is in the singular*. Alor, mon pe *propose en amendment to the*

amendment to delete the letter "s" dan 13(1) ek dan 14. Mersi.

MADAM CHAIR

Mersi Onorab Georges. Eski nou annan okenn komanter *from the panel? Vice-President?*

VICE-PRESIDENT SEBASTIEN PILLAY

Mersi Madanm Chair. Nou napa okenn komanter mon krwar sa i zis en *typo*. Mersi.

MADAM CHAIR

Alright. Nou ava aprezan pran en vot, that part 4 avek the *new part 10 be part of this Bill*. Tou bann Manm ki aprouve? Mersi. Okenn Manm ki kont?

So, lo kestyon pou *that these 2 new parts be part of the Bill*. 18 Manm in vot *for*, avek 14 in *abstain*. Mon mazine ki prezan AG's Office i ava fer le nesaser pou *renumber the Bill accordingly* ki letan i ganny *published is properly renumbered*. Nou ava aprezan retourn dan *Assembly*.

Si mon kapab prezan ganny en *Motion for Third Reading*. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, anba seksyon 16 (1) nou *Standing Orders* mon ti a demande ki sa

Bill i ganny lir pou en Trwazyenm Fwa. Mersi.

MADAM SPEAKER

Mersi. Onorab Gill?

HON CHURCHILL GILL

Mersi Madanm Speaker. *Motion seconded.*

MADAM SPEAKER

Mersi. Onorab Lemiel, ou ti annan...

HON SYLVANNE LEMIEL

Madanm Speaker, ki sa *Bill i ganny lir as amended.*

MADAM SPEAKER

As amended, yes.

HON SYLVANNE LEMIEL

Mersi.

MADAM SPEAKER

Onorab Gill.

HON CHURCHILL GILL

Motion seconded, as amended.

MADAM SPEAKER

Alright, nou ava pran en vot on Third Reading of the Bill as amended. Tou bann Manm ki voted for. Mersi.

Okenn Manm ki kont. Mersi. *On the questions that the Bill be read for the Third time. 18 Manm in vot pour e 14 in*

abstain. Clerk si ou kapab fer the short title of the reading please.

MADAM CLERK

Mersi Madanm Speaker. *This Act may be cited as the Mental Health Care Agency Act, 2025. It shall come into operation on such date as the Minister may, by notice in the Gazette appoint.* Mersi Madanm Speaker.

MADAM SPEAKER

Mersi Clerk. Alors, *Bill Mental Health Care Agency Bill* in pase. Nou ava prezan bouz lo lot *Bill ki lo Order Paper which is Prevention of Drug Abuse and Rehabilitation Agency Bill, 2025.* Si nou kapab ganny en *Motion for Second Reading.* Onorab Lemiel.

HON SYLVANNE LEMIEL

Mersi Madanm Speaker. Madanm Speaker, mon pe demande ki sa *Bill i ganny lir pou en Dezyenm Fwa.* Mersi.

MADAM SPEAKER

Mersi. Onorab Gill.

HON CHURCHILL GILL

Motion seconded, Madanm Speaker.

MADAM SPEAKER

Avan mon donn Vis-Prezidan laparol pou li prezant *Bill*. Si nou bann *Members* i kapab silvouple *indicate* avek zot bann *leaders or Chief Whip* si zot anvi koz in *the general debate*, aköz vi ki mon war sa i enn ki ase enportan pou Lasanble, pou nou kapab *manage* nou letan silvouple. Mersi. Vis-Prezidan?

VICE-PRESIDENT SEBASTIEN PILLAY

Mersi Madanm Speaker. Bonzour Madanm Speaker. Bonzour *Leader* Lopozisyon. *Leader* Zafer Gouvernman, tou Manm Onorab e tou dimoun ki a lekout.

Madanm Speaker, i fer mwan en gran plezir pou prezant Lalwa pou Lazans Prevansyon Labi Drog e Reabilitasyon devan sa Lasanble. Premyerman, avan mon kontinyen Madanm Speaker, mon oule remerisi Lasanble Nasyonal pou travay ki nou'n kapab fer lo sa *Mental Health Care Agency Bill* ki nou'n fek pase.

E mon swete ki nou kapab annan menm lapros travay ki ava annan en deba otour sa enn provizyon legal ki Gouvernman pe met devan Lasanble Nasyonal. E ki form par enn bann *commitment* 100 zour ki Gouvernman Dokter Patrick

Herminie pe met devan Lepep Seselwa.

Premyerman Madanm Speaker, pou komanse mon ava etabli en pti pe konteks. Parey i pou leka dan bokou bann lazans ki nou pe enstitye, nou pou sey etabli rezon det aköz nou pe etabli sa bann lazans. E aköz nou pe plas zot dan bann landrwa kot nou pe plas zot dan en fason stratezik pou zot kapab delivre lo manda ki'n ganny mete anba zot Lalwa respektif.

Lazans Prevansyon pou Labi Drog ti deza egziste dan en lot laform ki ti apel *APDAR* oparavan e ki ti annan en striktir legal ki ti'n ganny etabli e ki ti annan travay konsiderab ki ti'n ganny fer atraver sa striktir legal pou etabli bann diferan divizyon, *unit* e met o fonksyon enkli bann diferan plan ki sa lazans ti pou annan pou sa letan.

Mon kapab an *full disclosure* Madanm Speaker, prezant ek Lasanble ki mwan menm mwan mon ti deza lo *Board APDAR*, ensi ki Onorab Georges, aköz sa letan mon ti pe reprezant lede kote latab dan Lasanble. E ki ler nou regard fonksyonman *APDAR* pandan sa letan, i ti annan en o nivo efikasite.

E ti'n etabli en plan kot nou ti pe regard pa zis dil avek prevansyon. Me osi sa size reabilitasyon ki enn bann size pli kontan sye. *However*, an apre eleksyon an 2020 e *subject to* bann *policy change* bann sanzman dan Polisi nouvo Gouvernman ki ti vini APDAR ti ganny frenmen koman en lazans.

E ti ganny entegre dan Minister Lasante anba divizyon pou Labi Sibstans ek Prevansyon e Reabilitasyon oubyen DSAPTR. Madanm Speaker, enn bann keksoz ki nou'n kapab idantifye atraver lanaliz e bann evalyasyon ki'n ganny fer se ki ler bokou sa bann lazans i ganny mete anba Minister Lasante i *overload* sistenm e servis e programm travay Minister Lasante.

E sa i fer ki li menm li Minister Lasante, ki devret pe fokaliz lo serten lezot *area* pa pe kapab petet delivre dan bann sikonstans ki neseler. E ki demann en pli o nivo lefikasite. Set alors ki apre analiz, evalyasyon ki'n ganny fer Prezidan Larepublik in prezant en programm kot APDAR pou ganny mete anba son lofis.

E ki i ava donn li bann resours neseler. Me pa zis ki sa en drive nasyonal neseler, ensi ki rod bann sipor bilateral e

miltilateral pou fer realiz sa programm pou nou kapab annan en vre programm reabilitasyon.

E la nou pe koz lo en Programm *Work Rehabilitation*. Nou bezwen fer fas avek lefe Madanm Speaker, ki malerezman bokou dimoun pe fer fas avek kek form labi sibstans. E la nou pa pe koz zis labi drog, me nou pe osi koz ek labi lalkol.

I annan bann lezot sibstans menm bann drog bann *pharmaceutical* ki ganny vann *over the counter* ki dimoun i kapab vin addicted avek. Sa i pe afekte nou sosyete, i pe donn nesans. In fini donn nesans e sa nesans sa zanf an fini grandi, bann fleo sosyal krim ki an rezilta labi sibstans.

Notwithstanding that, nou pe vwar osi ki i pe afekte fabrik moral nou lasosyete. Alors, Madanm Speaker, sa Lalwa i vin an liny avek prononsman Dr Patrick Herminie. E parey mon'n dir i en *commitment* dan nou manifesto pou sa premye 100 zour.

Madanm Speaker, i en loner pou mon prezant sa Lalwa akon mon santi ki poudir dan sa nouvo letap ki nou pe al ladan e lapros ki nou pe pran, sa lalwa pou ed nou realiz enn bann programm fondamantal ki nou

annan. E sa se ki nou kapab reform bann adikt. E fer ki nou annan en program rehabilitasyon e travay ki avamars ansanm.

Madanm Speaker, Prezidan li menm in personelman enplike dan diferan fason dan laspe sa domenn. E i annan en gran konesans dan sa domenn. E se atraver sa konesans ki son lekip otour li in kapab travay vitman kot i konstate ki bann lapros ki nou pou pran ki pli vize e pli efektiv dan sa domenn prevansyon ek tretman.

Sa Lalwa devan nou i pazis en lentrodiksyon APDAR, me i osi annan en lobzektif pli larz. Savedir, i pran reentrodiksyon APDAR, me osi regard lafason ki DSAPTR ti pe travay. E regard sa gap ki egziste ant le 2, e ki mannyer prezan nou kapab fer sir poudir nou *bridge* sa bann gaps.

Me pli enportan nou fer sa lazans vin pli efikas. Annou get en moman Madanm Speaker, en pe pli an detay DSAPTR ki an se moman ti pe fer sa travay. I konpri 7 Unit spesyalize ki enkli *administrative*, en Unit Prevansyon e Ledikasyon, en Unit Monitoring Evalyasyon e *Quality Assurance*, en *Harm Reduction Unit*, en Unit Tretman, en Unit Psikoloji, en

Unit Lentegrasyon Sosyal, en Unit pou *Inner Island* e *peer workers*.

Malerezman Madanm Speaker, malgre ki in annan tou sa zefor nou pa'n kapab realiz enn bann konponan pli enportan ki ti'n deza ganny etabli oparavan. Se sa sete servis sipor bilateral pou nou kapab fer realiz en Sant Rehabilitasyon Rezidansyel ki ava permet bann adikt pou zot kapab refer.

La mon bezwen dir Madanm Speaker, ki Onorab *Leader* Lopozisyon ozordi i familye avek sa program aköz nou ti asiz lo sa Board pou prezant sa plan. Tou sa bann *unit* e tou sa bann travayer zisteman parey anba *Mental Health Care*, zot pou vin bann travayer ki pou tonm anba Lazans APDAR ki ava annan son CEO, son program travay ki pou anba kontrol e sipervizyon en Sekreterdeta.

Enn bann keksoz ki nou bezwen realize Madanm Speaker, se enn bann rol enportan ki APDAR pou annan se pou redwir lenpak advers lo lasante. Lo bann konteks sosyal e lo konteks *socio-economic* bann konsekans asosye avek labi sibstans, trafik sibstans.

E pli enportan lafason ki sibstans pe afekte tou kous pli

enportan dan nou sosyete, e sa se nou bann zenn. Nou bezwen osi vwar ki mannyer *APDAR* pou fasilite tretman, servis e *planning* rediksyon an sa ki konsern servi drog ensi ki lalkol partikilyerman ki mannyer zot atak bann pli zenn dimoun.

Sa Lalwa ki mon pe prezante, i pa dekonekte ek Lalwa ki Lasanble in pase bomaten. I annan en koneksyon etrwat e direk ki pou ganny etabli atraver Lofis Prezidan. E se pou sa rezon ki dan Lofis Prezidan i annan en Sistenn Lyezon, ki pou permet sa bann lazans kominik avek kanmarad. E travay e menm asiz a kote kanmarad pandan lenstans ki zot pe travay.

Prezidan in etabli en konsepsyon dan son lofis, en *Chief of Staff* ki li son rol se pou reini sa bann diferan eleman. E ed sa bann lazans pou korpore ek kanmarad. *Notwithstanding that* Madanm Speaker, Gouvernman i annan en plan pli larz lo pwennvi *digitalization* ki fer ki Lofis Vis-Prezidan osi pou enterakte dan en pwennvi lo en pwennvi teknik lo fason ki nou pou siport bann program ki sa 2 lazans pe vin avek.

Pou nou fer sir ki nou enkorpor bann leman dan nou manifesto ki koz lo *AI driven solutions*, an sa ki konsern labi

sibstans e osi *Mental Health Care*. Madanm Speaker, en lot fonksyon enportan *APDAR* se ki pou azir koman en regilater kordinater lo bann lezot lazans, *NGOs* ki pe osi donn en koudmen lo sa travay prevansyon, tretman e rehabilitasyon.

I pou enportan pou note Madanm Speaker, ki sa travay pou anmenn rehabilitasyon i pa pou en travay Gouvernman tousel, me pou osi en travay ki pou enkorpor lentegrasyon, e *involvement* kominote an antye. Tou bann *MNA* ki la anndan, i realiz lenportans annan en striktir, akòz pou le moman si nou kontinyen regard zis sa problem dan le sans *provide* en servis kot nou pe donn *methadone* nou pa pou kapab *achieve* solisyon e rezilta ki nou oule gannnen.

Nou oule propoz serten lezot solisyon, akòz *the cost of providing methadone* i pou kontinyen ogmante *as and when* kantite adikt i osi kontinyen ogmante. Alors, nou bezwen vwar ki mannyer resous pei i ganny mete a dispozisyon pou dil avek sa bann problem i bezwen ganny zere dan en fason byen.

Nou osi fer sir ki lakantite resous ki nou mete i pa ogmante signifikan ki sa i

poz en *burden* finansyel. E ki dan le fitir i pa vin soutenab pou nou pei fer fas avek. Anba Seksyon 5(6) *APDAR* i annan en nouvo pouvwar. E sa pou li *issue* en *order* pou adres okenn problem, e fer li en lofans si okenn lazans ou dimoun pa swiv sa *order*.

Sa i neseler pou ki nou annan en *finality* pou *decision-making*. Nou konnen ki poudir pou annan serten keston ki pou ganny souleve otour sa seksyon. Me lesansyel se ki nou bezwen vwar ki mannyer nou *bold* pou nou pran serten desizyon, pou nou dil avek serten problem ki neseler ganny dil avek.

Finalman Madanm Speaker, nou tou nou konnen ki i annan devan nou dan sa labi kont sibstans. En kantite lavi ki'n perdi ouswa pe ganny afekte, en kantite larzan ki sa fleo labi sibstans pou kout Gouvernman par lannen dan Lasante. E redwir produktivite pei afekte nou lafors travayer. E byensir kou bann fleo sosyal e bann krim.

APDAR i zwe en pa enportan dan sa lager, me i pa sel solisyon lo li menm. Sa problem labi sibstans i konsern tou dimoun. E se pou sa rezon ki dan re lentegrasyon *APDAR* kot i ete, nou pe koz lo

en pli o nivo kordinasyon, pou ki i a kapab ganny sa lenstans pli enportan dan pei pou fasilite stratezi e sinerzi ki i annan ant bann diferan lezot lazans.

Madanm Speaker, i toultan en desizyon brav pou nou fer fas a lalit kont trafik drog. E nou bezwen asire ki dan sa lalit ki nou pe anmennen, tou bann akter kle pe zwe zot rol dan en fason transparan. E san ki i annan kolizyon ant *collusion* ant bann ki pe fer ki pe *tackle* sa trafik, e bann ki pe fer sa trafik.

Se pou sa rezon ki tou bann akter kle pou ganny mete ansanm dan en fason kler. Me pou osi asire ki i annan latransparans pou annan en *vetting* e *monitoring process*, pou fer sir ki napa a okenn moman okenn form koripsyon ki arive pou eseye pou derout travay ki Gouvernman pe komanse pou fer.

Madanm Speaker, en lot pwen enportan ler nou regard sityasyon nou pei ozordi ki nou bezwen fer fas avek. Se ki si nou *workforce* i kontinyen *deplete* parey i pe *deplete*, nou depandans lo etranze i pou kontinyen ogmante.

Nou pou bezwen vwar bann lezot mekaniz ki mannyer nou fer fas avek sa. E ki mannyer nou asire ki Sesel ki

kapab travay i dan en lanplwa i pe travay. I malere pou vwar Madanm Speaker, ki an deor bann laboutik, e sa i pa lafot okenn politisyen.

Ozordi en dimoun ki al laboutik preski ler i pe al antre dan en laboutik avan en dimoun i komans demann li en R25, en limonnad, oubyen en keksoz koumsa. I pa form par nou kiltir Seselwa. E i en keksoz ki nou bezwen sey eliminen. Byensir nou pa pou kapab elimin li de zour ou landmen. Me sa ki nou bezwen fer se fer en komansman. Sa ki mon prezant devan Lasanble i pa zis en komansman, i pa en kontinyasyon.

Me mon pe prezant zot avek en lapros, en lapros ki Lasanble an antye i devret *buy in*. E regard li dan lentere ki sa lapros pe anmennen pou nou pei. Nou pe propoz en reentegrasyon en lazans dan lenstans pli o dan pei pou li sa sipor nesaser, pou donn li sa *drive* nesaser. E pou *provide* en kordinasyon stratezik pou dil avek sa sityasyon an sa ki konsern labi sibstans. Pa zis sa an sa ki konsern trafik, me osi an sa ki konsern zenerasyon larzan sal atraver sa trafik.

Nou pou vwar dan bann zour, e dan bann semenn ki vini bann plizyer lanons ki

Gouvernman pou fer. E bann prononsman an sa ki konsern bann reentegrasyon oubyen si oule bann konsolidasyon bann lazans nasyonal ki fer fas avek trafik. Me osi an sa ki konsern dil avek bann size siko sosyal parey nou'n vwar avek *Mental Health Care Agency* pli boner.

Se avek sa Madanm Speaker, alors ki mon prezant sa Lalwa devan Lasanble. E mon swete ki Lasanble i ava kapab donn son laprouvasyon dan son antyerte pou nou kapab kontiny sa lager ki nou pe anmennen kont labi sibstans dan nou pei. Mersi Madanm Speaker.

MADAM SPEAKER

Mersi Vis-Prezidan. Se la kot deba zeneral lo *Bill* i ouver. *If I can get a short hands or indication of* tou bann dimoun ki anvi koz lo *Bill* silvouple? *Alright, ok. Ok*, mersi.

Zis en pti gidans pou Lasanble, pou nou kapab donn tou dimoun en sans pou kapab fer en lentervansyon. Mon pe propoze pou bann *Members*, zot ganny 10 minit pou zot fer zot lentervansyon. E pou bann *leaders* avek *Chief Whip* zot ganny zot 20 minit. Si Lasanble *is in agreement* avek sa? *Yes, yes. Alright*. Mon ava komans avek Onorab Lepathy.

HON NELSIA LEPATHY

Mersi Madanm Speaker. Bonzour Vis-Prezidan. Bonzour tou bann Manm Onorab. E tou bann dimoun a lekout. Madanm Speaker, i avek bokou lemosyon, bokou latristes. E osi avek bokou lespwar, e mon remersye ou pou donn mwan sa sans pou koz lo merit sa Lalwa ki'n vin devan nou ozordi bomaten.

Mon'n dir avek bokou latristes, akòz mon mazin bokou mon bann frer ek ser ki'n ganny afekte avek konsonmasyon drog. E ki nou konnen ki sa i en gro problem dan en kantite nou bann fanmir. Madanm Speaker, mwan koman en Seselwa e ki konnen par leksperyans personnel dan mon fanmir ki lefe drog lo lavi imen e dan lasosyete.

Mon pou donn mon sipor sa *Bill* pou reetablir e donn pouvwar en Lazans Nasyonal, ki pou fer kordinasyon prevansyon, tretman ek reabilitasyon pou bann dimoun ki pe servi drog dan Sesel. Apre 5an ki sa lazans in aboli, kestyon ki nou pe demande se. Kote nou ete ozordi? Eski sityasyon in amelyore?

Ozordi nou'n ganny sans ganny en pe lenformasyon

atraver Vis-Prezidan. E mon mazine ki atraver bann diferan lentervansyon ki nou pou tande ozordi, nou ava ganny plis lenformasyon pou vwar vremen kote nou ete. E rezon akòz vremen nou bezwen re-anmenn sa Lazans.

Madanm Speaker, danze avek drog se ki le moman ki ou tous li i parey i pe atrap ou e trangle ou e ou pa pou sape. E tre pe nou bann frer ek ser ki'n reisi sape malgre tou zefor e larzan ki pei in depanse. Ozordi Madanm Speaker, i annan en keksoz ki mon ti a kontan met devan.

Dan nou pei parey nou konnen, i annan serten keksoz ki nou annan en *consensus* lo la parey defen Mancham ti kontan dir. Kot lo nivo nasyonal nou tou bann akter nou bezwen tonm dakor lo kwa ki fodre nou fer. Akòz si nou pa tonm dakor, nou pou toultan annan divizyon. E nou pou toultan pe vwar nou pe kre bann deba ki pa neser. E nou pei pa pou zanmen al devan. Mon ava donn en legzanp.

An zeneral dan nou pei ozordi, nou aksepte ki konsonmasyon lalkol dan en fason modere i kiltirelman ganny aksepte. E mon krwar pa si i annan en deba lo la. E mazorite Seselwa e nou menm i

kapab isi dan lasal, nou konsonm lakol me dan en fason ki modere.

Me parkont konsonmasyon lezot sibstans parey drog i annan divizyon dan lopinyon. En legzanp tipik ki toultan nou'n tande in annan bokou lopinyon lo konsonmasyon kanabis. Madanm Speaker, nou tou nou konn fleo drog, nou'n eksperyanse aköz sa fleo in tap en bon pe nou bann laport. Ki swa nou vwazen, nou fanmir, e dan nou kominote.

I annan ki'n vwar nou bann ansyen koleg ki nou'n leköl avek ki lavi in ganny detri, ouswa ki'n perdi lavi byen zenn. E i menm annan ki nou pa rekonnet zot letan nou vwar zot. Sa i aköz zot lo sa labi sibstans. E sa i kler ki i ras leker letan nou vwar tousala.

Mon distrik Grand Anse Mahe i pa'n ganny eparnye dan sa fleo drog. Atraver konversasyon ki mwan mon'n annan avek zenn dan mon distrik, rezon ki zot deside al servi drog i varye. I annan ki blanm mankman fason pou zot detann zot lekor, e zot lespri dan lakominote.

I annan ki fer fas avek bann probleman dan relasyon, e ki pa konnen ki mannyer pou fer fas avek e alor zot servi drog.

I annan ki'n goute, me pli tar zot war zot in adikt avek lalis i vremen long. Me mwan koman en zenn, mon leker i fermal Madanm Speaker, pou war zenn ki kapab travay e kontribye dan lekonami nou pei tonm dan tel fleo.

Me ki nou fer? Eski nou kit zot parey zot ete? Non. Nou bezwen rod fason pou reabilit zot. Madanm Speaker, pa zis bann ki lo drog ki ganny afekte. E la nou mazin bann fanmir ki soufer avek enn zot bann manm fanmir oubyen en pros ki lo drog.

Kot tou keksoz dan lakaz i ganny vole, pa kapab kit naryen ater. Kot zot manz tou manze dan lakaz. Ki nou fer? Eski nou les sa bann fanmir kontinyen soufer? Non. Dan lakominote Madanm Speaker, nou annan bokou lezot dimoun osi ki ganny afekte avek sa fleo.

I vremen fer lapenn e dezapwentan kan en fanmir ki'n travay dir pou kapab anbelir, e annan tou sa ki zot annan dan zot lakour. E apre nou vwar en zenn li ki li i santi li malad, aköz i bezwen tir son malad parey zot dir me ki napa larzan pou aste. I deside kas lakaz, vyol *privacy* sa lakour e pran tou sa ki dapre li aprezan i apel pou li.

Dan mon distrik, menm 2 semenn pase mon'n annan en msye ki'n travay dir dan son plantasyon pou kapab plant en pti pe plis ki 50 zannannan. E ki'n arive? Koman zannannan in pare, i ganny vole tou. E ki nou vwar sa zenn ki'n vole, i pran i al vann pou li kapab ganny drog.

Ki nou fer? eski nou kontinyen les sa koumsa menm? Larepons i non. Byensir bokou i dir nou anmas zot, sirtou bann ki pep ganny vole e nou met zot dan prizon. Wi nou kapab fer li, me eski problem i rezourd? E larepons ankor enn fwa i pou non.

Nou bezwen rod fason pou nou kapab rezourd sa bann problem lo lonterm. E vwala Madanm Speaker, kot sa *Bill* ki'n vin devan nou bomaten i kapab ede pou rezourd sa problem. Wi, i pa pou rezourd lenportasyon drog ilegal. Me i ava kapab ede bann ki'n ganny afekte.

Ozordi Madanm Speaker, nou bezwen felisit nou Gouvernman ki ankor enn fwa i pe reponn a en promes ki i ti fer pou eleksyon. E i kler dan manifesto ki nou bezwen re etabli sa lazan sa ki pou kapab anmenn en lalit kont konsonmasyon drog danzere.

In ler ki dan nou pei nou vin pli serye lo sa size. Nou pa kapab an menm tan ki nou pe dir nou pe anmenn en lalit kont drog. Me an menm tan nou war bann ki annan en gran rol pou zwe dan propagasyon sa bann sibstans pe marse libreman dan semen. E pe viv lavi koman bann milyonner.

E nou vwar zot pe pran avyon konmsi zot pe pran bis pou al Takamaka. E la mon oule felisit aksyon nou Prezidan e nou Gouvernman, letan in dir ki etabli en Polisi *search and destroy*. Sa i byen Madanm Speaker, aköz nou tou nou konnen ki ler drog i ganny anmenn ater ki arive avek.

Nou war pe ganny vann lo semen. E nou tou nou konnen par sa ki nou'n ganny dir oubyen eksperyanse lekel ki fer sa bann tel aksyon. Me sa parey nou konnen i en realite Sesel. E nou war ki rol sa lorganizasyon pou annan. Madanm Speaker, wi mon konnen ki pou nou annan en Sant Reabilitasyon e mon kontan bomaten tann Vis-Prezidan dir ki zot pou fer li vin en *work rehabilitation*.

E mon osi mon krwar ki nou osi servi bann zil elwanye ki nou annan isi Sesel koman en landrwa ki kapab tir nou bann zenn kot zot ava ganny re etabli, kot zot ava travay an

menm tan ki zot pe pran tretman. I kler ozordi ki menm si bann zenn pe pran tretman, e retourn dan kominote bokou zot i retourn *back to square one*. I pa fasil pou sa bann zenn.

Parey mon'n dir pli boner, drog koman ou servi li pou premye fwa i tyonbo ou, i trangle ou, e i pa oule larg ou. Bokou zenn dan mon distrik, in menm eksprim zot volonte pou ki pandan ki zot pe pran sa tretman, zot ganny retire dan lakominote. E zot al re etabli zot lo en zil. Kot zot a kapab lwen avek sa sibstans.

Madanm Speaker, nou bezwen investir pou nou kapab sov nou lazenes. E re entrodwir sa lazans, i pa pou en retour dan lepase. Me i pou en striktir pli entelizan, e pli responsab ki nou Gouvernman in deside pou etabli.

Alors, mwan Madanm Speaker, mon pou donn mon sipor pou sa *Bill*. Mersi Madanm Speaker.

(APPLAUSE)

MADAM SPEAKER

Mersi. Onorab Roucou.

HON MICHEL ROUCOU

Bonzour Madanm Speaker. Bonzour Vis-Prezidan ansanm avek Mr Hill kot *AG's Office*.

Bonzour bann paran dan lakour ki pe ekout nou. Madanm Speaker, mon parfetman dakor avek Onorab Lepathy lo son lentervansyon ki in fer. E laplipar bann keksoz ki in dir ladan, mon osi mon pou partaz en pti pe bann pwen ek pwennvi lo kote *APDAR* li menm li ek sityasyon drog fan laplipar nou bann distrik espesyalman dan mon distrik.

Madanm Speaker, parey nou konnen poudir se ki ozordi lakoz plis problem dan bann fanmir se drog li menm li. E nou'n war poudir dan lepase plizyer bann ki'n la avan nou, e bann Gouvernman ki'n la oparavan tou dimoun in sey son mye dan en fason ou en lot pou zot kapab dil avek sa problem ki apel drog li menm li.

Akoz ki mon dir sa? Gouvernman ki'n sorti la, in war li dan en lot fason. Petet in war li en pti pe pli byen ki pou met li anba Minister Lasante, aköz laplipar son bann resours ki *APDAR* ti pe servi definitivman i ti ganny li atraver Minister Lasante.

E sanmenm sa mon mazine ki Gouvernman lepase in war le nesese ki dan plas petet pou pa depans plis larzan, an term lo kote lenfrastriktir e lezot ankor. E bouz li anba Minister Lasante koumsa petet

i ti kapab ganny anmennen dan en fason en pti pe pli meyer.

Me sa pa vedir poudir APDAR lepase pa ti pe fer travay ki ase nob. Nou'n war bann travay ki'n ganny fer plizyer fwa, zot in vin devan nou Lasanble pou eksplik en pti pe bann *challenge* ki zot pe rankontre. E osi bann travay ki zot pe mazin pou zot fer.

E kwa ki mon panse poudir ozordi ki APDAR pou vini pou fer pli meyer ki bann travay ki'n ganny fer o paravan. E osi fodre pa ki nou oubliye poudir dan sa travay ki pe ganny fer fodre pa ki i annan lipokrizi. Akoz souvandfwa ki nou war Madanm Speaker? Ler Gouvernman pe fer son bout, paran li i ris en lot bor.

E mwan mon panse poudir sa i en travay ki pa zis depan lo Gouvernman li menm li. I en travay ki depan lo lakominote, e tou dimoun dan sa landrwa kot petet nou war poudir en zanzan li menm li pe komans antre dan en move semen. Mazorite nou bann dimoun ozordi pe reste dan bann gran *housing estate* dan bann blok flat li menm li. Dan bann landrwa kot bann lakaz i la, bann groupman fanmir dan bann kominote.

E ler nou remarke ki nou, nou fer? ki travay ki nou, nou

fer? me zis pa bokou letan la Madanm Speaker, mon pe al *attend* en seremoni la kot i annan en group marmay ki fer *best performance* ki zot pe al ganny zot rekonpans. Me ki travay ki kapab ganny fer pou nou anpese, akoz APDAR i dir ou *prevention*. E ki bann prevansyon ki nou kapab anmennen?

Lot fwa ler mon pe koz avek en msye Seselwa ki'n viv bokou letan lanmerik i dir mwan poudir i annan bann serten letan kot bann zofisye ki dil avek bann zafer drog, sibstans li menm li i al dan bann lekol i e eksplik avek bann etidyan ki arive ki si demen ou antre dan sa langazman ki annan pou fer avek drog. Kwa ki kapab arive demen si ou war ou pe angaz ou dan drog.

Eski Sesel nou pe anmennen koumsa, nou pe ale dan bann lekol pou nou annan bann ledikasyon avek bann zenn? Eski nou ale boner pou nou anpese ki demen zenn. Kontrer ki nou war dan lamazorite nou bann lekol souvandfwa? Nou war poudir atraver bann leksperyans ki mon'n tann bann *teacher* pe dir, bann *testimony*.

Seki nou war poudir bann lekol ozordi i en landrwa kot laplipar bann droger ennler zot

ale, atraver bann *fence* pou zot kapab aste nou bann zanfan. E mwan mon krwar ki poudir i annan en travay la lo kote *APDAR* li menm li. I annan en travay ki bezwen ganny fer ansanm avek Minister Ledikasyon.

E osi travay avek bann departman parey *PMC*. Ki bann travay ki devret ganny fer dan bann kominote espesyalman kot i annan en ta bann *housing estate* dan pei? E ozordi bokou paran li menm li, zot pe kriy lasasen akòz zot war zot pe ganny afekte.

E parey Onorab Lepathy in dir oparavan. Nouvo Gouvernman i dir son stratezi se ki *search and destroy*. Eski vreman ler ou pe destroy ki laprev ki nou annan ki sa drog vreman pe ganny detri? Avan ti annan en leokri ler i ganny atrape ou tann dimoun pe kriye deor, be oli laprev.

Menm ler ki nou ti war *SBC* i vini, apre ki tou bann prosedir in ganny fer atraver lakour i montre ou poudir lala tan kilo pe ganny brile. Eski nou annan? Madanm Speaker, fodre nou pa bliye drog i vin atraver lanmer li. E ler sa bann Dav i antre dan nou lanmer ki arive?

Nou bann pov frer ki mont dan milye losean laba ki al

serse. E zour nou detrir li dan milye losean, nou'n war bato pe brile. Eski nou dir poudir vreman sa drog pe ganny brile? Sa i en kestyon ki nou bezwen demann nou lekor. Eski tou pe ganny brile ler pe koule? Kote ki annan laprev? Napa.

E mwan mon krwar ki poudir nou bezwen anmenn en travay ki vreman nou montre nou pep poudir i annan en travay ki pe ganny fer pou anpese. Gouvernman avan i montre li ki poudir travay in ganny fer ale pou lager ek bann dav. Nou war ki poudir ti annan en gran koupir nou bann frer ti aret ganny anvoye pou al garanti deor pou drog.

E nou bezwen kontinyen sa travay la pou anpese poudir sa zenerasyon ki vin apre la, zot pa war zot kot pe kontinyen ganny afekte. Zot pa pe tonm dan sa bann sibstans Madanm Speaker. Akòz mon panse ki poudir avek lapros ki *APDAR* i devret fer. En fwa mon ti anmenn en kestyon dan Lasanble ler *APDAR* ti vini.

Mon demann zot si zot annan en statistik lo kote ki kantite bann zenn ki'n perdi lavi akòz *overdose APDAR* ti dir mwan poudir zot napa. Ti dir zot napa en statistik en travay ki zot in fer pou zot konnen. Dan mon distrik, detrwa nou'n

war bann zenn i ganny anmase lo *ghetto* apre ki zot in *overdose*, zot perdi zot lavi. E paran ki soufer.

Mwan souvandfwa mon'n temwayaz, mon'n la avek sa bann paran ler zot pe anter enn zot pros. E mwan mon krwar ki nou bezwen kontinyen sa travay. Nou bezwen kontinyen sa lager kont drog. E parey Onorab Lephy in dir se ki i annan bann ki pe vin milyonner lo la. mazorite nou la anndan Madanm Speaker, nou en paran nou.

E nou tou demen nou anvi war nou zanzan poudir ler i sorti son lekòl i ganny li en plas travay. I form son fanmir ki i pa pe war li pe tonm dan bann keksoz ki vreman parey drog, lalkol li menm li. E ki demen zot kapab prodwir, zot kapab zot osi travay vini kontribye dan pei.

E ozordi nou war en bon pe pousantaz nou lafors travayer i dan drog, ki i malere. Me selman i annan en lager ki bezwen kontinyen kont drog. E mon pe swete poudir avek APDAR ki la, mon pa ekspekte ki mon poudir zot pou fer pli mye.

Me selman nou kontinyen sa travay. E nou pa zis vin en lazans, zot pa ava vin zis en lazans ki zis la pou donn

methadone. E i annan en travay ki a bezwen ganny fer dan kominote ozordi, dan bann lekòl pou ede pou fer sa travay ki nou ava anpese poudir sa zenerasyon demen ki a vin apre nou.

Ki nou a kapab kontinyen ranplas bann landrwa kot i annan *vacancy* pou ki demen nou koup en pti pe lo kote bann etranze ki annan bann plas ki nou Seselwa i kapab pran. Ki ozordi mazorite fwa Madanm Speaker, ennler ou pas dan bann *ghetto* ou war bann dimoun ki ti annan bann bon pozisyon. Ou war barber, ou war bann dimoun ki ti travay dan labank, ou war drayver bis.

Diferan, nonmen ou. Si ou al dan *ghetto* laba ou pou war. E souvandfwa ki ou zwenn se ki ler en dimoun pe rod en dimoun pou li travay, i bezwen anmenn zot al pran zot sibstans avan akòz sansan sa dimoun son loubraz pa pou marse.

E mwan mon panse ki poudir, mon ava ekout Vis-Prezidan ki lapros i pran akòz yer mon ti tous lo detrwa pwen lo sa *Bill* avan. Mon ti demann ek VP enn de bann keksoz me selman malgreman apre dan plas donn nou en pti pe sa bann lenformasyon ki pa mwan ki ti demande, bann dimoun ki ti dan sa domenn ki ti dir mwan

“be Onorab, sey demande ki kantite letan ki sa lazans pou pran pou vin an plas”.

“Ki bann keksoz ki nou bann travayer. Akoz VP i dir pou dir ki zot in koz ek enn de bann dimoun. Me selman i annan bann travayer par anba ki zot, zot ti pe mazine. Me ler mon’n demann VP, VP in pli vomye dan son larepons al dan en fason politik dan plas donn en pti pe sa leklersisman.

Mon swete ki poudir la avek bann lentervansyon ki pou vini, mon mazine la nou kapab ganny en pti pe plis lenformasyon atraver VP. E zis parey mon war poudir se ki sa lazans pou tonm direktman anba Lofis Prezidan. I pou vin en SS par anba li, apre pou vin son CEO, son Board. E petet si sa lazans li menm li dan plas ti annan en SS, petet si zot ti kapab sa CEO i reponn direktman avek Prezidan li menm li dan plas i met en SS. Sa Prezidan li menm li ti ava vin *Chairman* sa Board.

Petet i ti pou en pti pe pli bon dan plas nou ti a pran sa larzan ki ti pou donn en SS, nou ti ava kapab investir dan sa lazans li menm li pou ed nou bann zenn. Madanm Speaker, parey mon’n dir pou mwan terminen se ki mon pe ekout bann lezot deba, mon pe ekout

larepons VP apre si i pou al en pti parey yer in fer pou nou kapab gete si nou pou donn nou sipor lo sa *Bill* li menm li. Mersi.

MADAM SPEAKER

Mersi. Onorab Grandcourt.

HON ALVIN GRANDCOURT

Mersi Madanm Speaker. Bonzour Madanm Speaker. Bonzour Vis-Prezidan ek ou panel. Bonzour tou Manm Onorab. Avan mon komanse mon ti a kontan pas mon senser kondoleans lafanmir Jessie avek Esparon Grand Anse Praslin.

E mon swete, mon priye ki zot ganny sa kouraz pou kapab pas dan sa letan ki zot pe eksperyanse la. Bon, ozordi koman Manm elekte pou Grand Anse Praslin mon fyer pou eksprim mon sipor san kondisyon pou *Bill* limero 25, *Prevention of Drug Abuse and Rehabilitation Agency Bill*.

Sa Lalwa pa zis en zouti, i en deklarasyon valer ki lavi sak Seselwa i annan. E ki reperkisyon i en priyorite nasyonal. Annou rapel kot nou ti sorti. plizyer lannen pase APDAR ti ganny kree akoz Sesel ti pe fer fas avek en kriz ki nou ankor pe fer fas avek. Fanmir pe ganny kase, kominote

destabilize, e lavi zenn perdi dan adiksyon.

APDAR, pa ti parfe, me i ti reprezant en langazman nasyonal pou konbat sa maladi. Avek lorganizasyon ek konpasyon, apre sa ti annan en sanzman. Anba ladministrasyon presedan, APDAR ti ganny demonte. Son fonksyon ti ganny abzorbe dan Minister Lasante, anba preteks pou fer en lekonomi e rann servis pli senp.

Nou ti ganny dir ki sa pou fer keksoz pli efikas. Me ki'n arive? Fragmantasyon, resours ki ti vin rar bann pasyan ki ti reste vilnerab menm ti annan opozisyon wi, nou rapel ki dimoun i kapab al *cold turkey*. Sa ti pa zis en rabasman mal konseye. Sa ti danzere.

Adiksyon i en maladi, pa en febles moral. I bezwen lasyans, lorganizasyon e swen kontinyel konpare avek sa ki nou ti pe war. Naba Prezidan Patrick Herminie ki ti diriz APDAR dan lepase, nou pe reetablir sa ki nou'n perdi e amelyor li. Sa *Bill* ki laprev nou determinasyon. Akoz sa *Bill* i enportan?

Sa *Bill* i etablir en lorganizasyon dedye avek lotorite legal ek responsabilite. I pou kordin prevansyon, tretman, *harm reduction* ek

reabilitasyon dan tou Sesel develop en *National Drug Masterplan* ek *National Alcohol Policy*. Met standar nasyonal o tretman ek Sant Reabilitasyon.

Egziz en rapor trimestrel avek bann lenstitisyon ki ganny finansman. Fer respekte Lalwa avek pouvwar pou donn lord korektif e met ansanm, e met lanmann ziska R50mil pou move pratik. Sa pa birokrasi. Sa i gouvrenans avek lentere byen plase e avek leker.

Bann Manm Onorab, annou pa bliye ki nou pe koz lo la. Sa bann dimoun se pasyan, nou zanfann, manman, papa, ser, frer, zot manm nou zoli frazil sosyete. Zot merit respe, imilite e egalite. Dan Grand Anse Praslin, mon'n war pasyan ganny deplase dan landrwa izole lwen avek zot kominote pou ganny zot medikaman.

Zot pe ganny lenkonvenyans pou ganny medikaman, sa pa zis. I fer zot santi zot koman bann rezete. E sa se pa sa Sesel ki nou, nou krwar ladan. Atraver ou Madanm Speaker, mon fer lapel avek Vis-Prezidan annou revwar sa bann laranzman e anmenn servis esansyel pli pre avek zot. Annou desantraliz konpasyon.

Mazinen en papa ki anvi rekipere, me i bezwen mars

plizyer kilomet tou le zour pou son medikaman. En manman ki napa larzan pou pey bis. En zenn ki santi li abandonnen akòz sosyete i met li a lekar. Sa dimoun pa en statistik, sa bann dimoun i vivan. E ler nou fail zot nou *fail* nou menm.

Madanm Speaker, listwar ti annan en letan kot ladministrasyon LDS ti aboli Lalwa tar. I abzorbe son fonksyon dan Minister Lasante. Nou ti ganny dir ki sa pou fer lekonome e rann servis pli senp. Nou tou nou rapel sa diskour. I ti ignore lasyans, dinyite e kou imen.

Sa semenn Swen Lorganizasyon e Responsabilite sa *Bill* i prouve nou langazman pou sak Seselwa san regard kouler, revizyon, sosyal ouswa krwayans politik. I annan ki kapab dir sa lorganizasyon i biokrasi, oubyen gaspiy larzan kontribye. Mwan mon dir non, sa i en lenvestisman dan lavi. Sa i gouvènan baze lo fe aktyel. Se koumsa ki nou redwir krim, maladi ek dezespwar.

E nou inifye fanmir, *harm reduction* i marse, reabilitasyon i marse e san okenn lafreder dinyite i touzour ganny remet dan lavi Seselwa. Sa lorganizasyon pa pou travay tousel, i pou fer partenarya

avek Servis Lasante pou swen entegre, ledikasyon pou anpes adiksyon avan i komanse.

Lapolis pou konbat krim. Lorganizasyon kominoter pou donn sipor ek ransennyman. Sa i en lapros nasyonal, parski ledikasyon pa zis en adiksyon i pa zis en kekyon lasante. I en kekyon sosyal, ekonomik ek moral. Madanm Speaker, nou pa kapab mezir grander en nasyon zis par son *GDP*.

Nou bezwen mezir li par fason ki nou tret bann ki'n tonbe, e fason ki nou ed zot relev ankor. Pou tou pasyan ki pe ekoute, nou war zot, zot pa bann rezete. Zot Seselwa e zot lavi i presye. Zot merit swen pre kot zot san laont avek sipor profesyonnel ek tretman kontinyel pou sak manman, papa, ser ek frer mon dir gard lespwar led pe vini.

Pa zis dan parol, me dan lorganizasyon, standar ek servis ki marse. Annou pas *Bill* 25 e konstri en lorganizasyon ki met konpasyon an pratik. Met bann dernyen desizyon, e met dinyite o sant nou rekipasyon. Koman en nasyon se koumsa Sesel pou viktorye. Ler nou lev sak Seselwa. Mon *humblement* siport *Bill* limero 25 avek Lasanble. Mersi Madanm Speaker.

(APPLAUSE)

MADAM SPEAKER

Mersi. Onorab Georges.

HON BERNARD GEORGES

Mersi Madanm Speaker.
Bonzour Madanm Speaker.
Bonzour Vis-Prezidan e tou
dimoun ki pe ekout nou.

Madanm Speaker, sa *Bill* ki devan nou ozordi i anmenn bokou refleksyon. E mon kontan ton ki Vis-Prezidan in pran dan son lapros bomaten.

E mon ti a swete ki sa ton i ganny mentenir atraver sa deba. Mon prekoniz en pe glisman e mon remersye ou pour donn mwan letan pou koz en pe boner pou sey evit annan tro kozri partizan e *ownership* en problem ki appartenir a nou tou.

Nou tou nou fer fas, parey nou ti fer fas yer avek problem lasante mantal. Nou tou nou fer fas avek bann problem drog dan nou bann distrik respektif.

E i en keksoz ki nou devret regard avek en gran lanpler, san ki nou retourn dan bann deba partizan. Mon konnen i difisil. E drog i en size ki anmenn en serten degre - malerezman, en serten degre *partisanship*. I en serten degre montre ledwa.

Nou nou'n fer pli byen ki zot. Zot, zot pa'n fer osi byen ki nou. Nou, nou annan meyer lide ki zot. Sa konpetisyon i byen e i nesaser dan en demokrasi. Me i annan serten size lo lekel mon krwar nou devret kapab met politik apar e regard egzakteman kisisa ki pou bon pour nou pei. E sa size ki devan nou i enn sa size.

I regretab, e mon dir sa byen boner. I regretab ki sa ki nou'n vwar atraver sa 2 diferan Gouvernman se 2 diferan fason vwar solisyon pour en menm problem.

Sa i normal. Sa i nesaser. Diferan ladministrasyon ou pou war diferan fason pou *tackle* en problem. E napa enn ki pou pli bon ki en lot tan ki tou lede i annan menm bi. E menm bi se *tackle* en problem ki'n vin plis ki en problem. Me ki'n vin en fleo.

E mon kapab menm dir in vin en fleo egzistansyel aköz lakantite dimoun ki pe viv anba lenfliyans drog ek lalkol. Annou pa bliye.

E dan APDAR ler nou ti lo *Board APDAR* nou ti toultan fer sa lanfaz. Toultan nou mazin drog e nou bliy lalkol. Alor ki lalkol i probableman en pli gro problem isi Sesel ki drog.

I pa *obvious*, me i en problem enorm. Nou tou – nou

tou ler nou mont kot nou dan pti 11er edmi, minwi nou war laboutik i ouver e nou demann ek nou lekor, eski dimoun pe aste zonnyon avek lantir 11er edmi diswar?

Non. Zot pe aste e i annan en sel komodite ki zot pe aste. E annefe enn bann keksoz ki dan nou lepok lo *APDAR* nou ti lalit kont se *advertise* lalkol ki deor sak laboutik ou war zis *advert* pour *Seybrew*, *Takamaka*, *Jameson*, eksetera. Eski se en direksyon ki nou anvi kontinyen al ladan?

Alor, anmezir ki nou pe koz lo labi drog, labi drog, labi drog. Annou pa bliye ki labi lalkol i osi grav. Si non, pli grav. E nou bezwen konman en nasyon *tackle* tou lede sa problem, si nou anvi devlope.

E mon bezwen dir *right at the beginning* ki nou pa kapab dir, e mwan mon pa pou vin dir la ozordi ki fason fer anba *APDAR* ti pli bon ki fason fer anba son sikseser ki son akronim toultan mon bliye aköz i pa osi – ki mannyer i apele?

**DSADR (DSAPTR)*. Zot konpran sa ki mon pe dir? Zot konpran sa ki mon pe dir? *APDAR* i fasil, i sorti vit. Me lot i pa osi fasil. E taler ler nou al dan *Committee Stage* mon pou koz en pe lo la. Aköz enn bann keksoz ki mon pe propoze set en

sanzman non sa lazans ki devan nou. Me sa i ava pour pli tar.

I pa – nou napa drwa, mon konman sitwayen Sesel e konman lezislater dan Lasanble pou *dis* en fason fer an faver en lot, ou vis versa.

Mon krwar sa ki nou merit fer se *join* ansanm e regarde ki mannyer nou kapab travay ansanm pou anmenn en meyer Sesel e anmenn en meyer konba kont drog avek lalkol.

E se pour sa rezon ki mon'n felisit – mon ti pe al apel li *Leader* Lopozisyon. Mon'n felisit Vis-Prezidan Pillay pour ton ki in pran bomaten, ki i tre diferan avek ton ki in fini avek yer, parey zot ava realize.

Annefe Vis-Prezidan, atraver ou Madanm Speaker, ou'n gravir en nouvo lepa. Ou en *statesman* ozordi. Ou pa en *street fighter*. Ou ti en *street fighter* ler ou ti asiz dan sa sez, me ozordi i bon ki ou pran en ton pli apropiye avek ou manda. Wi. nou, nou lager nou. Nou, nou ankor dan Lasanble Nasyonal. Ou ou'n ariv en lot landrwa.

E mon dir sa – mon dir sa Madanm Speaker, pou sey edik en pti pe deba ki nou pou fer ozordi dan sa Lasanble.

Onorab Vis-Prezidan in fer nou rapel ki li ek mwan nou ti

asiz lo *Board APDAR*. Annefe, mwan mon ti annan privelez pou vin *Vice-Chair APDAR*.

Akoz mon ti'n koz e li i ti'n koz, nou tou lede nou ti'n koz tre for dan deba lo drog dan 6enm Lasanble, ki'n amenn sa refleksyon e ki'n anmenn *APDAR* ki'n fer li vin an egzistans.

E nou tou lede nou ti dir nou ti a kontan form parti sa lazans. E nou'n travay pandan letan ki sa lazans in egziste pou sey anmenn en rekour lo en problemn nasyonal.

Mon pa oule montre ledwa. Mon'n dir ki mon pa pou fer li, me mon bezwen dir ki kantmenm in annan gran sikse, e annou rekonnet ki in annan gran sikse pandan lepok *APDAR*, nou pa kapab dir ki sa sikse pa'n kontinyen pandan lepok apre ki *APDAR* ti fermen an 2020 e ki'n ganny ranplase par sa lot lenstitisyon ki son non mon pa rapel.

Nou napa drwa fer sa aköz nou napa drwa koz kont en kontinite. Ladministrasyon i vini. Ladministrasyon i ale. Me i annan en keksoz ki fodre nou siporte e sa se ki i annan kontinite dan lafason ou fer keksoz. Pou annan diferan mekanizm, wi. Me nou bezwen annan en serten kontinite.

E se la kot mon war en problemn avek sa *Bill* ki'n vin devan nou ozordi. Tou dimoun i dakor. Nou tou nou dakor ki i annan 3 fason pou *tackle* problemn drog avek lalkol.

Enn se *supply reduction*. Enn se *demand reduction*. Enn se *harm reduction*. *Supply reduction* i en problemn lapolis, e lapolis ki bezwen al *tackle* drog avek lalkol ki pe antre dan pei.

Demand reduction set en problemn ledikasyon. Nou bezwen edik nou pep pou konsonm mwens lalkol e pa konsonm drog ditou. E sa i en travay a *longue haleine* ki pou pran plizyer zenerasyon. Nou pa pou kapab fer li ni dan Gouvernman presedan. Ni dan sa Gouvernman ki nou ladan.

Harm reduction se kot *APDAR* i antre. *APDAR* in antre pou redwir, pou konsolid sa lespri ki drog i en *sickness*. I en problemn lasante, e nou bezwen *tackle* li konman en problemn lasante.

E se enn bann sikse *APDAR* ek sa ki'n swiv apre li ki'n anmenn sa *methadone*, sa *Low Threshold Methadone Program*. Nou pa'n kapab ariv lo en *High Threshold Methadone Program*.

Vis-Prezidan bomaten pa'n promet – e mon konpran

akoz i pa'n promet aköz sa i en defi. En defi. Pou annan en *High Threshold Methadone Program*. Setadir ki sak dimoun ki pran son *methadone* i ganny swiv par en *counsellor*. I ganny enkorpor dan en landrwa travay dan en fason ki a en serten zour i pou sorti lo sa program *methadone*.

Nou pa ankor ariv – nou pa ankor ariv la. E mon ti ava enterese pou – mon ti avan enterese bomaten pou Vis-Prezidan donn nou bokou plis detay lo ki mannyer sa lazans pou anmenn nou a sa solisyon ki nou anvi.

Zis pou vin dir nou ki pou annan en program reabilitasyon, pou annan en meyer pwennvi lo sa size drog, i pa sifizan. Nou bezwen bokou plis – bokou plis detay.

Nou bezwen konnen ki sa lazans pou fer ki pou diferan. Ki mannyer sa ki ti arive avan pa ti sifizan e ki sa lazans prezan li i pou anmenn bokou plis sikse. Sa mon krwar i enportan.

Changing for the sake of change i pa en solisyon. E enn bann problem ki mon war Madanm Speaker, e ki mon'n vwar depi yer, se ki sa ki nou pe fer, annefe se nou pe zis sanz en keksoz aköz se Gouvernman LDS ki'n fer li. Si se sa rezon,

we're going about it the wrong way e nou pou *fail*.

Sel keksoz ki mon vwar – e se sa ki fer mwan per avek sa program 11 zour, se sak eleman dan sa program 100 zour se *forward to the past*. Retourn kot nou ti ete an Oktob 2020 e efas sa ki'n arive depi 2020 ziska 2025.

E mon dir sa aköz i en preokipasyon. Tou sa ki nou'n vwar. Retourn trezyenm mwan parey zot in dir, malgre ki i pa retourn trezyenm mwan.

La prezan, retourn APDAR. Nou pou retourn kot nou ti ete avan, i pa en solisyon. Solisyon i bezwen en keksoz ki bokou, bokou pli performan.

E Vis-Prezidan in sey eksplik nou bomaten lo ki mannyer APDAR pou bokou pli performan. Ki mannyer en lazans i pli performan ki en departman Gouvernman i pa'n konvenk mwan yer anba *Mental Health Bill*. E i pa ankor konvenk mwan la ozordi.

Mon ti a kontan krwar ki sa ki nou pe fer avek en lazans se pa zis *jobs for the boys*. Sa ki nou pe fer se pa zis kree bann striktir pour nou kapab *reward* bann dimoun ki'n siport *US*.

E mon anvi ki Vis-Prezidan i konvenk mwan ki sa ki nou pe fer se pa zis en *legacy* oubyen en *vanity project* pour

Prezidan Herminie. Ki sa sete son pti baba, alor i anvi sa i retourn avek li ankò. *Convince* mwan ki sa se pa leka.

E mon ava dir zot akòz mon krwar Madanm Speaker, ki i annan en defayans dan lafason ki sa striktir pe ganny met an plas.

Mon aplodi. Mon aplodi desizyon pou met *APDAR* anba Prezidan. *Excellent decision*. Akòz se li ki annan konpetans e se li ki konnen ki mannyer sa lazans i devret travay. Malerezman, i pou lwen avek travay ki sa lazans pou fer.

E mon'n regarde la bomaten. Regard striktir. Nou pou annan Prezidan. Anba li pou annan en *chief of staff* ki pou kordin tou bann keksoz. Anba sa pou annan en *Secretary of State*. Anba sa pou annan en *Board*. Anba sa *Board* pou annan en *CEO*. Apre ki ou pou ariv kot travayer ki pe – ki lo *frontline*. *Structure is top heavy* Madanm Speaker.

Mwan mon ti a kontan vwar Prezidan vin *Chairman* sa lazans. Sa mon ti a dir *ok*, dakor. La li i pou annan en ledwa lo sa lazans toulezour. Akòz i annan konpetans. Akòz in travay ladan. E akòz i annan en vizyon pour nou pei. Me i pa. I annan 5 striktir ant li avek fonksyonman travay sa

lazans. E i annan en presedan pour ki Prezidan i kapab pran *chairmanship* en lenstitisyon ki enportan dan pei.

Sa sete *SMB*. *SMB* akòz a sa lepok i ti enportan pour Gouvernman sa lepok pran *Marketing Board* anba son lanmen, *Chairman* ti Prezidan Rene e i ti annan en memiz lo travay ki sa lazans pe fer.

Mon ti a kontan vwar menm zafer avek Prezidan Herminie ki vin direktèman lye avek sa *Board* e ki i napa 5 kousen ant li avek travayer. Donk, sa set en – sa set en defayans.

Mon anvi ki Vis-Prezidan i *convince* mwan ki sa Gouvernman ki Vis-Prezidan ladan i annan en vizyon. E i pa zis *backward looking*. I pa zis pe regard an ayè e pe zis ranplas sa ki ti la an 2020 e sa ki'n ganny sanze ant 2020 avek 2025.

Parey Prezidan Ramkalawan ki ti annan en vizyon pour lavenir. I ti ganny pini par son vizyon. I ti dir Sesel pour tou son zanfan. Sa set en vizyon vize ver lavenir. Sa ki nou vwar la set en vizyon vize ver leparse. *Let's go back to where we were* akòz nou ti konfortab dan sa striktir ki nou ti annan.

Alor, mon lapel avek Vis-Prezidan se dan sa striktir *APDAR, let's seize the future*. Annou pa retourn *to the past*.

Annou redefinir latak ki nou pou fer lo drog avek lalkol. Annou met lalkol ansanm avek drog dan en striktir egal. Annou pa zis *focus* lo re fer sa ki nou ti fer 5an pase e oubliy sa ki'n arive antretan.

Akoz si nou pe fer sa, nou pe dir avek sa bann dimoun ki'n travay, ki'n travay dir anba sa striktir anba sa dernyen 5an ki nou pa satisfè avek zot travay.

That would be the wrong message. Zot in travay. Zot in devoue. Zot in donn tou zot kouraz. E la sel keksoz nou pe vini, nou pe dir zot *not good enough*. Nou pe ranplas zot avek en lazans aköz nou, nou pli konnen. Sa se pa en mesaz ki nou anvi al anvoye.

Madanm Speaker, mon konnen ou pe al dir mwan ki mon letan swa in fini, swa i pe al fini. Alor les mwan konklir dan sa fason.

Personn pa kont annan en striktir ki pou *tackle* drog avek lalkol. Nou'n totalman an faver annan sa striktir. Me ankò enn fwa, nou - lo mon kote e personnelman mwan mon pa vwar en nesessite pou sanz en keksoz ki pe marse.

Vis-Prezidan i ava eksplik nou taler, mon espere. Me mon pa vwar aköz ki fodre nou retourn anba en lazans ler nou annan en striktir ki pe perform.

Sa ki mon ti a swete vwar se ki Prezidan i pran kontrol sa striktir li menm e ki i annan en *say* direk lo lafason ki striktir pou marse.

Dan sa fason, i ava kapab donn resours mende avek *the political will* pou fer arive sa ki i anvi arive. I pa bezwen en lazans pou fer sa. I sertenman pa bezwen en striktir kot i annan 5 dimoun ant li avek travayer.

Avek sa detwa mo Madanm Speaker, mon remersye ou pour sa lokazyon ki ou'n donn mwan pou koze.

E mon demann ou lendilzans pou ankò en segonn pour nou zis dir avek Onorab *Chief Whip LDS*, Onorab Sandy Arissol ki pa la ozordi, ki nou pe mazin li ozordi aköz i pe anter son boper. Mersi bokou Madanm Chair.

(APPLAUSE)

MADAM SPEAKER

Mersi Onorab Georges. Onorab Claudette Louise.

HON CLAUDETTE LOUISE

Mersi Madanm Speaker. Bonzour Madanm Speaker, tou bann koleg Onorab, Vis-Prezidan. E osi tou bann dimoun a lekout. Espesyalman bann dimoun Plaisance.

Bill devan nou se pou etabli en lazans konman en pwen fokal, en striktir sipor dan en fason konpreansiv e enkliziv pou kordin aktivite ki angaze ver prevansyon labi drog. E son tretman i osi reabilitasyon bann dimoun ki annan sa ladiksyon.

Mon distrik pa'n ganny eparnye avek sa sityasyon ladiksyon ki vreman alarman e sagrinan vwar ban zenn ki'n deroute. E an rezilta sa, i osi kree bann problem domestik. Zot a dakor avek mwan ki sa i en size ki devret konsern tou dimoun.

Konman en ansyen Administrater Distrik mon'n vwar bokou. Mon'n annan bokou enteraksyon avek sa bann group targete. Mon'n partisip dan bann sesyon lo fason pou entervenir avek sa bann group. E mon'n osi ed zot. Parey zot dir; “donn en pti *something*” dan bomaten pour zot kapab tir zot malad. Akoz, ou pran lapenn pour zot.

Bokou sa bann dimoun se zot osi ki ed nou atraver bann pti travay zournen kot lakour. Sa bann adikt se bann Seselwa.

Zot apartyen a en fanmir e a en distrik.

Bokou i entelizan e bokou i ankor pe perform byen. I annan ki dan bann bon pozisyon. Malgre i annan ki'n tonbe e pa enterese avek zot lasante. Kote e ki mannyer sa in antre dan nou kiltir? Me nou pa kapab ferm lizye lo la.

I annan ki zot lanvironnman otour zot pa pe ede pour zot sorti totalman dan sa ladiksyon. I annan ki pa dan lanplwa. Fanmir i kase, eksetera.

Bokou pa'n demande pour zot dan sa sityasyon, me bann faktor otour zot in pous zot al rod rekour pour tir presyon, ou depresyon.

APDAR ti vin an egzistans an 2017. In fer bokou progre. Menm avek bokou defi e kritik. Bann sif e rezilta i koz pour li menm. E mon salye tou bann ki'n kontribye dan partaz konesans e bon pratik, e travay pou ed bann adikt. In annan bokou ledikasyon, bann program *awareness* lo sa size a diferan nivo. Lentervansyon. *Testimony*.

Be i demann plis volonte lo bann depandan pou redwir ou menm aret depan – e sipor psikososyal pour bann ki pa'n zanmen servi drog. Sa i pa en solisyon. I pa en opsyon.

En kantite linisyativ prevansyon in ganny met devan pou selebre Lazournen Enternasyonal Kont Labi e Trafik Drog. E sa ki tonm le 26 Zen.

Larzan in ganny depanse lo kote tretman *methadone*, e sa i kout lekonomi pei bokou. Me in osi sov bokou lavi nou bann frer ek ser.

Malerezman, lazans ti ganny fermen pou vin en divizyon anba Minister Lasante. E sa ti bokou anba sa portfolyo ki pa'n anmenn bokou regar lo sa kote.

Sa bann bon travay ki ti'n konmanse in deklinen. Defayans ti evidan aköz manke resours, ouswa lezot defi. Tou dimoun i konnen kote bann *hotspots* i ete, me lentervansyon pa'n toultan leka.

In annan bokou travay kordinen ant bann droger zot menm. Par egzanp dan mon rezyon i kapab sorti Les Mamelles, i desann Plaisance, i al tonm dan Corgat. E vis versa. *Ok.*

Bann droger i vann zot drog dan kler. Drog i ganny sezi e i disparet. Drog i dan bann lenstitisyon lekòl. Nouvo lenvansyon kalite drog bann melanz toksik ki zonm ek fanm pe pike dan tou zot parti lekor.

Droger i toultan en pa devan sa ki sipoze pe vin entersepte drog, kot la zot bloke konmsi naryen pa'n arive. Sa ki ganny anmase i ganny large aköz mank levidans. E sa i zis enn de ki mon'n koz lo la.

Lekspektasyon Madanm Speaker. Mon kontan tande ki pou annan en lenfrastruktir pour leberzman bann adikt pou *detox*. E sa i pou vin konman en proteksyon pour bann manm fanmir.

Sirtou bann vyeyar ki viv dan lafreyer aköz zot per, zot ganny bate. Bann bokou lagresyon. E menm par ler i annan ki kasyet zot pers ki menm bliye apre kot zot in mete, zis pour zot bann fanmir pros pa kapab ganny akse avek.

E bokou fwa, bann lannen travay ki zot in depanse pou aste zot byen i ganny vole pou vann pour naryen. E bann zanfan osi i ganny servi konman transportater.

Lekspektasyon se ki, tretman wi i bon, me nou pe demande osi ki petet posibilite konsider met servis aksesib dan bann Sant Lasante rezyonal pour servis *methadone*.

Nou pe demande osi ki bann kondannen drog i ganny met separeman avek bann lezot kondannasyon.

Atraver Prezidan Herminie e ki sa lazans pou tonm direkteman anba son portfolyo, i pou re afirm son komitman e kapasite pou aport son soutyen ver en size tre enportan.

Sa *Bill* i permet sekirite e anmenn lespwar pour bann fanmir. San lafreder vol, lagresyon e lezot form labi. E sov sa bann nouvo zenerasyon.

Mon demande ki Lepep i *trust* Gouvernman *US* pou vin re aziste bann program ki bon e benefisye nou tou. Me non pa zis en bann. E avek sa, mon pou aport mon sipor Madanm Speaker a sa *Bill* e mersi bokou.

MADAM SPEAKER

Mersi. Mersi Onorab Louise. Nou ava prezan pran en *break* ziska 11er.

(BREAK)

MADAM SPEAKER

Bon, nou ava rebran deba lo *Bill*. Onorab Henrie?

HON GERVAIS HENRIE

Mersi Madanm Speaker. Mon ava dir bonzour tou dimoun ki a lekout Lasanble Nasyonal ozordi.

Sa Prozedlwa ki devan Lasanble Nasyonal ozordi pe fer selman en keksoz. En keksoz, i pe met zesyon prevansyon kont

labi sibstans e reabilitasyon bann adikt anba en striktir administratif ki zot pe apel li en lazans. I en larou ki pe ganny re envante.

Fodre nou pa bliye ki bann lesey avek zefor pou anmenn en kanpanny prevansyon e osi reabilitasyon pa'n zanmen arete Sesel depi ki in ganny entansifye atraver legzistans *APDAR*, e pli tar, *DSAPTR* an 2017, zanmen in arete.

E menm avan *APDAR* an 2017, ti annan lezot program parey *Detox Center* Mont Royale, *Drug and Alcohol Council*, *Dove Rehabilitation Program*, *Drug Demand Reduction Unit*, atraver 3 Minister. Lasante, *Home, Affairs* avek *Zafer Sosyal*.

Mon profite pou dir mersi tou bann profesyonnel e volonter Seselwa ki'n enplike dan tou sa bann zefor ziska ozordi. Savedir sa ki nou pe senpleman fer ozordi i egzakteman parey nou'n fer yer.

Pran zesyon en servis. Ozordi i drog e bomaten i ti lasante mantal. 2 servis ki Sesel konman en Leta ti pe deza ofer atraver Minister Lasante. Nou pe met zot anba 2 lazans separe ki dedye pou zer zot dan en fason konpreansiv anba 2 striktir endepandan avek Minister Lasante.

E rezondet nouvo ladministrasyon i se ki sa 2 size ki annan en lyen pre i ava ganny zere pli byen. Akoz dezormen i pou annan plis resours, mendev e finansyel. Lenfrastriktir e fasilite. E osi volonte politik, nou swete.

Sa Lalwa i 98poursan parey sa enn ki ti ganny aprouve an Out 2017. Apre i ti ganny *repeal* an Oktob 2021. Be program pou retir bann *addict* lo sibstans pa'n zanmen arete.

An realite, ant 2018 ziska sa lannen, Leta Sesel in depans en sonm R326.5milyon atraver Bidze anyel lo Program Prevansyon avek Reabilitasyon atraver APDAR. E la konmela, DSAPTR. Ki R326.5milyon i reprezante Madanm Speaker?

Avek sa sonm, Sesel ti'n kapab ganny li 544. 544 sa *mid-range condo* 2 lasanm ki apel *Coastal Breeze* ki lakonpannyen *Vijay Construction* fek fer a en sonm R600mil enn.

Avek sa sonm, Sesel ti'n kapab ganny li 435 sa *mid-range condo* 3 lasanm ki lakonpannyen *Vijay Construction* fek fer a en sonm R750mil. Sa sif i reprezant Bidze *State House* pour 5an. Bidze Lasanble Nasyonal pour 5an. E Bidze Zidisyer pour 3an, baze lo zot alokasyon bidzeter

pour lannen 2025. Larzan ki nou napa.

Me larzan ki nou merit pe depanse lo keksoz ki pli enportan e pli irzan pour nou pep. Sonm larzan ki mon'n mansyonnen in fasil retire dan dokiman Bidze depi 2018 ziska 2025.

Me i osi annan larzan ki pa fasil vwar, ki toudmenm pe ganny depanse par lannen dan lalit kont drog pour bann antite swivan;

Lafors Defans pour loperasyon lo lanmer e patrol dan lezer atraver *Coast Guard* e *Air Wing*.

Lapolis pour bann loperasyon dan kominote.

Zidisyer avek Biro Atorni Zeneral pour bann Prose Legal.

Servis Prizon pour byennet bann prizonnyen avek bann detenir lo rimann pour lofans drog.

Servis Ladwann pour sirvey e protez nou lafrontyer kont lenportasyon drog.

E Servis Lasante pou donn tretman, swen avek latizann bann ki annan en maladi koze par ladiksyon ouswa kek konplikasyon relye avek labi sibstans.

I fasil alor met en sonm konservater ki nou pe depans pa mwens ki R100milyon par lannen zis pou esey zer

sityasyon drog dan nou pti pei e anpes li vin en problemn anta ki a difisil pour nou rezourd apre.

Madanm Speaker, eskiz mwan *but I'm not over the moon* la ki APDAR pe fer son re laparasyon, nou problemn drog dan Sesel pe al rezourd enn fwa pour tou.

E koman Manm Lasanble, se sa ki nou pe merit poz kekyon swivan, Ki pou son efikasite a lavenir baze lo son rikord lepase?

Letan ki sa lazans ti kree inisyalman 8an pase, dan son premye konferans lapres, premye Sekreterdeta ki ozordi i Prezidan ti dir ki i pe donn son lekor 3an pou met an plas en sistenm avek tou bann eleman nesaser pou rezourd nou problemn drog. Ki'n arive depi sa?

I ti dir i pe vin avek en *Seychellois Multidisciplinary and Multidimensional Vertical Program*. Bann gro, gro mo sa. Me ki'n arive depi sa?

Prezidan Faure dan son Ladres SONA an 2017 i ti dir latas ki i pe donn SS Herminie sete pou lager kont drog lo 2 fron. Trafik e osi konsonmasyon. *Supply and demand*.

Me ki nou'n vwar dan son manda ant Oktob 2016 ziska Novanm 2020 lannen apre

lannen ki APDAR in vin isi devan Lasanble pou defann zot Bidze? Zot defi zanmen in sanze. Me in reste parey anyelman.

Mank mendev spesyalize. Zot pa pe kapab donn tretman spesifik, parey *addiction counselling*. Zot pa kapab kordin avek bann partener relevan.

Birokrasi dan servis piblik i retar e anpes zot donn servis pli vit. Zot pa kapab idantifye bann drog ki an sirkilasyon lo marse domestik, stigmatizasyon zot kliyan.

Retisans piblik e ostilite vizavi zot bann program parey lesanz sereng avek distribisyon *methadone*. Mank sipor e korperasyon anplwaye vizavi reabilitasyon bann adikt dan zot landrwa travay.

Dan sa menm letan, SS Herminie ti pe kontinyen voyaz atraver lemonn pou swadizan etidye meyer model pou adopte e adapte isi, depi Lendonezi, Langleter, Lespanny, eksetera, eksetera.

Detanzaot i ti travers dan medya pou donn en *update* lo progre avek reisit APDAR. E zot konnen ki i ti avoue ki an 2011 ti annan 1200 adikt Sesel. Ki an 2017 sa sif ti'n ogmante par 400poursan.

Si nou *fast forward* dan kanpanny eleksyon sa lannen, in dir sa sif in ariv 10mil. La semenn pase dan *Bills Committee*, Vis-Prezidan in dir nou estimasyon i aprezan 14mil adikt dan nou pti Sesel.

APDAR ki nou pe re kree ozordi, ansanm avek son bann kolaborater parey *CARE* in promet nou bokou. Menm tro bokou dan lepase e zot pa'n delivre.

Sif pibliye an Zilyet 2023 ti montre ki Sesel ti premye parmi 8 lezot pei Sid Saara pour konsonmasyon lalkol 45.5poursan. Konsonmasyon *Marijuana* 6.6poursan. E *amphetamine* 1.7poursan ki dir bokou lo reisit APDAR e son bann partener.

Nou mazine ki an Fevriye 2017 Dr Herminie ti dir ki lapros ledikasyon kont drog ki i ti pe al antreprann ti pou anmenn lefe avek kanpanny. Menm lefe avek kanpanny kont lavyann torti. Kot en zanzan i kapab raport son paran avek lapolis si i vwar li pe kwi torti. *That's how effective he promised his campaign will be.*

Pourtan, dapre rezilta en *survey* resan ki'n fer isi, 10poursan zenn aze ant 15 a 24an i konsonm lalkol. E 15poursan bann ka ki ganny admet dan Lopital Sesel i relye

avek labi lalkol. Alor ki mannyer legzistans APDAR in ed nou?

Evidaman nou annan en problem. En problem labi sibstans ki swa drog oubyen lalkol. APDAR depi avan 2020 parey *clause* 4 son Lalwa i presize ti'n merit dir nou ki lakoz nou problem.

Me an Mars 2019 dan en entervi avek *Zournal Today*, Dr Herminie ti dir rezon fondamantal sa lepidemi drog isi i aköz sistenm lesklavaz, ki nou ankor dan deloryonm nou pase kolonyal. Ou kapab krwar?

Rezilta en *survey* ki zournal, sa zournal ti fer parmi 700 – plito 575 son *followers* lo son paz *Facebook* pou etabli konbyen zot ki dakor avek deklarasyon Dr Herminie. 94poursan *readers* ouswa *followers Today in Seychelles* ti dir non, zot pa dakor avek sa lopinyon. Mwens ki 1an pli tar an Fevriye 2020, i sanz son *tune* e dir avek *Seychelles News Agency* ki, e mon *quote*; “*the root cause of Seychelles drug epidemic, we are still working on it*”. “*We are still working on it*”.

Madanm Speaker, yer dan Lasanble Nasyonal nou'n ganny dir ki nou enn bann pep pli entelizan dan lemonn. Mon pe sit Vis-Prezidan la.

Mwan mon regard sa zafer lentelizans Lepep Seselwa en lot fason. Depi 1977, nou'n annan demokratizasyon ledikasyon isi. Anba sa sistenm, nou tou nou'n ganny menm sans pou al lekòl e aprann lir, konte avek ekri. Sa 3 keksoz ansanm i dwatet ed nou reflesir.

Ansanm avek kado ki Bondye in donn nou, ki laliberte, responsabilite e volonte, nou tou nou dan en pozisyon pou pran bann desizyon ki nou kapab zistifye e defann.

Drog i en sibstans. En sibstans ki nou met dan nou lekòl. Nou konsonm li. Drog i en prodwi. I en keksoz ki nou aste. Drog i ilegal. Setadir ou pa ganny drwa servi li.

Akoz alor ki 93mil nou frer avek ser Seselwa ozordi pa pe servi *Eroin, Cocaine, Ecstasy, LSD* parmi tou lezot kalite drog ankor ki pe sirkile Sesel. Ki pousantaz nou parmi sa 93mil Seselwa ki nou granpye ti lesklav?

Madanm Speaker, mwan mon en *antidrug advocate*. Mon pa dakor avek dimoun ki finans lenportasyon drog. Mon pa dakor avek dimoun ki vann drog. E mon pa dakor avek dimoun ki abiz drog. Mon pa dakor avek trafik, avek konsonmasyon drog.

Akoz ler bann trafiker zot, zot pe fer rises lo lamizer nou frer e ser, ler bann adikt pe ganny zot *high* e pe *kick*, mwan ansanm avek lezot *taxpayers*, nou pe travay konsyansyezman parey Lartik 40 nou Konstitisyon i demann nou e nou pe ed Leta Sesel ranmas sa R326.5milyon pou zer sa probleman ki zot in met an ta avek nou?

Ziska ki tan nou pou les zot dray nou? Kan ki nou pou debout koman en kominote e pei e dir "*enough is enough*"? E se la Madanm Speaker, kot mon pa enpresyonnen avek lapros nouvo ladministrasyon ver lalit kont drog.

Dr Herminie depi ki in pret serman konman Prezidan in annan 2 lokazyon pou etal son plan vizavi lalit kont drog avek Lepep Seselwa. E partikilyerman nou isi konman bann *MNA's*, zour son sermantasyon lo Stad Linite e atraver son premye diskour isi anndan.

Gouvernman i annan li en devwar moral pou devwal son plan pour nou konnen ki mannyer nou pou ede e asiste li an term aprouv Bidze, pas son bann Lalwa e fer *oversight*. E ede avek ledikasyon dan kominote. La ler nou pe koze, son plan pa kler.

Pour mwan lalit kont drog i annan 3 konponan. Premyerman, *enforcement*. Kot bann Lafors Sekirite tel ki larme, lapolis, Zidisyer, *Custom*, prizon, partener etranze, lotorite finansyel, eksetera ki enplike. Enkli Biro Atorni Zeneral osi. Sa Onorab Georges in apel *supply reduction*.

Dezyenmman. Prevansyon ouswa ledikasyon pou anpes nouvo dimoun konmans servi drog. E la se legliz, sosyete sivil, medya, lafanmir, kominote ki enplike. E sa Onorab Georges ki'n apel *demand reduction*.

Trwazyenm. Reabilitasyon ki sa Lalwa pe fer ozordi i en kontinite ki nou pe dir nou pa pe satisfè avek rezilta pour sa kalite kapital ki Sesel pe envestir dan sa bann adikt. Onorab Georges in apel sa *harm reduction*.

We want value for money, e nou anvi ki bann dimoun ki pe benefisye pa pran nou zenerozite alalezer. Zot merit pe fer plis pou apresye ki Leta Sesel pe fer pour zot.

Vis-Prezidan in koz lo en lapros bomaten. Alor, mon pe swiv sa lapros. Vwala ki mwan mon anvi tande e konnen. Plan detaye nouvo Gouvernman kont trafik drog pou protez Lepep Seselwa e dil avek bann

trafiker ki bann kriminel, aköz zot aksyon pe touy nou bann frer avek ser Seselwa.

E la Madanm Speaker, mon ava atir latansyon Lasanble Nasyonal lo en dokiman ki'n pibliye lo en sit *web* Linyon Eropéen le 4 Desanm sa lannen ki apel "*Commission presents new EU Drugs Strategy and Action Plan against drug trafficking to protect citizens and disrupt criminal networks.*"

I en dokiman fantastik ki mon ti ava ankouraz bann Manm Lasanble pou war e lir, ki donn stratezi plandaksyon bann group ki pe ganny targete, lenstitisyon zot bezwen travay avek, parmi bokou lezot pwen ki mon santi i enspir bann zabitan sa blok ekonomik ki zot bann dirizan politik i konnen ki zot pe fer. E determinen pou ranvers sitasyon drog dan zot rezyon.

An konklizyon. Nou pe fer fas avek bann defi enternasyonal. Nou pe fer fas avek bann defi lokal. Nou bezwen ogmant nou zefor. Koman en nouvo Gouvernman nou respekte nou dan Lopozisyon, manda ki *United Seychelles* in gannyen. E pare pou donn zot lespas pou delivre.

Me lefe ki nou form parti striktir nou demokrasi, zot a

dakor avek mwan ki i nou rol pou kestyonn lefikasite sa bann plan ki pe ganny avanse.

E la alor mon rezwenn Onorab Georges, Dirizan Lopozisyon kot ler i demande ki diferans en lazans pou fer avek travay ki en departman Gouvernman ti pe fer avan? *What will be different?* Sipor kominote i enperatif dan lalit kont drog. E lalit kont drog i merit en priyorite nasyonal.

E mon rezwenn Onorab Georges e menm Dr Herminie letan in dir ki drog i en problemm egzistan – *existential problem* pour nou pti nasyon. Si nou pa fer atansyon, sa pti nasyon 107mil dimoun, nou pou dan gran difikilte a lavenir.

Erezman, prezantasyon sa Prozedlwa e konteni bann lentervansyon ki mon'n tande ziska prezan in reasir mwan ki tou lede kote latab Lasanble Nasyonal i lo menm paz. Ki lalit kont drog i ganny pran o serye par tou sa ki enplike ladan. E i reflekte perspektiv nou popilasyon.

Me mon pa kapab terminen Madanm Speaker – mon konnen zot pa tann mwan akoz zot, zot pa ekout radyo. Mon pa konnen kot zot ete. Bann dimoun ki konsernen se sa 10 a 14mil dimoun ki nou pe depans sitan larzan lo zot.

R326.5milyon, pou aksepte nou zenerozite e pou montre lapresyasyon e pour enn fwa pour tou, sanze.

Alor, baze lo bann lopinyon ki'n ganny eksprimen ziska la, mon krwar ki sa i montre pwa lopinyon piblik Seselwa lo size drog ki nou siporte kot i merit siporte. Ki nou anvi war sanzman e ki alor lapriyer se ki Sesel i sanze pour le meyer a lavenir. Mersi Madanm Speaker.

(APPLAUSE)

MADAM SPEAKER

Onorab Aglae.

HON EGBERT AGLAE

Mersi Madanm Speaker. Bonzour VP ek *panel* e tou Manm Onorab. E tou dimoun ki a lekout.

Madanm Speaker, *Bill* ki devan nou dan en fason ou en lot, i pou en diskisyon ki mwan menm mon i pa premye fwa ki mon'n fer isi dan sa Lasanble ki mon rapel letan ti annan kreasyon APDAR.

E ozordi, nou pe war en tel *Bill* parey pe vini pou re amenn li e met li dan son konteks kot i ti ete.

Sa size ladiksyon drog i en size ki pe afekte nou konman en pei. Mon dakor ek sa. Ki lapros

ki nou bezwen pran e ki mon war nou pe pran ozordi se pou pa fer politik ek en size parey. Ok.

E mon pou dakor atraver ou, sa ki Onorab Georges in dir bomaten. Se i pa en konpetisyon sa, lekel ki pou fer pli meyer. Ouswa lekel ki annan pli bon nide. Me i en batay kot nou tou konman en pep i bezwen zwenn ansanm pou kapab *tackle* sa sityasyon ki nou ladan ozordi e ki i pe aggrave.

E letan mon'n fer mon resers mon'n war poudir bann statistik, e menm lo nivo Lafrik atraver sa *Afrobarometer*, ki'n sit problem Sesel. Bann problem enportan ki nou bezwen pe *tackle* lo en baz kontinyel konman en nasyon.

Premye se *the management of the economy* ki'n site. E par 33poursan. E 25poursan in met *drug abuse, addiction and trafficking*. Sa i montre ou poudir nou annan en problem. Prezan kekyon i ki larout nou bezwen pran. Akoz nou ti'n konmanse pou pran en larout lo sa size nou. E atraver ou, Onorab Henrie ki'n koze avan mwan in sit enn de *issues* mon pou dir, lo sa ki Dr Patrick Herminie ti fer a sa moman letan konman sef ki ti pe ansarz *APDAR*.

Me sa ki i bezwen konpran se ki, ti annan en konmansman. Ok. E sa size tretman bann adiksyon, reabilitasyon i pa ariv demen bomaten sa. E pli fasil pour ou konstrir en *housing estate*, ki ou pou dil avek sityasyon drog. Akoz dan 2an ou kapab konstrir en *housing estate*. En 20 a 30 *unit*.

Me pour ou tret sa kantite ladiksyon, i annan an en program ki ti ganny etale. Sa program letan ti pou konmanse ti pou al pour en program 4an. Kot ou ti pou antre lo la. Sa adikt. Avek tou son bann *level of* striktir ki ou bezwen pas atraver bann staz. Ok?

Be ki nou ti war? Apenn ki letan nou ti pe konmans *stage 1*, keksoz ti sanze, nou ti fer fas ek *COVID*. E apre gouvernans i sanze. E zot, zot pa ti *believe* dan sa kalite striktir. E la keksoz ti kase. Nou bezwen aksepte sa.

Me kot nou'n arive ozordi? Nou pou bezwen al rekonmanse. Mon pa anvi montre ledwa *who's right and wrong*. Me selman nou bezwen war nou avek en retar e nou bezwen al rekonmanse pour nou kapab retourn lo sa semen ki ganny *entailed* dan sa

program ki ti byen konpreansiv.

Dayer ti byen ganny met devan. Devan nou menm isi dan sa Lasanble, lo bann staz ki nou bezwen arive. I pa en zafer, parey mon ti war ek ladministrasyon avan ki ti pe sey pou *piecemeal* serten konponan dan sa Program APDAR konpreansiv ki ti la.

Nou konnen i pa ti pou marse nou akòz sa bann mayon pa ti pe zwenn ek kanmarad. Nou ti pou *either* pe rezourd serten problem. Me nou ti pou osi pe mank loportinite pou adres kontinite dan sa *issues* reabilitasyon e sa problem drog.

I annan diferan lazans konsernen ki nou bezwen travay avek. *Ok*. Letan nou pe koz lo *supply*, nou konnen kote drog i sorti. I pa ganny *manufactured* isi Sesel. I bezwen antre dan pei atraver nou lafrontyer. Swa par avyon. Ouswa par lanmer. *Ok*.

E la kot lafors, bann lafors ki sipoze *uphold* bann mezir pou anpes sa bann drog antre, i bezwen fer zot travay. In annan bann sikse. Ou pa kapab dir napa. In annan bann sikse.

Depi lontan in annan bann sikse atraver nou *Coast Guard* byensir. Deteksyon lo *airport*. Bann nouvo lekipman

ki bezwen ganny anmennen. In annan bann sikse. Petet lapros sa 2 gouvènanans i diferan. E *rightly said* “*search and destroy*” i lapros Prezidan in met devan.

E atraver ou Madanm Speaker, Onorab Roucou in demande eski sa bann drog pe vreman ganny detri? Me selman, sa dernyen *search and destroy* ki ti ganny fer, mon pa'n tann spekilasyon deor poudir drog in ariv lo *ghetto*. Konpare ki ler zot ti anmenn ater, apre nou tande drog ti pe ganny lo *ghetto* atraver bann lazans menm ki sipoze zot menm zot sofgard, in arive.

Be petet sa ki mwan mon demande se ki letan nou pe fer *search and destroy* lo lanmer, bann levidans apropiye i ganny prodwir par *video*. E la nou a war kot sa bann keksoz pe ganny detri, si pep Seselwa i sa ki i anvi vwar lo nivo *accountability*. *Ok*.

Lo *size demand and reduction*. Mon krwar i enportan ki nou demann nou lekòr serten kestyon osi. *Ok*. Nou bezwen analize ki lefe adiksyon size drog i annan lo nou sosyete. E sa i enportan. Nou pe perdi en lafors travayer.

E dapre statistik ki mon'n vwar, sirtou nou bann zenn 18an ki sipoze – si ou pa pe

lekol, antre dan lemonn travay ziskan 35an. Nou pe perdi plis ki 10poursan sa lafors travayer, e i pe ogmante. E se sa ki nou pe war plizyer *expatriate* ki pe antre dan nou sistenm ki pe pran sa bann louvraz. Prezan, nou bezwen demann nou lekor, kwa ki merit ganny fer? Akoz reabilitasyon, tretman adiksyon li menm li tousel. Fer bann lafors travay pou *counteract supply* pou anpes antre. I pa sifizan li.

Ki mannyer ou ranvers sa sityasyon ki sa bann adikt in tonm ladan pou fer zot vin prodiktiv e pou kapab antre – e mon dakor poudir sa ki Onorab Henrie in dir se *at the expense of taxpayers' money*, nou larzan ki nou travay ki pe al ed zot reabilit zot. Me an retour kwa ki pe benefisyè nou konman en pei atraver nou *taxpayers' money*?

E se la kot nou ti annan sa Program *URS*, ki byento i pou en mayon. E yer mon ti pe koz bann diferan *step* ki Gouvernman pe pran. Vizyon ki Dr Prezidan Patrick Herminie i annan. E zot pou konpran a lafen pep Seselwa, kwa ki pe ganny fer. Pa tou keksoz ki kapab vin anons ou an detay en sel kou.

Letan nou pe dir *trust the process*, i annan bann diferan letap e mezir ki Gouvernman pe

pran. *APDAR* pe vini. E si nou pou sanz son non parey Onorab George in sizere, atraver ou Madanm Speaker, nou a konnen. Me selman lobzektif i pou reste parey.

So, pou annan kontinite dan sa program, byensir pour zot rann lasosyete sa ki nou pe envestir dan zot, i pou bezwen annan en program ki pou fer zot vin prodiktiv.

I annan bann konversasyon ki pou bezwen al ganny fer avek bann sekter. Sekter prive. Menm dan servis piblik. Akoz sa i 2 landrwa kot sa bann dimoun pou kapab ganny en lanplwa pou al travay. Zot pa pou kapab travay dan lezot pei ouswa al travay dan ler, zot. Zot pou bezwen al dan sa 2 sekter ki egziste. *Either*, sekter prive ouswa dan servis piblik a lavenir.

Me ki mannyer sa i arive? Be sa i arive, ou bezwen annan en program konpreansiv ki anmas zot ki pou fer re donn zot konfyans, re donn zot sa abilite pou vin performan. Leve bomaten pou al travay.

Sa ki bann vizyon ki mwan mon pe mazine e ki mon santi poudir Gouvernman i bezwen al dan sa direksyon.

Prezan, i annan en nivo responsabilite ki nou bezwen partaze la prezan.

Responsabilite i konmans avek mwan, avek ou. Apre i al dekoule dan fanmir. Apre dan lakominote.

Be tan ki nou kontinyen soutir serten pratik, mon pou dir li koumsa, malgre i annan bann diferan persepsyon. Pou annan alegasyon. Sakenn pou dir pour li. Mon krwar tou stasyon lapolis dan Sesel i konnen kote bann *ghettos* i ete. *Ok.*

Be sa pa ase sa. Ou kapab konnen, wi. En dimoun i ale i al frekant laba. I pas son lazournen depi bomaten ziska aswar. Kwa ki i merit ganny fer an plis pou *deter* bann kalite pratik?

Lontan nou ti annan langar *domino*. Nou ti pase bann dimoun ti annan langar *domino*. Ti zwe zot *domino*, zot ti bwar zot pti lalkol. Ouswa zot ti lo lans.

Me ozordi ki kalite aktivite ki nou kapab met a dispozisyon sa bann zenn pou anpese ki zot tonm dan lagresyon, ouswa letan zot lo en program osi, pou fer ki zot pa retourn laba kot sa *ghetto* ankor? Sanz sa lanvironnman. Sa ki i manke osi dan en program.

E tousala i bezwen ganny enkorpoze dan bann diferan departman ki pou dil avek bann

sityasyon sosyal, sitasyon ekonomik.

E se sa ki letan mon pe regard *Bill* devan mwan, malgre i en *Bill* ki annan plizyer laspe teknikal ladan kot pou bezwen annan diferan lekspektiz. Me i pou bezwen annan sa bout kot transformasyon – sa transformasyon sosyal dan pei i bezwen ganny egziste e enplimante.

An terminan, mon pou koz lo resours imen pou travay avek sa lazans letan i pou ganny kree. Nou ti annan serten problem ki ti arive letan kreasyon *APDAR*, aköz *APDAR* ti bezwen pran bann *staff* Minister Lasante ki ti konpetan pou vin travay avek. *Ok.*

E i ti kree serten si defayans mon kapab dir avek Minister, aköz li osi i ti annan problem *staff*. Me selman i ti pe *commission* son bann *staff seconded to APDAR* pou zot travay, ki ti nesesser aköz i ti en konmansman.

Lenvestisman dan resours imen i vreman, vreman enportan pour ou kapab annan en program efektiv. E mwan mon pa pou ezite pou lev mon lanmen pou *vote* pour en Bidze ki pou *allow* sa arive.

Me, nou bezwen dimoun ki konpetan, ki krwar dan en program e ki pou donn sans sa

program pour son renesans. Mon pou apel li koumsa. Son renesans.

An men tan, Gouvernman i bezwen kontinyen tap laport, akòz nou ti ganny en serten sonm larzan pou fer Sant Reabilitasyon. Sipoze annan premyer pyer ti pou mete la English River. Mon pa konnen ki'n arive.

Petet VP si ou annan en nosyon, petet avek sa 2 – zot ti apel sa, sa – ti pou vin en *day* – mon pa konnen si ti pou apel en *Day Clinic*? Si *MAT Clinic*? Wi. Me mon pa konnen ki'n arive ziska ozordi.

Me selman sa li menm li i pa ti pou rezourd sa problem kot reabilitasyon, akòz reabilitasyon i pran letan. Nou bezwen war sa – e *the best model*.

E pour mwan en model se parey plizyer pei kot nou ti ale, Prezidan Dr Herminie sa letan ti al dan sa bann diferan pei pou al regard sa bann model. E tou sa bann pei zot ti annan en sant.

Wi, o konmansman nou ti pe sot anler. Arh, pe al fer Cap Ternay sepa konbyen lasanm. Sepa konbyen. *Ok, ti scale down*. Ti en komansman. En nide. Me la, nou bezwen rode en sant. Nou pou bezwen en sant. Napa lot swa.

E Gouvernman a rode kot pou ganny larzan. Sa 4.5milyon Dolar ki nou ti gannnen, sepa *Euro* ki *UAE* ti pe donn nou ki mon tandé nou predeseser Prezidan ki ti la ki ti pou fer labar Bon Espoir laba. Zot ti ale zot ti dir nou pa nesese. Be sa ti en *wrong move* osi sa. Nou ti pe rod landrwa pou fasilite en lenfrastriktir pour sa.

So, i en size ki nou tou nou bezwen met lanmen *onboard* e siporte. Akòz demen i kapab enn mon zanfán, i kapab enn ou zanfán ki tonm dan sa problem drog e ladiksyon, ouswa lalkol osi.

So, mwan mon dir poudir letan in arive la pour nou pran en *step* ase serye. E mon konnen poudir Prezidan a moman apropiye pou pronons son lekor lo ki direksyon pei i anvi pran dan sa lalit kont drog. Akòz nenport ki Gouvernman pou vin la, i pou en size ki pou bezwen pe adrese. Akòz letan nou get resers, i en dezyenm size problematik ki nou pei i annan.

So, VP mwan mon pou siport kreasyon sa lazans e mwan mon pou enn osi ki pou fer bann swivi nesese pou fer sir ki mon osi dan mon distrik mon annan en 60enn.

E si pa'n ogmante, akòz sa letan ti annan 51 ki ti lo

program. I pou osi annan en 60enn an montan, in sote, ki pou bezwen sipor atraver sa lazans pour zot kapab sorti e vin pli pozitiv. So, kont lo mwan. Mersi bokou.

MADAM SPEAKER

Onorab Naidu. Onorab Naidu.

HON SATHYA NAIDU

Mersi Madanm Speaker. Prozedlwa devan nou i pe reentrodwir APDAR. Prenan kont i en promes 100 zou, parey VP in mansyonnen pli boner.

Me keston ki nou tou nou pou poze se ki kalite diferans eski sa lazans, anba sa ladministrasyon dirize par Dr Herminie pou anmennen, prenan kont ki DSAPTR laplipar bann fonksyon ti'n pase par anba *Health Care Agency* anba ki bann viktim, bann pasyan, bann kliyan DSAPTR ti pe resevwar zot tretman.

E nou tou nou konsyan poudir lo kote tretman, pwen fokal se program *methadone*. Zisteman, i ti a bon pou VP osi klarifye ki kantite an term depans i ganny fer vizavi *methadone*.

Rezon mon pe dir sa se aköz piblik an zeneral ki pa pe neserman ganny afekte direkteman zot, zot santi ki sa i en gaspiyaz larzan *taxpayer*.

This is the conception, persepsyon la deor.

Dimoun i le konnen si sa larzan ki pe ganny met de kote pe ganny byen itilize. Aköz malerezman, baze lo persepsyon ki lasosyete an zeneral ki i pa'n pri dan sa serk visye, se bann adikt i en menas pour lasosyete. En nwizans pour lasosyete.

E zot pa regard bann dimoun konman bann *être* imen. E donn zot sa dinyite ki zot merit gannye. Me plito zot annan en move persepsyon vizavi program *methadone* dan li menm kot zot santi ki lenvestisman pe ganny fer e Lepep ki pe ganny afekte par sa size pa pe ganny naryen an retour an term rezilta ki bokou pli tanzib.

Dan ki sans? Nou annan *low threshold* avek *high threshold*. *Low threshold* se ler pasyan – e *methadone* i 75poursan *substitute* pour eroin, pe resevwar sa medikaman. Pli tar se zot menm ki retourn lo *ghetto*, sa i fe ozordi, pour zot pran bann diferan sibstans. E i vin en serk.

Wi, lo kote *methadone* ler program ti'n ganny entrodwir, in nobou kapab redwir to kriminalite, aköz sa bann dimoun pa pe vol bann *belongings* bann Manm fanmir

e sosyete an zeneral pour zot kapab ganny zot *high*. Me plito ti annan en lot form ki zot, zot ti pe itilize pour zot kapab ganny akse avek sa pwazon.

Me a lafen dizour lakantite dimoun ki ti lo *high threshold* i tre minim. Pli boner *LOTO* in met lanfaz lo en laspe kot sa bann endividi ki lo *high threshold* pe ganny akonpannyen 100poursan lo en baz reabilitasyon.

Se sa laspe ki'n manke pandan travay ki'n ganny fer. *Be it* ladministrasyon avan ki ti pe ganny dirize par Prezidan Faure. E *to a certain extent*, par ladministrasyon pandan nou letan. E byensir, ti annan en lanvi, ti annan en lanbisyon pou etabli ouswa konstrir en sant reabilitasyon. Me byensir, menm si ou annan en *carrying capacity* 100 pasyan, i pa pou ase. I pa pou rezourd problem la deor.

So, ki lapros eski *APDAR* pou fer diferaman ek letan ki zot, zot ti la oparavan vizavi sa laspe reabilitasyon pou asire ki bann pasyan, bann adikt i ganny en tretman ki a laoter kot i annan sa laspe ki konsern reabilitasyon bann adikt?

Pou asire ki nou pa pe zis investir milyon ou en de milyon tou le-z-an. Lannen ale, lannen vini.

Me selman nou pa pe vremen atenn en rezilta ki bokou pli fritir, aköz se sa ki nou tou ki la anndan e Lepep Seselwa la an deor i le pou asire ki sa serk visye ki en bon pe nou bann ser e frer Seselwa i trouv zot, zot in pri ladan i pou annan tou mwayen posib ki Gouvernman dizour pou itilize pou asire ki nou kapab retir zot e anmenn zot dan en semen ver bokou plis prosperite.

E zisteman an relasyon avek sa, *VP* in avoue poudir depans ki pou ganny fer lo kote *methadone* pou monte, aköz lakantite adikt pou monte.

Mon panse dan son *statement* ki in fer bomaten in rekonnet, in avoue poudir ki *the war on drugs is an uphill climb*. I pa en keksoz ki *straight forward*, ki fasil. Ki ozordi pou demen ou pou kapab rezourd.

Me selman i enportan ki i annan *political will*, non selman lo laspe prevansyon ler i konsern a sa ki konsern fonksyon ki *APDAR* pou desarze. Me selman i bezwen vin lo tou nivo an sa ki konsern lapolis.

E ozordi Lepep i konnen, nou, nou konnen poudir ki koripsyon i egziste dan nenport ki departman dan Gouvernman ziska ozordi. Koripsyon pa en

keksoz ozordi pour demen ki ou kapab rezourd.

I konsern natir en imen ki i annan en pozisyon lo lafason ki i pou deservi. Eski i pou deservi li avek lentegrite, senserite, atas li avek bann prensip ki anliny avek sa ki nob e zis? Ouswa i pou les larzan tant li?

E nou tou nou konsyan poudir ozordizour kot Sesel i ete, malerezman – mon pa pe dir tou zofisye. Me selman i annan en poursantaz zofisye ki lo *payroll*.

Sa bann endividi ki nou konsider zot konman bann *Escobar* ki mars libreman konman bann lanz dan nou sosyete, konmkwa zot pa pe fer naryen. Zot pe *operate* atraver bann diferan biznes. *Be it take-away*, konstriksyon. *You name it. This is the situation out there.*

E nou, nou konnen poudir - mwan mon konnen poudir ki nou ladministrasyon sa letan LDS nou ti'n met en kantite lanfaz pou anmenn en lalit asarnen kont bann *Escobar*. Kont bann *dealer* drog. E byensir, sa pa'n neserman fer nou popiler parmi nou elektora dan en serten sans, aköz zot ti war ki nou pe anmenn en lapros serye. E alors in annan pa mal mirmirasyon.

E zisteman, i kapab annan diverzans lo kote ideoloji. Me selman nou lobzektif ler nou ti pe desarz bann diferan loperasyon, nou ti le asire ki nou kominote i kapab respir pli byen. Nou kapab efas sa tas nwar dan tou kwen nou bann distrik.

E mwan lo mon kote konman Manm Onorab pour distrik St Louis, mon ti'n fer bann diferan lesey pou asire ki nou kapab fer bann travay neser pou asire ki nou kominote i vin lo en nivo ki bokou pli apropiye, an konparezon avek ler mon ti'n erit mon distrik vizavi bann diferan fleo ki ti pe afekte mon bann zabitan.

E lo sa baz mon pran lafyerte. Aköz dan en serten sans, mon ti pe met lanfaz lo kote lenvestisman ki vize ver *sports*. Lenvestisman ki pou kapab retir nou bann zenn dan bann move lenfliyans. Sa i bann keksoz ki nou'n fer.

Zisteman avek Departman Prizon, nou ti'n ale nou'n al netway en kan drog. E menm mon koleg Onorab Andy Labonte mon rapel li, li osi i ti'n fer parey. E plizyer nou dan nou fason pour nou, nou ti'n fer tou sa ki nou kapab fer pou kapab efas sa laspe kot ou war en

group zenn pe groupe, pe konsonm sa pwazon.

E parey Onorab pour Plaisance in fer resorti pli boner, ou a krwar *it's business as usual*. O firamezir ki mon pe koze la, drog pe ganny vann laba deor.

So alors, kestyon se ki la sa ladministrasyon dizour pou fer diferaman pou kapab asire ki i annan en rediksyon lo kote *supply*? Akoz in annan en travay ki ladministrasyon sa letan par *LDS*, i ti'n met en kantite resours. I ti'n met en kantite zefor.

Wi, i kapab annan diverzans lo kote ideoloji vizavi lapros. Me selman mon ti'n santi ki *the end* lobzekatif par deryer sa se pou kapab protez nou fitir zenerasyon pou anpes en lot 10mil, pou anpes en lot 15mil tonm dan sa latrap, e pou li zis monte konman en statistik lannen ale, lannen vini.

Mwan mon pe lans en lapel pour bann *decision-makers* lo kote Legzekitiv pou annan en lavolonte prop e senser ver nou prop ser e frer Seselwa la deor.

E zisteman, pli boner mon koleg Onorab Michel Roucou ti pe koz lo *Search and Destroy Policy*. Pour mwan mon napa konfyans dan sa Polisi aköz pou annan mankman

latransparans. E Lepep Seselwa la deor, bann ki mon'n enterakte avek osi dan mon port a port, dan mon bann enteraksyon. Dimoun pa tro, tro fye sa.

E nou konnen poudir, i annan en prosedir atraver Zidisyer kot dan lepase in annan 1.2 tonn drog ki ekivalan pros en bilyon roudri pros 2an pase.

Pour bann ki kapab fer zot resers, zis al lo *SBC* ou pou war poudir kot in annan bann raportaz ki'n ganny fer kot bann diferan lazans ki enplike dan sa lalit kont drog i vini konman bann temwen pou *monitor*, pou asire ki tou bann drog ki'n pase atraver prosesis Ankour, atraver prosesis Zidisyer in fer sir ki in ganny detrir atraver bann prosedir, bann protokol ki montre ki i annan latransparans.

Ler ou dir *search and destroy*. Be si i annan 8 tonn lo en bato, kwa ki anpes nou krwar poudir ki i annan en lot bato ki antre si i pran 2 tonn-

MADAM SPEAKER

Onorab-

HON SATHYA NAIDU

Apre finalman sa 2 tonn -

MADAM SPEAKER

Si ou kapab konklir *please*.

HON SATHYA NAIDU

Yes, mon ava konklir. Mon ava konklir Madanm Speaker. Me selman, mon le zis termin lo sa bout. Kwa ki anpes 2 tonn retourn kot sa *ghetto*? Kwa ki anpes koripsyon antre dan en tel fason fer?

Lanfaz ki nou bezwen pase se lapros ki nou dwatet annan devan en tel size, i dwatet en lapros ki anmenn en meyer lavenir pour nou fitir zenerasyon e pour bann dimoun ki'n pri dan sa serk visye.

I pa en keksoz ki nou kapab rezourd ozordi pour demen. I pou bezwen annan en zefor ekstraordiner. *It's not a question of we are here today* e tou sa ki nou pe fer i meyer. Non. Nou bezwen ouver e transparan vizavi lapros ki nou anvizaze adopte.

E ankor en fwa, sak sou ki pe ganny met de kote an sa ki konsern en tel size, i bezwen ganny byen depanse akòz nou konnen dan lepase mannyer resours Leta ti'n ganny abize, ki'n fer ki nou pa neseserman kapab atenn nou lobzektif.

Lepep la deor i ase matir pou kapab analiz tou keksoz pour zot menm. Me mon swe se

ki sa lazans – akòz zot ki annan *the numbers* lo lot kote latab –

MADAM SPEAKER

Ok, Onorab.

HON SATHYA NAIDU

Ki pou ganny kree, i ava atenn sa lobzektif pou asire ki nou bann ser ek frer pou asire ki nou fitir zenerasyon pa trouv zot dan sa sityasyon ki nou, nou war nou ozordi ladan. Mersi.

MADAM SPEAKER

Mersi. Onorab Larsen.

HON CECILE LARSEN

Mersi Madanm Speaker. Bonzour *a tous*. Spesyalman zabitan Au Cap ki a lekout. Madanm Speaker, mon pou donn mon sipor pour sa *Bill* akòz sa *Bill* i enportan, i nesese e i reprezant en pa determinan pour nou pei dan son lager kont drog.

Bokou fwa dan sa Lasanble nou koz lo lefe drog dan nou sosyete. Fanmir i ganny detrir. Zenn i perdi direksyon e kominote pe sibir en gro presyon sosyal.

En pwen ki vreman enportan pour nou pei, pour nou fanmir e pour tou bann dimoun ki pe soufer, oubyen ki'n perdi en dimoun akòz drog

se ki sa bann dernyen lannen in montre nou en keksoz kler.

Prevansyon, tretman e reabilitasyon pa kapab ganny fer dan en fason disperse. I bezwen en direksyon for, en lorganizasyon dedye e en vizyon solid. E se pour sa rezon ki APDAR ti ganny etabli. I ti ganny donn en manda kler avek son prop plan stratejik.

Madanm Speaker, sa ki nou'n trouve anba Gouvernman LDS ti en gran dezapwentman. Olye ranforsi APDAR, LDS ti pran en desizyon ferm li e fer li vin en departman anba Minister Lasante.

E se sa ki prevansyon ek reabilitasyon ti vin pli feb ki zanmen. Tro bokou dimoun kalifye ti kit sistenm. Bann program reabilitasyon ti disparet. Bann program prevansyon ti mank direksyon. E sa i enn pli gran *failure* ki nou'n vwar dan lasante piblik pandan 5an. Prevansyon drog pa zis en kestyon lasante. I konsern lekonomi, lasosyete, sekirite, fanmir, travayer e nou zenn. Madanm Speaker, konsekans ki ferm PADAR in anmennen i bokou. Mank kordinasyon ant bann servis ki ozordi i en defi enorm pour tretman ek reabilitasyon.

Retar dan program reabilitasyon ki in afekte fanmir

e osi bann zenn ki ti pe bezwen en sans pou sanz zot lavi.

Mank *monitoring* ek *evaluation* ki ti fer li difisil pou konnen ki program ki marse e kwa ki pa marse. Bann fanmir in soufer. I pa zis en kestyon papye, me se en lavi imen.

Madanm Speaker, nou Gouvernman i annan en vizyon diferan. Nou rekonnet ki sa size i enportan. Nou pe travay pou remet an plas en keksoz ki solid, ki serye e ki pran son rol nasyonal.

Nou krwar dan en lorganizasyon ki annan pouvwar kler en sistenm kordinasyon ki fonksyonnen e donn bann profesyonnel siport ki zot bezwen.

Nou pa pou fer sa lerer ankor. Nou pa pou tir en *agency* e fer li vin zis en biro. Nou pe avans devan e non pa an aryer. Ferm APDAR ti en lerer ki LDS pa pou kapab eksplike. E sa Gouvernman ozordi pe sey repar sa bann dega ki zot desizyon in kit deryer.

Kriz drog i enn ki reel. E alors i merit en solisyon reel. E sa Gouvernman i determinen pou retourn sa size kot i merite. Lo *forefront* pei avek en lorganizasyon for, endepandan e efikas.

Avek sa *Bill* nou pa pou zis koze. Me nou pe azir e ed bann

ki pli feb e anpes zot tonm dan sa fleo drog. Nou annan bann lenstitisyon ki dil avek sa problemn drog e zot pe fer zot bout. Me i mank kordinasyon. E sa i fer ki travay pa al dan en sel direksyon. E bokou resours i ganny gaspiye.

Sa *Bill* i propoze ki sa *agency* pou met tou travay ansanm, planifye lo en plan nasyonal e fer bann program annan kontinite e asire ki prevansyon tretman e *rehab* i ganny fer dan en fason pli efikas. Sa i en keksoz ki bokou profesyonnel in demande pandan plizyer lannen.

Madanm Speaker, nou kapab kontinyen tret problemn drog konman en size izole. I en size sekirite, ekonomik e sosyal.

Drog i en gro problemn ki redwir kapasite travay, ogmant depans lasante, afekte sekirite kominoter, e afekte lavi familyal 3 kar fanmir Seselwa.

Sa *agency* ki *Bill* pe propoze pou annan en responsabilite kle. E sa i vedir prevansyon dan lekol, sipor pour fanmir, program reentegrasyon e *rehab* e koleksyon *data* pou fasilite *policy making*. Se sa ki manke ozordi. E san li nou pa pou zanmen kapab kontrol sa problemn drog.

Bokou fwa sa krwayans lager kont drog i zis aret dimoun e met zot dan prizon. E bann ki travay dan sa domenn i dir nou kler. Nou bezwen en *agency* ki ogmant kapasite *rehab*, anmenn program pli modern, travay tre pros avek bann NGOs e donn dimoun en dernyen sans pou rekonstrir zot lavi. Sa *Bill* i donn fanmir Seselwa lespwar. I donn sa pep en direksyon modern e pli stratezik.

Madanm Speaker, parfwa nou met bokou lanfaz lo eroin, kanabis e kokain. Me lalkol i toultan parmi bann pli gran faktor ki kontribye kot i konserne vyolans domestik, lasante mantal, problemn lanplwa e aksidan transpor. E sa *Bill* i osi fer sir ki lalkol pa reste an deor bann program sosyal e nasyonal. I reform ki resevwar sipor bann *social worker*, bann dokter, bann NGOs ki zot tou zot pe koz menm langaz.

Pou konklir Madanm Speaker, sa *Bill* i nesese, i apropiye e i anliny avek en lavenir pli briyan kot nou zenn a ganny proteze e anpese ki sa fleo drog i anvair nou pei plis.

Nou Gouvernman pe kontinyen travay pou met sekirite, lasante e dinyite Seselwa devan. E pour mwan

personnelman, sa premye pa dan detrir drog depi lo lanmer ti vreman byen e in donn mwan bokou lespwar.

E sa *Bill* i en pa pli pre ver en Sesel kot mwens zenn i perdi lavi avek drog. Plis dimoun i ganny dezyenm sans. Resours i pli efikas e programm prevansyon i anmenn plis lenpak. Sa Gouvernman pa pe kree en *agency* zis pou kree en lot biro.

Non, Madanm Speaker. Sa Gouvernman pe kree en *agency* pou sov lavi. Mersi Madanm Speaker.

(APPLAUSE)

MADAM SPEAKER

Mersi. Nou a pran 2 dernyen entervenan avan nou al pour nou *break*. Onorab Woodcock apre Onorab Gill.

HON WAVEL WOODCOCK

Mersi. Mersi Madanm Speaker. Bonzour VP, tou bann Manm e tou dimoun a lekout.

Ozordi nou pe debat lo en *Bill* pou etabli sa ki nou tou nou konnen konman APDAR, *Prevention of Drug Abuse and Rehabilitation Agency Bill*, pou re kree en lazans ki ti deza egziste oparavan anba Ladministrasyon Parti Lepep, ozordi US.

Sa *Bill* ki nou pe gete ozordi i *more or less* en *copy and paste*. Zot in *tweak* li en pe. Me selman i plizoumwen menm lazans ki zot pe kree. Zot pe re entrodwir en lazans ki nou Ladministrasyon LDS ti'n fermen. APDAR. Ki apre ki nou ti'n *repeal* APDAR, ti ganny bouze konman en divizyon anba Minister Lasante, DSAPTR. Divizyon *for Substance Abuse, Prevention, Treatment and Rehabilitation*.

E DSAPTR ti ganny striktire anba plizyer program, anba plizyer *unit*, enkli bann *support services* parey bann Manm in mansyonnen. E dela sa bann servis pe ganny propoze anba APDAR.

Prevention and education treatment bann pasyans. *Harm reduction, phycological support. Social reintegration* pou reentegre nou bann pasyan. Nou bann frer ki malerezman in tonm anba lenfliyans sa bann drog dan lasosyete. Enkorpor zot dan sosyete.

Mon rekonnet Madanm Speaker, zefor bann *staff* DSAPTR. Zot pe fer bokou aköz i pa en louvraz fasil ditou. Me le kestyon ki nou bezwen demande se, ki ti vre lentansyon kreasyon APDAR? Eski par re kree APDAR, APDAR

pou fer pli byen – pou fer pli byen ki *DSAPTR*?

En kantite keksoz ki zot ti dir *APDAR* pou fer, malerezman anba zot ladministrasyon *APDAR* ti *fail* e zot pa ti pe fer. Malerezman, zot pa ti pe fer.

Mon a donn en legzanp. *The Rehabilitation Center* ki zot pe propoze ki menm anba nou ladministrasyon osi, i annan serten travay demars ki'n ganny fer bidzeter pou fer en Sant Reabilitasyon Tretman pour nou bann pasyan.

E Praslin nou ti annan le fame *Dove Treatment Center* Praslin ki nou tou nou konn sityasyon. Nou tou nou konn listwar ki ti arive avek sa sant. Gro depans.

Massive budget pou *renovate the former YRTC* sa batiman pou fer ki nou annan en sant pou *treat* nou bann pasyan. Nou bann frer ki malerezman in tonm anba bann lenfliyans drog.

Ti annan dortwar, ti annan *gym*. Fasilite en landrwa pour *counselling* e bann lezot servis ki pe ganny ofer avek bann pasyan. Me ki ti arive? Nou ti war poudir ti *fail*.

Sa landrwa ti ganny abandonnen, ti ganny anvai e zot ti prefere - Mr Herminie ki ti SS sa letan, pou kit sa landrwa. Abandonn sa landrwa pou al

lwe 2 lakaz avek dalon pour R60mil ki pa ti *conducive at all* e kit en landrwa, en sant a labandon.

Ozordi sa landrwa – nou Gouvernman dan ladministrasyon in refer sa landrwa e ozordi i *the Youth Detention Center*.

Nou rapel. SS monte desann, Lerop partou dan lemonn Madanm Speaker, pou swadizan pou al fer resers, *case study*. Rod bann *best practices*. Me selman nou pa'n war vreman ki'n abouti.

US ozordi pe koz lo byennet bann *addict*, lo tretman pour zot. Donn zot, zot dinyite. Siport zot Madanm Speaker. Mon pa tro, tro *trust* zot. Ou konnen aköz mon pa *trust* zot? Aköz listwar in montre nou otreman.

Nou'n vwar tro bokou keksoz dan lefase kot *United Seychelles*, Parti Lepep zot in servi bann *addict*. Sirtou pandan letan eleksyon. E mon bezwen dir mon annan levidans devan Lakour.

Nou annan levidans kot menm dan dezyenm *round* eleksyon, nou'n war kot lakantite, dan tou bann distrik bann zenn, nou bann frer ki'n tonm anba lefe sa bann fleo kot in vin kot nou in dir poudir *in*

the first-round zot bann ID card in ganny aste.

En kantite zenn. En gran kantite zenn zot *ID card* in ganny aste. Bann zenn i ganny servi pandan letan eleksyon.

(Interruption)

HON WAVEL WOODCOCK

E sa bann zenn in apros nou, in dir nou ki'n pase. Dan tou distrik in ganny fer sa bann keksoz Madanm Speaker. Zot pa kapab dir zot pa'n fer. Zot pa kapab dir ki zot pa'n fer sa bann keksoz lepase.

In annan bann *case* devan Lakour Madanm Speaker kot i annan zot bann siporter ki zot non ti ganny *struck off*. Ti ganny tire lo *voters register* aköz zot in aste *ID cards*.

I bann keksoz, bann pratik. E sa bann zenn *addict*. Sa bann zenn anba sa bann lenfliyans in target ki – zot en target ki pou ganny servi par sa parti politik.

Nou'n war Madanm Speaker, kot menm bann *dealers* i ganny servi. Dezyenmman Praslin, i annan en *dealer* ti Praslin.

Madanm Speaker, mon ti organize, mobilize Baie Ste Anne e Grand Anse pour nou swiv sa dimoun ki zot ti fer desann Praslin ki ti pe pars

partou *Mr Speaker, e drog i ganny servi. Drog i ganny servi konman en zouti eleksyon, konman en zouti politik Madanm Speaker.

Dakor pa dakor, Lepep Seselwa i konnen poudir drog i en keksoz ki pe ganny servi. Ozordi zot pe dir zot *care* pour bann *addict*. Me selman sa i en keksoz, en zouti ki ganny servi pandan eleksyon pou enfliyans sa bann zenn, olye sey ed sa bann zenn.

Onorab Lepathy in dir *Mr Speaker. Nou'n war en kantite. Nou'n war menm sa ki mont lo *Cat Cocos* pou al pran goni rous. Tir parsel donn bann *dealers*.

Mon ti annan e mon annan portre ki nou'n tire kot bann keksoz pe deroule, kot nou'n swiv sa bann dimoun ki'n vin Praslin pe fer sa bann aktivite koumsa.

Drog, larzan i ganny servi pou sey enfliyans nou bann *addict*. Letan eleksyon, zot ganny servi. E sa i bann keksoz ki fodre i ganny diskontinyen dan nou pei Sesel si nou anvi ed sa bann zenn, Madanm Speaker.

Onorab Lepathy osi, Onorab Louise in dir – in koz lo fodre nou pli serye, dil avek bann *dealers*. Me nou tou

konnen, bann *dealers* i ganny servi pandan letan eleksyon.

E la en kantite bann *dealers* ki zot in promet pe espere kan ki zot pou ganny large dan prizon pe esper zot ganny large. I annan. I annan. In ariv lo *Facebook* tou Madanm Speaker.

US Madanm Speaker, ti napa lavolonte pou anmenn sa lalit kont drog. Anba *LDS* in plis lasezi drog dan listwar nou pei. Plis prosekasyon bann *dealers*. Bokou bann gran *dealers* in ganny arete partou lo Mahe, lo Praslin. E Lepep Seselwa in rekonnet sa travay ki Ladministrasyon *LDS* in fer. E sa travay foudre kontinyen.

Ozordi zot ladministrasyon i la. Sa bann pratik lepase foudre ganny diskontinyen. E foudre zot osi zot gard zot parol, zot anmenn en lalit asarnen kont drog parey zot in dir zot pou fer.

E si zot fer sa, mwan konman en Manm *LDS* mon pou siporte sa lalit. E mon pou salye zot si zot fer sa travay. Si zot aret servi nou bann *addict* ozordi e zot ed zot. Ed nou bann frer ek ser ki'n tonm anba lenfliyans. Si zot fer sa, mon ava siport zot. Be, mon pa tro *trust* zot Madanm Speaker.

I annan Manm ki'n vin devan Lasanble Nasyonal ki'n

defann bann *Escobar* dan Lasanble Nasyonal. Anmenn kestyon. Ler *raid* ti pe ganny fer lo bann *housing estate*, lo bann *ghetto*, bann landrwa ki ti pe vann drog, zot ti anmenn kestyon pou vin *challenge* Komisyoner Lapolis.

Zot ti lager aköz nou ti deport en dimoun ki ti enn bann dimoun ki ti pe – enn bann pli gran *dealer* drog ki ti annan dan nou pei Sesel. Ti dan Lasanble. Dan Lasanble dan 7enm Lasanble.

E parey mon'n dir, i annan *Escobar* ki nou'n deporte. Petet la mon pa konnen si *United Seychelles* pou fer zot retournen, sa ki nou'n deporte, ti sa *prohibited immigrant*.

Me selman *Mr Speaker nou, nou pa anvi kit bann pratik lepase. Si zot, zot pou fer pli byen. Fer pli byen. Annou diskontinyen sa bann keksoz.

APDAR i kapab vin en lazans pozitiv. Me foudre i ganny kree avek bon lentansyon. I ganny servi pour tretman avek reabilitasyon.

Nou tou nou konn vre lentansyon, vre rezon aköz *APDAR* ti ganny kree. Apre ki *US* ti perdi eleksyon Lasanble 2016, Mr Herminie ti perdi son pozisyon, son plas Speaker. E *PL/US* in bezwen donn li en pli gro pozisyon aköz i ti Speaker.

APDAR ti ganny kree e Mr Patrick Herminie Prezidan ozordi ti vin SS APDAR.

E mon annan lenkyetid ki APDAR i ganny servi konman en zouti politik pou sey manipul nou bann zenn aköz in arive dan lefase. Sa i mon lenkyetid e lenkyetid Lepep Seselwa. E se en SS ankor ki pou *run* APDAR. En lot SS ankor. Premye fwa anba en ladministrasyon i annan sa kantite SS.

Yer anba *Mental Health Care Agency* nou'n vwar ki se en SS ki pou *Chair* ankor. APDAR osi pou annan en lot pozisyon SS. I pou fer 10 SS an total ziska prezan anba US. En nouvo rikord nasyonal.

9 *advisors* e en rikord kantite PS. 11 PS an plis ki ladministrasyon avan LDS. 36 PS an total ziska aprezan. E mwan mon panse se ki zot in *run out* lo lakantite Minis ki zot kapab apwente. Ki 14 Minis.

MADAM SPEAKER

Fer ou konklizyon Onorab.

HON WAVEL WOODCOCK

Alor zot bezwen donn plis pozisyon SS e *advisor*. E byento, lasezon Anbasader pe al fleri. An konklizyon Madanm Speaker, mon pa anvi ki ladministrasyon prezan i

kontinyen servi sa gro popilasyon ki vilnerab.

Parey mon'n dir oparavan, ozordi US pe koz lo lalit kont drog. Pran ka avek bann *addicts*. Me listwar i montre otremman. Dan lefase zot in tro servi sa bann zenn. Tro servi nou bann frer ek ser ki'n tonm anba lenfliyans drog.

Me si APDAR i vreman zwe sa rol ki i merite, mon pa pou *mind* siport en tel lazans. Me malerezman mon pa *trust United Seychelles*. E Seselwa osi i annan bokou doutans.

Petet VP dan son repons i kapab donn nou en garanti ki sa bann pratik lefase pou arete. Si zot kapab donn sa garanti, *then* petet APDAR i kapab vin sa lazans ki nou ti a swete annan. Mersi Madanm Speaker.

(APPLAUSE)

MADAM SPEAKER

Onorab Gill.

HON CHURCHILL GILL

Mersi Madanm Speaker. Madanm Speaker, si Onorab i annan laprev tou sa ki i pe dir, *either* i *substantiate* oubyen i anmenn devan Lasanble nou tou nou a vwar. Ki i pe fer ek sa *lafyev laprev? Pe fatig li. Ou pa

war pe trangle li. Fodre anmenn devan Onorab.

Madanm Speaker, eleksyon in fini Sesel. Dr Patrick Herminie i Prezidan Larepiblik Sesel.

(APPLAUSE)

HON CHURCHILL GILL

Ti a bon ki Onorab aret perdi letan Lasanble avek size eleksyon. Nou annan en *Bill* devan nou ki nou bezwen fini avek pour sa bann dimoun ki pe soufer ganny zot tretman.

Nou pe koz rikord nasyonal SS. Pli rikord nasyonal Sesel se en ladministrasyon pli enkonpetan ki'n deza egziste ki zot in ganny mazorite dan Lasanble. Zot in ganny *State House*, me zot in ganny met deor apre 5an. Sa ki apel enkonpetan.

(APPLAUSE)

HON CHURCHILL GILL

Madanm Speaker, sa *Bill* devan nou, tou sa ki Manm in koze i annan merit. Me selman kot nou'n arive la ozordi, apre ki nou'n annan tou sa bann diferan lazans, bann diferan *agency* ki ti siport sa lazans apre ki lazans *APDAR* ti ganny *repeal*. Ozordi nou 2025.

Alors kestyon devan nou; ki bor nou ete ozordi ler nou pe koze la apre tou sa bann keksoz ki'n ganny fer pour nou sey adres sa problemn?

Apre sa kantite larzan ki'n ganny depanse, parey i annan Onorab ki'n koze in fer sorti. En kantite larzan. Me selman ozordi nou diskisyon se ki nou fer *moving forward*, menm si nou konnen bann diferan defayans oubyen bann diferan keksoz ki nou ti kapab fer pli byen, petet nou ti ava pli lwen. Me selman realite i reste, la kot nou ete se la kot nou ete.

Alors i enportan ki sa bann dimoun ki ler nou, nou pe koz kot nou ete, kwa ki'n fer byen. Kwa ki pa'n fer byen. Ki mannyer nou pou fer byen. Mon krwar nou bezwen tonm dakor ki nou fer bann diskisyon konstriktif ki sa bann dimoun ki pe esper en rezilta avek nou a kapab finalman ganny en soulazman lafason ki zot lavi i ava amelyore.

E fodre pa nou bliye. Mon'n tann nonm sonm 14mil. 14mil dimoun dan en groser pei parey Sesel. E si ou konpar sa avek *expatriate* ki pe travay Sesel, i ti pou tir en kantite presyon *expatriates* si tou sa bann dimoun ti napa sa bann problemn e zot ti kapab pe kontribye parey nou tou ki la

anndan nou pe donn lanmen pou fer sa pei bouz devan.

Alors, se sa rezon ki ozordi *United Seychelles* i krwar poudir *moving forward*, keksoz ki pou pli ideal se annan en lazans.

Alors, sa *Bill* devan nou se pou met an plas en lazans pou kordin aktivite diferan lenstitisyon ek lorganizasyon ki angaz zot dan prevansyon labi drog ek lalkol. Met lanfaz lo tretman e reabilitasyon dan en fason olistik.

Sa *Bill* i osi anliny avek Konstitisyon. Lalwa i osi annan lentansyon pou adres size bann medikaman ki ganny donnen san preskripsyon. Akoz parfwa sa osi i kapab annan serten lenpak negativ lo sa bann dimoun.

E sa bann keksoz koumsa i tre primordyal pou kapab fer sir ki lobzektif i ganny atenn ler nou kapab tir sa bann diferan *layer* ki pa pe ed nou pour nou kapab ariv kot nou pe ale.

Ler kreasyon *Division for Substance Abuse Prevention, Treatment and Rehabilitation* ti ganny kree e ti ganny met anba Minister Lasante, ti en lapros ki ti zis donn bann adikt, en lapros ki viz ver tretman.

Me selman an menm tan, nou pa ti'n petet - sa letan nou pa ti'n pran kont ki zis avan sa

lazans i ganny met anba Minister Lasante, deza Minister Lasante ti *overload*.

Nou tou nou konnen e sa i kler dan fason ki nou'n vwar sistenm lasante in evolue depi ler sa lazans in al laba, nou konnen ki kantite difikilte Minister Lasante in pas ladan pou kapab dil avek bann keksoz.

Alors sa nide, menm si petet sa letan i ti ganny vwar konman en nide ki i ti kapab anmenn rezilta. Me selman i kler ki donnen kot i ti'n ganny mete, sityasyon kot i ti'n ganny mete, i pa ti posib pou kapab ganny delivre lo en nivo, ki sa bann dimoun ki pe ganny afekte kapab ganny sa tretman dapre zot bezwen dapre ki devret.

Alors, se sa rezon ki i annan nesans. I annan kontinyasyon atraver en lazans pour ki tou keksoz i a ganny santre dan en landrwa. E sa parey nou konnen i pou *State House*.

E i a pli fasil pour sa dimoun ki'n vin ek sa nide pou reentrodwir *APDAR* pour li kapab annan en lizye e an menm tan pour li kapab asire ki tou sa bann *clause* ki'n ganny mete dan sa *Bill* i kapab ganny aksyon lo la dan en fason byen.

Pour ki sa rezilta ki nou pe eksepte gannye avek sa *Bill* nou a kapab finalman gannye. E bann dimoun – nou a kapab war sa 14mil i a posiblerman nou a war li desann pou vin 7mil olye 5mil. Tousala i pou dan nou lavantaz, akòz nou *workforce* i dan problem e sa *Bill* i en fason kot nou pe rod en solisyon pour en group dimoun ki ankò annan lafòrs.

Nou'n tandè masyon taler ki group laz sa bann dimoun ki dan sa bann keksoz. E i kler ki bann dimoun ki annan – ki kapab kontribye ankò en kantite pour pei.

E si sa travay dapre sa lazans pe propoze i ganny fer byen, i kler ki nou *workforce* pou annan en amelyorasyon lo la. E sa i kapab dekoul dan en fason ekonomik kot nou ava annan mwens *forex* pou sorti si sa bann dimoun i kapab antre dan lanplwa.

Alors, dan tou son sans, sa *Bill* i tre pozitif pour Sesel kapab fer en perse dan sa bann sityasyon kot nou war nou ladan ozordi. Mersi Mr Speaker.

(APPLAUSE)

MADAM SPEAKER

Mersi. Nou ava prezan pran en *break* e nou a rekonmans nou *meeting* 2er.

(BREAK)

MADAM SPEAKER

Mon dir bonn apre midi tou bann Manm Onorab. Nou ava rebran bann lentervansyon. Onorab Monthy. Onorab Monthy pa la. *Alright*. Onorab Sandra Sultan.

HON SANDRA SULTAN

Bonn apre midi Madanm Speaker. Bonn apre midi VP e bonn apre midi bann Onorab avek tou bann zabitan Anse aux Pins ki a lekout.

Problem drog mon krwar dan Anse aux Pins i vizyel e i reel. Mon dir sa akòz nenport ler ou pas dan bann *hotspot* ou pou war nou bann zenn pe pike.

E zabitan nepli kapab plant naryen kot lakour, akòz droger pou vin rekòlte. E menm si zot raport avek zofisye lapolis, naryen pa ti pe ganny fer.

La mon krwar vi ki nou bann zofisye lapolis in ganny *body-worn cam*, mon krwar sa leskiz napa levidans i ava diminyen en pe.

Nou bann droger ki lo sibstans laplipar zot, zot lo *methadone*. E i paret ki sa problem *methadone* i pe tret zis bann ki lo eroin. Me sa bann ki lo kokain e *crystal meth*, zot

pe war zot napa swa se servi sa *methadone*, ki pour zot i pa ti pe ede. E sanmenm sa bann ki koman zot fini pran sa bann *methadone*, zot war zot pe diriz ankor le *ghetto*.

Lalkol osi dan Anse Aux Pins, mon krwar pre pou li ranplas dite dan bomaten. Sa bann fleo i definitivman annan reperkisyon kot lakour. E parfwa i sa menm lakour ki lekol pe sispann sa bann zanfan akoz mal konportman.

Alors, bann zabitan, sa prozedlwa ki devan nou i pou etabli en lazans ki pou kordin bann aktivite parmi lenstitisyon e lorganizasyon ki pou enplike dan prevansyon, tretman e reabilitasyon pour labi drog avek lalkol.

I pou ed bann fanmir avek endividi ki pe ganny afekte avek bann labi sibstans pour zot kapab ganny en pli bon servis. Sa bann lakour kot *Chetty Flat* mon konnen ki zot pe soufer avek sa bann droger ki napa balizaz. E sa lazans i pou la pour zot soutyen.

Sa *Bill* pe osi demann langazman kominote pou kapab idantifye e rann lapel pour sa bann ka drog ek lalkol. Sa i pou ede ki zabitan a form parti pou rod solisyon problem.

Sa Lalwa pou ogmant mezir prevansyon nou bann zenn e bann ki vilnerab kont akse e ladiksyon drog. Pou redwir maladi ki pe kontinyen ganny propaze atraver sereng. Alors, mon pou siport sa Lalwa akoz bann obzektif prensipal.

I pou amelyor kordinasyon nasyonal e partaz lenformasyon lo problem drog avek lalkol.

I pou ankouraz kominote pou partisip dan program prevansyon e sansibilizasyon.

I pou devlop resers pou trouv bann bon solisyon.

I pou fer servis tretman e reabilitasyon vin pli aksesib.

E sa mon pe mazin nou bann droger lo *Chetty Flat* ki souvandfwa letan mon ti pe fer *door to door* vizit zot ti enple e zot ti dir poudir si zot ganny en landrwa ki kapab anmas zot, reabilit zot e fer zot retourn dan lasosyete, zot pou vreman apresye.

E lot lobzektif sa *Bill* se pou redwir bann domaz ki drog ek lalkol i fer atraver ledikasyon e regilasyon. E Minis osi i pou annan pouvwar pou fer regilasyon lo sa tretman e Program *Harm Reduction*.

E mon pe demann tou mon bann koleg pou definitivman pour nou siport sa *Bill*. Mersi.

(APPLAUSE)

MADAM SPEAKER

Onorab Labonte.

HON ANDY LABONTE

Mersi Madanm Speaker. Bonn apre midi Madanm Speaker, VP avek ou delegasyon. Tou koleg Onorab e zabitan La Rivière Anglaise. E en bonzour spesyal pour tou bann *staff* e travayer *DSAPTR*, ki byento nou pou retourn li *APDAR*.

Madanm Speaker, mon pou konmans par felisit Direkter Zeneral Marie-Josette Louise avek son tim kot *DSAPTR* ki zot pe fer en travay vreman eksepsyonnel.

Annefe, sa felisitasyon i pa zis pour li avek son tim ki la aktyelman. I osi al pour bann presedan osi, ki sa travay parey nou konnen kont labi sibstans dan Sesel i pa'n konmans zis par *APDAR*. I en keksoz ki nou bezwen kit antet.

I en lager ki mon mazin ler mwan mon ti ankor byen zenn marmay mon ankor pe lekol. Ki letan nou ti annan bann groupman - diferan groupman depi konmansman lekol kot *CARE* ti egziste, ti annan en travay ki ti pe ganny fer.

E mwan mon mazin partikilyerman parey Ben ki

nou konn li konman Benjamin Vel ki mon krwar sa letan i ti *DAC*. E i annan en travay ki ti pe ganny fer.

Alor i montre ou poudir i annan plizyer dimoun ki'n ede dan sa lalit kont drog. Me selman petet plizoumwen en pti pe konsantre lo ki mannyer pour nou tret sa sentonm. Me nou pa ti pe vreman petet rod solisyon kot problemm i konmanse.

E avek leksperyans ler nou'n war poudir sa problemm in pli aggrave, *then* nou'n bezwen etabli bann striktir pour nou kapab dil avek sa problemm dan en fason olistik.

La i fer mwan osi mazin Dr Malulu ki li osi i ti pe fer en travay vreman eksepsyonnel. E bokou plis lezot ankor. Bann dokter ki deza la kot *DSAPTR* ki mon pa pou nonm zot non, avek bann travayer. Zot konnen.

Akoz mwan mon en dimoun ki, Madanm Speaker, mon travay vreman *close* avek kominote bann dimoun ki lo sibstans. Parey zot konnen poudir mwan mon en dimoun ki mon krwar dan drwa imen e mon la pour mwan toultan vin en lavwa pour bann dimoun ki vilnerab, ki vreman pa kapab koze. Parey nou dir, bann *minority groups* *Mr Speaker – Madanm Speaker.

So, mon vreman konsernen. Mon konsernen avek sa problemn aköz problemn drog i en problemn ki konsern nou tou. Parey in ganny fer sorti depi bomaten.

Madanm Speaker, i pa en keksoz ki merit pran laglwar pour nou - oubyen partizan – politik partizan pour nou gete lekel ki pe fer pli byen. Lekel ki pa pe fer pli byen. Non.

Me plizoumwèn en travay ki nou merit fer li kolektivman. Parey nou'n kapab war poudir bann Gouvernman ki'n la oparavan, nou tou nou'n rod fason pour nou sey adrese.

Malgre ki petet mon kapab dir la ki anba Ladministrasyon LDS nou'n war ki nou Prezidan ki ti la in enn ki'n kit son promes ki'n fer avek pep Seselwa ki'n lager.

In anmenn en lager asarnen, parey Onorab Woodcock in dir konsernan lalit kont drog. Kot nou nou'n fer pli gran – bann gran lasezisman drog pandan sa pti peryod letan ki nou nou'n la.

*Mr Speaker, ler ki mon lo la, mon pou osi kondann – kondann sa bann dimoun ki *involve* zot dan bann pratik ki pe detri nou lasosyete, ki bann *dealers* drog. E la mon distrik pa'n ganny eparnye. Pa'n ganny eparnye.

Mon mazin *Thompson Lane*. *Thompson Lane* ki ti en landrwa kot i pa ti parey i ete. Castor Road. Union Vale anler pou al kot *condominium* *Mr Speaker, i en landrwa kot mon'n toultan pe sey lager avek sa kominote pour nou rod fason ki mannyer nou pou kapab fer sa landrwa vin pli *safe*.

E se pour sa rezon ki nou ladministrasyon ti deside osi pour nou dir, be *ok*, nou ava sey fer en miray pour nou gete ki mannyer – premye faz pour nou sey anpes drog antre dan sa kominote. E sa i enkli bokou bann lezot kominote.

E parfwa Madanm Speaker, nou pa pran kont ki domaz vreman drog pe fer dan lasosyete. I annan en peryod letan kot petet serten endividi i dir, be non, mwan mon deryer mon gro miray, so i pa konsern mwan. Me non.

E finalman nou war poudir nou viv konman en kominote global. Nou zanfan i sorti kot nou i al lekol, so i pas dan milye semen. Alor i fasil pour li ganny enfliyanse avek drog.

E par kont Madanm Speaker, i vre nou souvandfwa pran drog koman sa problemn pli grav. Pli grav ki – drog pli grav ki lalkol. Me an realite Madanm Speaker, mon pou dir

se lalkol i enn ki pe anmenn bokou plis fardo pour nou kominote.

Akoz ler ou pe mazinen, lalkol osi i anmenn plizyer maladi parey nou kapab konnen, i annan ki annan pou fer avek bann maladi parey lefwa, dyaliz. I anmenn problem sosyal kot nou war labi dan lafanmir.

So, alor mwan mon vremen apresye ki nenport ki lazans ki pou la oubyen divizyon ki pou ganny kree ki pou lalit kont labi sibstans, mon pou siporte dan serten fason ou en lot Madanm Speaker.

Me sel diferans parey Onorab Bernard Georges ti'n fer sorti se ki nou, nou ti'n kree en divizyon ki ti pe lalit kont prevansyon sibstans, tretman e reabilitasyon. E la zot deside pou retourn li anba APDAR pou vin en Lazans kont Labi Drog e Reabilitasyon.

E mwan petet ki mon ti a kontan konnen avek VP. Petet – ti annan en prononsyasyon parey zot konnen poudir i annan en sant ki ti pou ganny fer kot La Rivyer Anglez ti pou en *Day Care Center* pour bann pasyan ki lo labi sibstans.

So petet si ou dan ou konklizyon ou ti kapab donn nou en pe plis detay ler pou

annan kreasyon sa lazans li menm li, eski sa sant pou kontinyen ganny fer dan menm sit kot ti'n ganny dir, oubyen zot pe mazin bouz li dan en lot landrwa?

Akoz mon krwar zabitan i konsernen. I konsernen *regarding* sa. Pa selman aköz i pe ganny *build* dan distrik La Rivere Anglaise. Non, i pa sa rezon.

Akoz parey zot kapab war poudir *MAT Clinic* li menm li in deza pran en landrwa kot *Youth Health Center*, e sa ti letan ki APDAR ki ti la. E nou war poudir nou lazenes in perdi en sant ki – ankor enn fwa, mwan ki ti konman en *Peer Counsellor* sa letan, nou ti ankor pe servi li Mont Fleuri kot konmela i *Community Centre if i'm not mistaken*, pour Mont Fleuri. E nou, nou ti lager pour nou *build* en sant pour lazenes. E ozordi nou war sa sant pa pe ganny servi pour son *purpose*.

Eski zot pe mazin petet osi pou bouz sa *MAT Clinic* dan sa nouvo lokasyon, oubyen i pou annan en lot landrwa kot i pou ale?

E sa i anmenn mwan aköz mon mazinen poudir anler Mont Fleuri i annan en lot landrwa kot finalman zot in deside pou zot fer *headquarters*.

E pour en rezon ou en lot mon pa konnen aköz ki zot in deside pou zis fer zot *headquarters APDAR* sa letan apre ki in vin *DSAPTR*. E *still* i annan lespas laba. So, i enportan ki nou annan sa bann lenformasyon pour nou konnen kot nou pe ale.

Me selman parey mwan mon'n dir, drog i konsern nou tou. I konsern nou tou. Me selman ler nou pe koz lo drog, labi sibstans an zeneral Madanm Speaker.

Ou konnen, i depan kalite drog osi ki nou pe koze. Aköz nou konn tre byen poudir i annan serten drog ki vann dan farmasi, e sa i vre i bann drog ki pa pe kree bann lefe advers lo sitan kot nou war nou popilasyon i vin *addict* avek sa. Me mwan ler mon pe koz lo drog mon plizoumwèn koz lo bann *hard drugs* parey in ganny dir. Eroin, koka, *crystal meth*.

E in ganny dir osi Madanm Speaker, poudir *methadone*. Nou toultan ler nou koz *APDAR* oubyen *DSAPTR* nou mazin *methadone*. Me *methadone* i la pour li tret selman eroin parey in ganny dir.

Me nou war poudir i annan en *trend* la konmela dan nou popilasyon. Sirtou dan nou lazenes kot *crystal meth* avek

koka i pe *rise*. I pe *rise* e bokou nou bann lazenes pe servi sa. E in vin parey en stil mon kapab dir.

Malgre ki pa tou ki vin devan pou dir. Mwan mon pa krwar poudir sa statistik ki nou annan i *accurate*. Mon krwar i annan bokou plis.

Me selman mon pou salye zefor *LDS* ankor enn fwa si nou war poudir petet bokou plis zenn in vin lo tretman. I enportan pour nou remarke ki ler ki nou'n aboli *URS*, in ankouraz bokou zenn pour zot al dan bann lanplwa.

Aküz en keksoz ki nou bezwen mazin. Sa bann endividi zot bann papa, zot bann manman, zot bann –

MADAM SPEAKER

Si ou kapab fer ou konklizyon. Fer ou konklizyon Onorab.

HON ANDY LABONTE

Zot form parti en fanmir. Mon ava konklir Madanm Speaker. Me petet avan mon konklir, mon ti a zis kontan petet demann avek *VP*, ki pozisyon ou Gouvernman lo petet de kriminaliz kanabis pou fer li vin koman kapab ganny servi lo baz medisinal, ou menm petet menm lo kote rekreyasyonnel?

E se petet si ou pe mazin ou Gouvernman pou al lo – pou

fer *en referendum* lo la? So i enportan. Akoz yer ler mon ti demann ou lo *Health Crae Agency* ou pa'n reponn mwan. Petet sa enn i enportan ki ou reponn mwan.

Alor Madanm Speaker, avek sa 2 mo mon pou dir mon krwar nenport ki lazans ki pou ganny kree pour lalit kont drog avek lalkol, labi sibstans, nenport ki sibstans, mon krwar i enportan ki nou konman en pep nou solider e nou travay ansanm pour nou lalit kont sa. Mersi Madanm Speaker.

MADAM SPEAKER

Onorab David.

HON ROBERT DAVID

Mersi Madanm Speaker. Bonn apre midi Madanm Speaker e bonn apre midi tou Manm Onorab, e tou dimoun ki pe swiv travay Lasanble Nasyonal.

Bonn apre midi Vis-Prezidan ek ou lekip. E mon swet bonn apre midi osi tou bann zabitan Mont Buxton ki pe ekout nou.

Mosyon ki devan nou pe demann Lasanble Nasyonal pou aprouv *the Prevention of Drug Abuse and Rehabilitation Agency Bill, 2025*.

Sa *Bill* ti ganny pibliye dan Gazet le 1er Desanm 2025 avek lentansyon pou etabli en

lazans pou kordin aktivite bann lenstitisyon ki'n ganny mandate pou anpes labi drog ek lalkol, pou tret e reabilit bann dimoun ki'n adikt avek drog ek lalkol.

Sa *Bill* Madanm Speaker, i tre enportan pour nou pei. Sirtou dan sa moman letan ki nou ladan. Nouvo ladministrasyon in annan lodas pou inisye prosedir pou reabilit sa lazans. In annan nesesite pou annan Lalwa modern ki adres bann sityasyon ki kontinyelman sanze.

Lo paz 7 en kontra sosyal avek Lepep Seselwa, i fer resorti ki pou reetabli Lazans pour Prevansyon Labi Drog ek Reabilitasyon APDAR, atraver lezislasyon dan Bidze 2026 avek bi pou fasilite lentrodiksyon e zesyon bann program reabilitasyon.

Lobzektif prensipal sa *Bill* Madanm Speaker, se pou amelyor kordinasyon lo nivo nasyonal pou idantifye e adres lizaz drog, son danze e partaz lenformasyon lo bann lapros inovativ anver reaksyon efektiv.

Fonksyon prensipal sa lazans i pou konsey Gouvernman lo size prevansyon, tretman ek reabilitasyon lo labi drog ek lalkol. Lo son *Board* Madanm Speaker, pou annan en reprezantan sorti kot Lazans

Swen Lasante Mantal e en ansyen adikt drog ek lalkol.

Mon rekonnèt nesese pou annan en striktir byen kler ki asire ki tou provizyon dan sa *Bill* i ganny enplimante dan en fason efektiv. E bann personnel pou ganny ekipe avek zouti ek *training* nesese pou kapab delivre en standar servis ki piblik i egzize e ki a permet lobzektif sa lazans ganny akonplir.

An Desanm 2024 Madanm Speaker, en total 2mil998 kliyan ti akse servi sa divizyon. Dan ki 358 ti bann femel. Savedir, mazorite kliyan ki ti bann zonm e garson. Preski 2poursan nou popilasyon ki ti a kapab angaze aktivman dan aktivite ekonomik nou pei. En fason ki nou lekonomi ti a benefisye.

Yer Madanm Speaker, Vis-Prezidan ti enform Lasanble ki enn parmi 5 Seselwa in ganny afekte avek lasante mantal. Sa i reprezant 20poursan nou popilasyon. Ti enteresan etabli Madanm Speaker relasyon ant sa 2 size pou determin zot lefe lo kanmarad.

Madanm Speaker, i swe tou paran ki son zanfan i grandi an bonn sante, annan en bon ledikasyon e annan en bon travay e progrese dan lavi. Eski nou konn douler en paran ki

son zanfan in pri dan labi sibstans?

Madanm Speaker, i annan paran ki bezwen fer detruwa loubraz pou fer 2 bout zwenn. Zot manke pou kit en lizye lo zanfan. Ler zot al travay bomaten serten, zanfan i ankor pe dormi. Ler zot tournen aswar, zanfan pe dormi.

Konsekans Madanm Speaker, lemonn i pran kontrol lo vilnerabilite zot zanfan. Serten paran i soufer an silans. Serten i partaze. Me soufrans i reste soufrans. Labi drog ek lalkol i souvandfwa fini dan defayans dan lasante mantal en endividi.

Dapre Lorganizasyon Mondyal Lasante Madanm Speaker, lasante mantal i kapab ganny definir konman en leta mantal ki permet en endividi pou *cope* avek stres lavi. Realiz son abilite, aprann, travay byen e kontribye dan zot kominote.

I konpri son byennet sosyal, emosyonnel e psikolojik ki afekte ki mannyer nou santi. Dezyenmman, ki mannyer nou mazin. E trwazyenmman, ki mannyer nou akte.

Resours imen Madanm Speaker i reprezant en resours pli enportan dan nenport ki lorganizasyon. Me nou konman en pep nou devret sey tret sa

size tre seryezman. Risk ki en dimoun i servi drog i ogmante souvandfwa dan bann letan tranzisyon. Pour en adilt par egzantp, ler i perdi son lanplwa. Ler i fer fas avek difikilte lavi. Ouswa ler in perdi enn son fanmir ou en zanmi pros.

En adolesan par egzantp, ler i sanz lekol. Letan i annan difikilte dan son fanmir. *Peer pressure*. Ler i fer fas avek defi sosyal. Ler i santi ki si i pa servi sibstans, i pa pou ganny aksepte parmi son group zanmi.

Pran risk i form parti lavi en adolesan. Lanvi pou sey nouvo keksoz pou vin endepandan i ogmant zot risk e pou fer nouvo leksperyans, ki posibleman annan en lefe negativ lo zot lavi.

Parfwa son lefe Madanm Speaker i manifeste dan bann aksyon anti sosyal ki anmenn avek li konsekans advers lo son lasante. E sa i annan en lefe lo tou lede nou sekter nou sosyete. Sekter prive. Osi ki sekter piblik.

I annan en lenpak lo nou lafors travayer. I annan en lefe lo kalite servis. I annan lefe dan lekol. I annan lefe lo prodiktivite dan landrwa travay. I annan lefe lo prezervasyon nou kiltir Madanm Speaker. I annan lefe

lo stabilite lafanmir. I annan lefe dan nou kominote. I annan lefe lo nou lekonomi e osi lo zanfankonparan.

Ozordi, Gouvernman in war li nesaser pou anmenn sa *Bill* pou ede redres sa sityasyon e ede redwir demann pour drog ek lalkol. Sak dimoun i annan son prop bezwen e li i pou fer son prop desizyon. E sak desizyon Madanm Speaker, i annan son konsekans.

Nou, nou annan dezir pou protez sak Seselwa. Mon oule demann bann zenn pou reste lwen avek bann lenfliyans ki kapab annan en lefe negativ lo zot lasante mantal. Reste 100poursan lib. Reste 100poursan lib avek labi drog e reste 100poursan lib avek labi lalkol.

Dekouver akon zot in ganny kree. Dekouver zot potansyel e ankouraz kanmarad. Servi zot laliberte konman en zouti pou manifeste lanmour, lazwa, dinyite imen e bon fason fer.

Ladministrasyon *United Seychelles*, atraver sa *Bill* i kontinyen met son pe aker e toultan pe rod fason pou amelyor lavi e byennet son pep. En Gouvernman ki kontinyen envestir dan lasante son pep.

Madanm Speaker, i enportan ki nou konpar sa ki

konparab. Nou pa kapab konpar lasante en pep avek fer lakaz. Akoz nou pa kapab atas en valer finansyel avek lavi en imen.

Kreasyon en lazans ki gide ver sov lavi. Me pa en *job for the boys*. Mon mazin bann dimoun ki'n perdi lavi an rezilta *overdose* ek sibstans. Kouraz pour tou dimoun ki pe ganny afekte dan en fason direk ou endirek akoz labi drog ek lalkol.

Me pa dekouraze. Zot pa tousel dan sa demars. Mwan konman Manm Elekte pour distrik Mont Buxton mon pou donn tou mon sipor sa *Bill*

akoz i enportan e i reprezant lespwar pour bokou dimoun. Mersi Madanm Speaker.

(APPLAUSE)

MADAM SPEAKER

Mersi. Onorab Monthy. Onorab Romain.

HON GEORGES ROMAIN

Mersi Madanm Speaker. Bonn apre midi Madanm Speaker. Bonn apre midi tou koleg Onorab. E bonn apre midi *VP* avek ou koleg.

Madanm Speaker, mon pou konmans mon lentervansyon par dir ki size drog i enn parmi bann pli gro

defi ki nou pei pe fer fas avek ozordi.

E pour mwan, sa size i pa enn pour nou fer politik avek akoz i en size nasyonal ki pe adres en problem ki grav e ki pe afekte nou bann zenn. Pe afekte prodiktivite dan nou pei e pe anmenn avek li bokou bann problem sosyal ki pe afekte bokou fanmir dan nou kominote.

Madanm Speaker, tou bann sif ki sorti kot Minister Lasante i montre larealite sityasyon drog dan nou pei, ki wi i annan en problem drog e adiksyon dan nou pei. E statistik pe demontre ki plis ki 2mil900 dimoun in vin rod led dan bann Program Tretman e Reabilitasyon zis dan lannen 2024.

Sa i bann statistik ki demontre ki sa problem i ase grav. E pe osi montre nou ki problem drog i ankor pe persiste e nou bezwen alor en plandaksyon ki serye, ki organize e byen kordinen ant diferan sektor nasyonal pour nou kapab adres sa problem.

Madanm Speaker, sa *Bill* pe propoze pou re kree sa Lazans *APDAR* ki selon zot pou annan en sel responsabilite, kordinasyon, donn direksyon e diriz bann zefor prevansyon

tretman e reabilitasyon dan nou pei.

Me annou *note* en keksoz tre enportan. Sa travay pe deza ganny fer ozordi par en departman spesifik anba Minister Lasante. I annan bann profesyonnel laba. I annan bann program e bann mekanizm ki'n deza etabli e ki fonksyonnel.

Wi Madanm Speaker, nou tou nou dakor ki sa travay i kapab entansifye, amelyore e ganny plis kapasite. Me keksoz fondamantal se akòz sa i nesesit kreasyon en nouvo lazans? Eski nou'n eksplor byen si nou pa kapab ranforsi sa ki deza egziste, olye kree en lot striktir e en lot nouvo administrasyon?

Si nou pe dir ki nou pe dil avek en problem nasyonal, mon konpran rezonman ki i bezwen plis latansyon. Mon dakor ek sa, me nou bezwen osi asire ki solisyon i efikas e pa zis senbolik.

En nouvo lazans pa vadir en nouvo rezilta. Parfwa i vadir plis depans, plis dimoun pou ranpli pozisyon e mwens resours pour bann dimoun ki pe fer travay lo teren.

Alors, wi Madanm Speaker, mon kontan diskisyon pou ranforsi zefor ki viz anver prevansyon ek tretman. Me

mon pa osi persyade ki en nouvo lazans i solisyon obligatwar, ler i annan en striktir ki deza egziste e ki zis bezwen kapasite resours ek bon direksyon.

Madanm Speaker, en keksoz ki mon apresye dan sa *Bill* se lide ki lazans pou annan en *Board* avek reprezantasyon plizyer sektor kle. Lasante, Sosyal, zenn, *CEPS*. E menm en ansyen adikt.

Sa i en bon direksyon akòz nou tou nou konnen ki drog pa zis en size medikal. I osi en size sosyal e i konsern zenn, fanmir, lekòl e tou kominote.

Me Madanm Speaker, nou bezwen fer sir ki nou pa konfiz annan lapros miltisektoryal avek kreasyon en nouvo lazans. Wi, nou bezwen plizyer sektor otour menm latab. Me i posib pou fer sa par ranforsi sa striktir ki deza egziste dan Minister Lasante san bezwen met en *Board* antye nouvo.

Me en striktir miltisektoryal kot Lasante, Sosyal, zenn, *CEPS* e lezot pe met zot zepòl ansanm i kapab egziste. Menm si travay i reste dan en departman spesifik.

E la Madanm Speaker, mon espere ki proses pou rod travayer pou vin travay dan sa nouvo lazans ki zot anvi kree, pa ganny politize. E ki bann

dimoun ki ganny sa bann travay i bann dimoun ki'n ganny swazir baze lo merit e non pa akòz zot siport en serten parti politik.

E la Madanm Speaker, mon osi oule met lo rikòd ki Gouvènmàn LDS in fer bokou pandan sa dernyen 5an pou konbat sa lalit kont drog. E sa i en keksoz ki nou pa kapab oubliye.

Nou'n vwar bokou bato ki ti'n ganny entersepte dan nou lanmer. Kantite lopeyasyon ki'n ganny fer dan bann landrwa stratejik e bokou drog ki'n ganny konfiske. E zefor pa ti zis limite lo delo. Menm dan nou por ek erport. Nou'n vwar bann striktir ki ti'n ganny ranforsi e bokou trafiker ki'n ganny arete.

Madanm Speaker, i enportan osi pou note ki dan enn bann ka pli difisil, lotorite in menm kapab sov lavi en zenn ki ti pe ganny met koman garanti lo en dav ki ti pe kit Sesel.

Alor, i kler ki Gouvènmàn LDS in osi fer en travay serye pou protez nou pei ek nou sitwayen. E sa zefor i merit ganny rekonnet.

Me Madanm Speaker, size drog li menm pa'n reste statik. In evolye avek letan. Nou'n vwar bann nouvo drog sentetik ki'n rantre dan pei. E nou'n osi vwar

ki bann trafiker pe servi teknolozi modern pou fer zot aktivite vin pli sofistike.

Alor wi Madanm Speaker, i kler ki nou bezwen moderniz nou lapros, met plis kapasite, plis analiz, plis kordinasyon. E dan sa sans, mon pou pran rezonnmàn pou rod en striktir ki kapab reponn a sa nouvo realite.

Me sa pa otomatikman vèdir ki solisyon se kree en nouvo lazans. Parey mon'n dir, travay pe deza ganny fer dan Minister Lasante e i kapab ganny ranforsi e modernize.

Alor Madanm Speaker, mon pou siport sa ranforsisman nou zefor dan nou lalit kont drog. Me pa neseserman donn nou resours ki'n deza limite pou al kree en lazans. Akòz drog i konsèrn lavi nou sitwayen e sekirite nou sosyete, e i enportan pour nou adres li byen.

Me Madanm Speaker, avan mon terminen, mon osi oule fer resorti en pwen ki mon krwar i enportan pour nou pei.

Bann dimoun ki pe viv avek depandans lo drog, zot parmi bann sitwayen ki vilnerab. Zot pe lite pour zot lavi, pour zot lasante e pour zot fanmir. E se pour sa rezon Madanm Speaker, ki zot pa devret zanmen ganny servi dan

okenn fason konman bann zouti politik.

In annan moman dan lepase, sirtou dan bann kanpanny eleksyon dernyerman kot serten parti politik in profit lo zot febles.

Zot in ganny ofer larzan e servi zot pou tir portre pou fer kanpanny politik avek. Menm zot kart idantite ti ganny pran avek zot. Sa kalite pratik Madanm Speaker, i mal. I degrad dinyite sa bann dimoun e i afeblir nou demokrasi.

Nou pa devret zanmen profite lo febles okenn Seselwa pou fer politik. O kontrè, nou merit rod fason pou ed zot re ganny zot dinyite ek zot lendepandans pour zot kontribye dan nou pei. Mersi Madanm Speaker.

(APPLAUSE)

MADAM SPEAKER

Onorab Athanase.

HON KENETH ATHANASE

Mersi Madanm Speaker. Bonn apre midi Madanm Speaker. Bonn apre midi VP. E bonn apre midi tou bann manm ki pe ekoute. E osi tou bann Manm Onorab.

Madanm Speaker, ozordi konman reprezantan Perseverance, mon eksprim

mon sipor pour sa *Bill* ki devan nou. Sa Lalwa pa zis lo politik. I lo dimoun, lo lafanmir ek lavenir nou pei.

Perseverance i en distrik ranpli avek lespwar ek lanbisyon. Me parey bokou kominote, nou'n war nou – nou'n war soufrans silans ladiksyon. Zenn ki'n perdi lavi. Paran pe lager. Fanmir kase.

Deryer sak sif i annan en figir, en non, en zistwar. Sa *Bill* i donn nou kad pou reponn avek konpasyon ek lorganizasyon. Pa avek zizman ek neglizans.

Sa Lalwa in kree en lorganizasyon dedye avek pouvwar pou kordin prevansyon, tretman ek reabilitasyon.

I pou met standar nasyonal pour sant tretman. Asir responsabilite atraver raport obligatwar e pouvwar pou fer respekte Lalwa.

Tro bokou keksoz pa ti kler. Sa *Bill* in anmenn konsistans ek direksyon pou en defi ki tous sak kwen Sesel. Respe ek dinyite pasyan.

Annou koz fran. Ladiksyon pa en krim. I en maladi. Bann ki pe soufer pa zis en statistik. Zot bann zanfman, manman e papa, ser e frer. Zot merit en plas pre kot zot fanmir. Zot bezwen akse ek medikaman

dan landrwa konvenab e aksesib. Zot merit respe ek dinyite. Non pa kritik.

Madanm Speaker, dan Perseverance mon'n rankontre fanmir ki santi zot abandonnen aköz tretman i difisil pou gannnen. Sa i bezwen sanze.

Sa *Bill* i pa – sa *Bill* i en premye pa devan pou anmenn servis pli pre avek kominote. Aprann sorti dan pase. Nou pa kapab inyor listwar. Ti annan en letan kot administrasyon avan ti demont *APDAR* pretann fer ekonomik e rann keksoz pli senp.

Nou tou nou rapel sa diskour. Menm propozisyon ki pasyan ti kapab aret tretman net. Sa lapros ti iresponsab ek san leker. Sa ki ti propoz sa pa ti konpran konpleksite adiksyon. Ti napa leker pour tou son zanfan.

Ozordi anba direksyon Prezidan Dr Patrick Herminie, nou pe reetablir sa ki ti'n perdi e konstrir en keksoz pli for. Sa *Bill* i montre en Gouvernman ki pran swen pour sak Seselwa, nou vizyon pour Sesel e Perseverance.

Sa lorganizasyon pa pou travay tousel. I pou fer partenarya avek servis lasante pour swen entegre. Lekol ou prevansyon ek ledikasyon. Lapolis pou konbat trafikier.

Sa i en lapros nasyonal, parski ladiksyon pa zis en kestyon lasante. I en defi nasyonal ek ekonomik ki demann linite nasyonal. En lapel pour aksyon.

Bann Manm Onorab, sa i nou moman pou azir. Anou pas sa *Bill* e anvoy en mesaz kler. Sesel pran swen. Sesel ini. Sesel krwar dan dezyenm sans.

Pour sak pasyan ki pe ekoute, ou pa'n ganny oubliye. *United Seychelles* pou delivre. Led pe vini. Pa zis dan parol, me dan lorganizasyon standar ek servis ki pou marse.

Madanm Speaker, avan mon terminen, mon dir mersi pour tou sa bann ki pe ekoute. e pas en bon lazournen. Mersi.

(APPLAUSE)

MADAM SPEAKER

Onorab Valdana Sultan.

HON VALDANA SULTAN

Mersi Madanm Speaker. Bonn apre midi Madanm Speaker. Bonn apre midi VP, e Mr Hill, e tou bann koleg dan Lasanble, tou dimoun a lekout.

Madan Speaker ozordi pas lazournen antye nou pe debat lo en *Bill*, en Prozedlwa pou prevansyon *Prevention of Drugs Abuse and Rehabilitation Agency Bill*, 2025.

Madanm Speaker, mon aksepte ki problemn drog i en menas grav dan nou sosyete, aköz i detri lavi, i detri lavenir bann zenn, i afeblir fanmir, e i met presyon lo nou sistenm lasante ek sekirite.

Me letan ki nou pe koz lo drog se nou pran li dan en konteks en pe pli global. Nou bezwen mazin drog koman en sibstans ki annan en lefe psikolojik letan nou'n pran li.

Alor mon mazine ki nou pa pou kapab koz zis lo sa ki nou tou nou pe *referral* a koman drog, bann *hard drugs* byen petet menm kanabis, me nou bezwen mazin osi lo lalkol.

Madanm Speaker, drog wi i vremen afekte nou i en gran menas pour nou pei, e pour nenport ki pei nenport ki sosyete.

Me lalkol i osi annan son gran, i anmenn son gran lenpak, aköz lalkol li i en drog ki legal i la nenport ki i kapab aste, nou konnen pou dir ozordi dan laboutik nou war bokou bann lalkol avek bann poursantaz tre o, ki nou konnen pou dir son lenpak i ogmant nou *blood alcohol *consumption, concentration*. Sorry.

Ki i fer ki nou pou ganny afekte pli vit ki enn ki poursantaz i pli ba, fasil pour nou al dan *overdose*, fasil pou

afekte nou zizman, nou kordinasyon, e petet pli grav a lonterm afekte nou bann *organ*.

Tel ki nou leker, pankreas oubyen menm nou lefwa. An zeneral i pou afekte nou *whole being*. Madanm Speaker, an retourn an lo *Bill*.

Parey Onorab Bernard Georges, in mansyonnen bomaten nou war ki pou sorti kot bann travayer pou al kot Prezidan i annan en pe peron pour nou ariv laba, e petet mon mazine mon osi pou dir sa i en pti pe tro bokou a mon avi.

E ki petet sa pa pou permet li koman sa dimoun ki pe diriz sa lazans pour li annan en lizye direk a tou moman lo lazans. Alor, ou mazine petet taler *VP*, a kapab donn nou en pti pe plis detay lo sa bout.

Madanm Speaker, dan *clause* (5) *subsection* (3) i koz lo fason ki bann lenstitisyon ek lorganizasyon ki ganny fonde par lazans pou rann kont atraver en *quarterly report*, e sa ki *fail* i pa fer li posib pour li kapab kontinyen ganny finansman avek lazans.

Sa i tre byen, mon mazine ki sa pou osi aplikab pour lazans li menm *APDAR* li menm koman lazans, aköz si nou napa en bon *oversight* i pou zis parey nou pe donn lazans en *blank check* lo larzan piblik.

Madanm Speaker, ler mon osi get konpozisyon *board* nou vwar ki miltisektoriyal i annan plizyer bann bout parey *Health, Social Affairs, Citizen Engagement Platform, National Youth Council*, ki form par.

E ladan nou osi annan en *former drug and alcohol addict*, sa i byen. I pou byen si sa dimoun ki definitivman fot i arive nou pa konnen, i pou byen si sa dimoun ki ganny swazir koman sa *former drug or alcohol addict* mon pa konnen ki kriter ki pou ganny servi pour nou kapab idantifye sa enn dimoun *among* tou sa lezot.

Me selman i tre byen pour nou annan enn sa dimoun lo sa *Board*. Akoz Madanm Speaker, mwan mon a kapab koz lo ki fason mon'n sorti dan adiksyon kafe, mon pa pou kapab koz lo ki mannyer mon'n sorti dan adiksyon drog ni lalkol aköz mon napa leksperyans. Mon pou kapab koz lo leksperyans kafe sa wi.

Alor i byen ki nou pe anmenn leksperyans en dimoun, aköz parfwa i vin koman en led pour sa bann ki pe pas atraver sa pour zot kapab annan bann vre legzanp, e sa i a vin- i a osi vin en led en lankourazman ler zot pou vwar pou dir io annan enn ki'n pas

ladan e ki'n sorti, e sa i a en lankourazman pour zot.

E an termin an Madanm Speaker, mon anvi petet adres bann trafiker ek konsonmater letan ki bann trafiker zot, zot pe ganny zot larises zot pe fer zot gro biznes, e zot pe akimil larises.

I annan nou pep la deor, i annan bann fanmir la deor ki pe soufer aköz depandans lo sa drog ki zot, zot pe met a laporte sa bann dimoun.

E pour mwan Madanm Speaker, mon mazine pou dir en keksoz ki petet in vin enn major *achievement* Gouvernman *LDS*, se ki in komet en Bidze 65 milyon pour *Youth Hope Centre Bonne Espoir*.

Aküz sa i en day programme, e residential pou reabilit bann zanfan ki dan bann aktivite anti sosyal parey nou dir *anti-social behaviour*, aköz i sa bann zenn ki ozordi nou war zot dan sa bann aktivite ki si nou pa ankadre zot, nou pa anmas zot boner i sa menm sa bann ki pou sap nou, ki petet pli tar nou pou war zot pe al dan bann adiksyon ki prezan i pou al azout ankor lo nou bann dimoun ki nou pe re fer lo la koman bann pasyan pour *APDAR*.

E mon mazinen petet VP, i a kapab koz en pe lo la ki mannyer nou pou kontinyen, e mon krwar progre pe al byen lo sa sant. E pour mwan sa i en lakonplisman *at least* ki LDS, li in war pou dir nou bezwen komans anmas zot boner.

Wi, nou tret bann dimoun ki deza enfekte, me pre sa osi i ganny gete koman en prevansyon pour nou annan sa sant, e sa pour mwan i tre byen.

Alor Madanm Speaker, pour bann trafiker sa menm pei ki zot osi zot viv ladan, sa menm pei ki zot fanmir zot pros i viv ladan i sa menm sa pei ki ler nou trafike nou pe fer soufer finansyelman sa menm sa pei, akoz nou bezwen rod larzan pou investir pour nou kapab redres bann ki'n afekte, ed zot leve pour ki nou pei i annan en lafors travayer.

Pli boner mon'n tann dir poudir i annan nou bezwen kantmenm nou pe dir pa fer politik avek sa size, ki mon krwar nou pa devret. Mon'n tann nou bezwen annan en volante politik, wi.

Me selman fodre pa ki sa lazans i ganny politize, wi nou bezwen volante politik pou fer li marse. Me fodre pa ki sa lazans i ganny politize. Mersi Madanm Speaker.

(APPLAUSE)

MADAM SPEAKER

Mersi Onorab. I reste mon zis de enterven an lo mon lalis. Onorab Loze, avek Onorab Lemiel. Onorab Loze.

HON JOHAN LOZE

Mersi Madanm Speaker. Bonn apre midi tou Manm Onorab koleg. Bonn apre midi Vis Prezidan, *panel* avek *panel*. Bonn apre midi toulmonn a lekout.

Madanm Speaker, lo zournal Nasyon le 3 Desanm 2019, i annan en lartik entitle *National Drug Control Master Plan, state of the Art Drug Rehabilitation Centre to be built at Bonne Espoir*.

Now, sa lartik i enteresan akoz i annan en zoli portre devan. mon pou nonm zot kat dimoun ki dan sa portre. Byen devan menm ou annan Dokter Patrick Herminie, byen *tall*, obor li Prezidan Danny Roland Faure, swivi par *Minister Macsuzy Modon* apre mon sot en dimoun mon zwenn *Minister Mitcy Larue*, i fer mwan kat dimoun la ant *Minister Mitcy Larue*, ek *Minister Macsuzy Mondon*, i annan en lot dimoun mon entrodwi en senkyenm *Leader Lopoziyon at the time Prezidan Wavel Ramkalawan*.

Now, sa lartik i kontinyen pou dir nou pou dir pou annan konstriksyon en vilaz reabilitasyon, “*the construction of the village which has been downsize from it’s original plan will amount to 50 million and 25 million have already been allocated and approved by the National Assembly as a grant into the 2020, National Budget.*”

Now, nou tou nu konnen ki ti arive 2020. 2020, COVID. COVID, ti frap nou paraliz nou, e paraliz nou pei. So, ti napa konstriksyon.

2020, ti osi annan eleksyon ki ti ganny raporte par LDS, prezan si ou desann en pti pe pli ba dan sa lartik ou tonm lo en bout mon krwar kot zot in koz avek Mr Ramkalawan. “*He also welcomed the construction of the rehabilitation village to treat person’s affected by drugs.*”

I ti *welcome* sa vilaz ki ti pou al build Bonne Espoir, i ti ankor *Leader* Lopoziyon la. I ti *welcome* en zouti travay, i ti *attend* sa sesyon kot ti lans sa master plan, i ti tonm dakor.

Apre in ganny elekte Prezidan, apre in scrap sa vilaz li, i pa’n fer. Prezan Madanm Speaker, ozordi mon tann zot vini demann nou, “*be oli vilaz? Oli rehab?*”

Konmsi zot dir nou APDAR in *fail*, nou’n ganny dir taler mon ti tandé mwan. Mon annan de zorey parey nou tou, nou’n ganny dir APDAR in *fail* enn bann keksoz ki’n *fail*, i ti pou konstrir en *rehab*, i pa’n fer.

Bon, *rehab* ti pou fer 2020. 2020, COVID in vini nou pa’n kapab. Apre zot, zot in pran pouvwar, e zot ler zot in pran pouvwar zot in deside pa fer. So, APDAR ki’n *fail* pa zot, APDAR, aköz zot konsider sa en *failure* zot pa’n fer.

Selman zot ki’n deside pa fer. Ok, i en *failure* zot in deside pa fer i en *failure*. Madanm Speaker, si i annan en Manm Lasanble Nasyonal ki nou kapab konsider li koman en *gold standard* pou koz lo sa size drog sa se Onorab Speaker Nichola Prea.

Mon krwar tou Manm ki ti prezan dan Lasanble sa letan, i ava rapel i ti koz lo sa size ziska tou son vilnerabilite ti sorti ti mont lo sirfas son de larm ti koule.

Si i annan en dimoun ki nou kapab dir i *gold standard* Lasanble Nasyonal pou koz lo sa size i Onorab Nichola Prea. E se sa legzanp ki nou ti’n devret pran, se sa direksyon ki nou ti’n devret ale nou tou.

Be i annan in vin donn leson, i annan in vin donn

lektir, i annan in vin dir ki pou fer, i annan in vin konte konbyen S.S i annan, konbyen Minis i annan, konbyen Direkter i annan, konbyen P.S i annan dan Gouvernman kan nou annan en Lalwa devan nou ki pe koz lo letablisman en lazans prevansyon labi drog.

Bon bann dimoun Oktob 2020, apre 30an ki zot in lager lo en platform sanzman Parti Seselwa *alias* LDS, ti ganny elekte lo son *platform* sanzman.

Zot ti gannyen elekte, i pa lontan sa i zis 5an pase. Zot ti ganny elekte lo zot *platform* sanzman ki zot menm zot a en serten pwen zot ti deside vini dir, “ar non, i pa sanzman i transformasyon.” Sepa transman dirin.

A en serten pwen in nepli transformasyon, in reform. Be zot ti ganny elekte lo la, e se sa ki zot in fer. Zot in fer sanzman, transformasyon, reform, transman dirin.

Be Seselwa in pas en zizman lo tou sa ki zot in fer dan sa dernyen 5an, e zizman ti dan dernyen eleksyon. Prezan zot pa kapab zis vini asiz la anndan dir nou, “nou anvi efas sa ki'n pase dan sa dernyen 5an.”

Be pa nou, Lepep Seselwa, pa nou. si Lepep Seselwa ti'n kontan, ti'n anmoure, ti'n sitan *enamored* avek zot. Be zot ti pou

pe asiz la zot, e laba ti pou vid parey Onorab Bernard Georges, ti dir nou, “nou pou ale nou tou ver sis zero.”

Be ti pou vid laba ti pou napa personn, ti pou annan zis zot. Anndan la kote isi ti pou plen, ti pou en zwazo en kote lezel sa Lasanble.

Be *since* zot, zot laba nou, nou la Seselwa in pas en desizyon ki sa transformasyon ki zot in anmennen la ogmant pri bis, Seselwa pa ti demann zot sa li.

Sa bann keksoz ki zot, zot in anmennen la sa leksplozyon pri komodite lo *shelf* STC, Seselwa pa ti demann zot tousala li.

Zot in anmenn zot enn bann badinaz pandan letan ki zot Prezidan ti pe fer *cabin crew* lo *Emirates*, e Seselwa in pran en desizyon lo la zot bann polisi *cabin crew*. Be mwan mon krwar nou ti'n devret *stick to gold standard*-

(Interruptions)

(Off-Mic)

HON JOHAN LOZE

Mersi Madanm Speaker. Mersi Onorab Trevor Louise, pou pret mwan ou mikro. Mon tann Onorab Georges, pe dir *micro* i konplent. Be granmersi,

granmersi Onorab Georges, parski ou ler ou koze Sesel antye i reste silans personn pa enterese *at least* mon *micro* i konplent.

Madanm Speaker, ozordi la anndan dan plas *stick to sa gold standard* Onorab Prea, nou annan dimoun i vini i vin dir nou poudir li, “in organiz en lazans espyon lo Praslin, in swiv dimoun depi Baie St Anne ziska Grande Anse, in swiv dimoun lo bato avek en gouni rouz pe aste *vote* ek drog pe isi, pe laba.”

Madanm Speaker, *can you imagine* zefor lorganizasyon ki sa boug in bezwen fer? sa nivo *spy*, be i pli move ki Mr Benediste Hoareau, ler mon pe get li.

(laughter)

HON JOHAN LOZE

Be prezan Madanm Speaker, apre tous a zefor i ganny bate par 397 *vote* 397 *vote*. Onorab Grandcourt, i ganny 55poursan li ganny 38.7poursan i al dormi, en boug ki pa le mars apye i retournen lo en tiket *rebate* i vin dir nou ki fer dan Lasanble Nasyonal.

Donn li en *Bill* pou koz lo la i pa kapab i vin rod nou aste *vote* dan bwat *takeaway* sepa kisisa. Madanm Speaker,

mon’n lev sa aköz i annan en keksoz mon le dir mon.

Mon’n *involve* dan sa en dernyen eleksyon parey tou dimoun ki’n travay ek eleksyon, mon’n okouran zis en konplent ofisyel aste *vote* pran Kart Idantite.

I annan en msye ti raporte, e sa i lo lokirans dan stasyon *vote* Grande Anse konm kwa Onorab William, ti’n pran son Kard Idantite. Sa i ofisyel sa, sa mon konnen, sa ki sa *master spy CIA* laba pe dir.

MADAM SPEAKER

Onorab, ankor en minit.

HON JOHAN LOZE

Mon pa konnen. Mon pou servi mon minit tre byen Madanm Speaker, e mon pou dir en keksoz klerman. Seselwa in pran en desizyon, Seselwa in pran en desizyon lo zot e lo zot fason fer, e zot bann move pratik fer.

Ozordi en boug ki’n ganny met deor i vini i pe dir nou koumsa li i pa *trust United Seychelles*. Be Onorab, Seselwa in fini dir ou i pa trust ou, ou parmi sa kat boug ki pa le mars apye ki’n ganny four a laport. Mersi Madanm Speaker.

MADAM SPEAKER

Onorab Lemiel.

HON SYLVANNE LEMIEL

Mersi Madanm Speaker, bonn apre midi Madanm Speaker, tou koleg Manm Onorab, VP, Mr Hill, e tou dimoun ki a lekout. Madanm Speaker, enstan. Madanm Speaker, koleg Manm Onorab, VP, Mr Hill, e tou dimoun a lekout bonn apre midi.

Madanm Speaker, ozordi nou pe debat lo *Bill* numero 25 pour lannen 2025, ki annan pou tit *Prevention of Drug Abuse and Rehabilitation Bill*, anmennen pas Vis Prezidan Mr Sebastien Pillay.

Madanm Speaker, ansyen lazans pour Prevansyon Labi Drog e Reabilitasyon, ti zwe en rol tre enportan isi Sesel. Dan repons kont lepidemi drog atraver entervansyon byen kordinen baze lo laprev, e kot zot ti annan bokou konsantrasyon dan kominote.

Madman Speaker, mon ti a kontan fer resorti ki mon lentervansyon li menm i baze lo bann fe ki bann dimoun ki'n travay avek sa lazans ki letan sa lazans ti pe vini, mon'n annan en serten enteraksyon ek zot e sa i bann lenformasyon ki mon'n *gather* mon kapab dir avek zot, ki mon pou pe fer sorti serten ozordi dan mon lentervansyon.

Bon, fermtir *APDAR* li menm ek transformasyon dan en divizyon mon'n ganny dir ki ti'n kree bann vid dan kordinasyon nasyonal, dan ranmas lenformasyon oubyen data, e osi libre son servis pli byen kordinen.

Nouvo Lalwa pour lazans pour Prevansyon Labi Drog ek Reabilitasyon pe rod re etabli, e ranforsi sa bann fonksyon esansyel par moderniz repons nasyonal kont lilitizasyon drog, rediksyon risk, e reabilitasyon.

Bann realizasyon e lenpak ansyen *APDAR* ti enkli, ou fer bann servis desantralize, anmenn prevansyon oubyen i annan osi *referral* pour tretman ki ti ganny fer, e program *harm reduction* direktman dan bann kominote.

Bann lekip *outreach* ti donn konsey, anmenn sipor pou fanmir ki ti permet fanmir pou pli byen fer fas avek defi adiksyon, pli enportan *APDAR* ti fer bann tes rapid pour *HIV* ek Epatit C.

Sa ti enportan pour bann dimoun ki ti ezite pour zot al *CDCU* aköz lafreyer stigma, oubyen move leksperyans ki zot ti'n sibir dan letan petet ki zot in deza al en fwa de fwa, zot santi ki zot in sibir serten stigmatizasyon.

Alors, sa bann tes ki sa bann dimoun kot *APDAR* ti fer ti vreman enportan e byen. Plizyer dimoun ti fini zot tretman avek sikse, anrezistre bon rezilta lasante, e re entegre byen dan sosyete.

Dimoun ki ti'n rekipere ti zwe en rol direk dan loperasyon lazans, bann adikt ki ti'n rekipere ti menm kontribye dan redaksyon, e lenplimantasyon program e menm anmenn plis kontribisyon dan zot kominote.

APDAR ti annan en lafors travayer tre devoue, byen formen, e spesyalize. Me apre ki *APDAR* ti fermen enstabilite dan staff ti koz en gran *turn over*, e pert leksperyans enstitisyonnel.

Madanm Speaker, dapre *CDCU* entervansyon *APDAR* ti fer en rediksyon sinifikatif dan bann lenfeksyon *HIV* e *Epatitis C*, parmi bann dimoun ki ti pik drog.

Needle and Syringe Programme ki zot dir sa *NSP*, ti tre enportan dan realizasyon, e ti vin enn parmi bann stratezi rediksyon risk pli efikas dan listwar Sesel.

Desantralizasyon bann tes rapid ti osi amelyor deteksyon maladi boner anpes deteryorasyon lasante parmi bann ki ti'n ganny afekte.

Needle and Syringe Programme, ti fer plis ki redwi

lenfeksyon, i ti osi revel febles dan bann rezo distribisyon drog, ti osi annan rediksyon dan krim, an relasyon avek drog.

Rikord *Lapolis* pandan lepok *APDAR* ti montre en base dan lofans ki relye avek drog soutenir par divers program ki ti gard bann dimoun vilnerab an deor sistenm lazistis kriminel, e konekte zot avek tretman.

Madanm Speaker, *APDAR* ti promouvwar bann pratik baze lo laprev enkli bann aktivite resers tel ki *Integrated Biological and Behavioural Survey* ki zot dir sa *IBDS*, ki ti fer an 2017.

E sa resers ti fer resorti ki 10poursan popilasyon travay ti servi drog, e dekouver- e en dekouver kritik ki ti ede pou form en polisi nasyonal, en letid dan prizon pandan lepok *APDAR* ti donn fondasyon pou entrodwi program *methadone* dan prizon, rekonnet gran prevalans lo depandans *opioid* parmi bann prizonnyen, e osi sa bezwen pour kontinite bann swen dan prizon.

Dan lafen 2019 e komansman 2020, bann lekip *outrreach* *APDAR* ti idantifye nouvo sibstans siko aktif, oubyen *psycho active substance* dan Mahe ek Praslin.

Sa bann avertisman pa ti ganny pran kont par ansyen administrasyon, sa bann menm sibstans ti re aparet resaman, e ki kapab annan lyen avek lanmor siskepte an relasyon avek drog. Sa i montre nesessite pou en lazans ki pou *responsive* e annan ase resours.

Madman Speaker, pandan lepok APDAR, Lapolis ti dokimant bann ka kot bann zenn Seselwa ti ganny trafike dan pei etranze tel ki Iran koman garan pour *debt* drog plizyer viktim i ankor laba aletranze bloke dan bann rezo kriminel.

Sa i montre ki program drog Sesel pa zis en konsern lasante piblik, me osi en konsern sekirite nasyonal e trafik imen.

Madanm Speaker, desizyon pou *downgrade* APDAR dan en divizyon ti afebli kapasite ek kordinasyon nasyonal, plizyer lespas tre kritik ti aparet, tel ki mankman statistik ofisyel lo lanmor an relasyon avek drog.

Madanm Speaker, lanmor relasyon avek drog pe ganny klase- pa ganny klase separeman, souvan in ganny anrezistre anba lot sentonm.

Sa in fer ki bann rapor nasyonal, bann konparezon enternasyonal, e bann polisi

baze lo levidans pa'n egzakt. Nouvo lazans pou ferm sa vid atraver resers striktire, anmas, e analiz bann data, me fer bann rapor formel, leksperyans APDAR ti konfirman ki napa en sel model reabilitasyon ki adapte pour tou dimoun. Tretman i bezwen reflekte sirkonstans endividyel kalite drog ki i servi, bezwen lasante mantal, e realite sosyoekonomik.

Nouvo Lalwa pou donn lazans pouvwar pou defini, regle, e *monitor* standar nasyonal pour tretman ek reabilitasyon.

Apré disolisyon APDAR prevansyon drog, *enforcement* osi, reabilitasyon ek rediksyon risk ti disperse atraver Minister, NGO's, e osi program ki pa alinyen.

Nouvo Lalwa pou re etabli en lotorite santral pou asir pli bon kordinasyon avek bann diferan partener, anmenn konsistans e partaz data, e anmenn en direksyon nasyonal ki inifye.

Ozordi nou pe vwar ki rezo distribisyon drog pe vin pli konplike, bann group kriminel konmela pe servi *market online*, kominikasyon ki ankripte, sistenm postal avek kourye, e osi bann nouvo teknolozi ki de zour an zour nou pe vwar

diferan kalite, e la nou annan AI, osi.

Alors, en lazans spesyalize i neser pou monitor, detekte, e reponn avek sa bann *method* distribisyon ki pe evolye, sa Lalwa i klerman defini bann lobzektif ki pou reponn direkteman avek bann lesan istorik, oubyen le pase, e menas aktyel.

Avek laprouvasyon sa *Bill APDAR* pou amelyor kordinasyon nasyonal pou adres lilizasyon drog ek son bann danze oubyen risk i a fasilite langazman, e partisipasyon kominote dan zefor prevansyon, ranforsi koleksyon lenformasyon oubyen data, resers, e pran desizyon baze lo levidans.

Zot a osi devlop bann program prevansyon, inovativ, e vin avek diferan stratezi oubyen *method* tretman pour bann adikt, ede redwi lekspozisyon bann zenn avek bann drog ilegal, tel ki lalkol, e bann medikaman ki ganny preskri, reglemant, e met restriksyon lo disponibilite bann sibstans danzere, reponn a bann nouvo fason distribisyon enkli trafik lo rezo sosyal oubyen *internet*, e osi atraver servis postal.

Amelyor fason partaz lenformasyon, lentelizans pou

identifye e reponn a bann nouvo tandans ki pe imerze, redwi ban konsekans lasante, sosyal, ek ekonomik ki asosye avek lilizasyon sibstans atraver bann *method* rediksyon risk oubyen *harm reduction*.

Lazans pou ganny pouvwar pou konsey Gouvernman lo prevansyon tretman, rediksyon risk, e reabilitasyon, formil e reviz sa *National Drug Master Plan*, e *National Alcohol Policy*. Definir, e *monitor* standar nasyonal pour tretman, prevansyon, ek reabilitasyon.

Kordin rapor sorti kot bann lorganizasyon ki ganny finansman Gouvernman, gard en *database* lo statistik nasyonal lo drog ek lalkol, prepar rapor progre nasyonal pou Prezidan.

Madanm Speaker, ansyen APDAR ti montre ki bann stratezi byen kordinen baze lo levidans, e *community driven strategies* ti marse. Lenfeksyon ti redwi, krim ti'n desann, patern trafik ti ganny revele, fanmir ti ganny *life changing support*, dimoun ki servi drog ti ganny re entegre dan sosyete.

Me *landscape* drog in evolye, ozordi nou pe fer fas avek nouvo sibstans, nouvo distribisyon, risk dan logmantasyon trafik imen,

ogmantasyon dan lanmor sispekte, mankman *data, service delivery* ki dan diferan landrwa.

Madanm Speaker, en sistenm pli for, modernize, santralize, pa opsyonnel i esansyel. Nouvo lazans pou baze lo bann sikse lepase, koriz bann febles egzistan, moderniz kapasite nasyonal *drug responses*, priyoritiz rediksyon risk, tretman divers, e koleksyon data, protez nou bann zenn, e sofgard sekirite nasyonal.

Alors Madanm Speaker, mon ti a kontan demann tou koleg Manm Onorab, pou aport zot sipor a sa *Bill* ki'n ganny anmennen ozordi. Mersi Madanm Speaker.

(APPLAUSE)

MADAM SPEAKER

Mersi Onorab. Nou pe ganny en pti problemn teknik. Alors mon ava pran sa loportinite- (*technical issues*) pour nou- (*technical issues*) 4er.

(BREAK)

MADAM SPEAKER

Bon, mon ava demann *Vice-President* pou fer son *summing up and right of reply*.

VICE-PRESIDENT SEBASTIEN PILLAY

Bonn apre midi Madanm Speaker. E bonn apre midi tou Manm Onorab. Madanm Speaker, mon oule remersi tou bann Manm ki'n entervenir lo sa Prozedlwa ki'n ganny prezante devan Lasanble Nasyonal. In annan an tou 19 Manm ki'n entervenir pou pa mwens ki 10 minit sak Manm.

So, nou pe koz 190 minit. Alors, mon pa pou koz pou sa 90 minit Madanm Speaker. Mon a sey mon mye pou mwan reponn, e adres bann konsern ki'n ganny souleve atraver bann diferan entervansyon ki'n ganny fer par bann Manm.

Premyerman, Onorab Lepathy atraver lentervansyon ki ou'n fer ou'n met lanfaz lo lenpak ki sa fleo i annan dan kominote. E ou'n donn en legzanp menm dan ou distrik. E sa i en keksoz ki pe trakas nou, aköz ti annan en tandans pou krwar ki sa bann problemn i santralize dan serten rezyon.

E avek sa ki nou pe war se ki sa problemn in vreman pran en lanpler dan tou distrik. Menm bann distrik ki ou ti ava ekspekte ganny eparnye avek en lenpak konsiderab sa problemn ki ozordi nou pe eksperyanse dan sa fason.

Alors, mon tre apresye ki ou'n koz lo la. E dan sa Prozedlwa enn bann keksoz ki nou pou war klerman. E mon krwar i relye avek enn de bann keksoz ki'n ganny dir par lezot Manm i se ki petet in annan en konfizyon lo sa size resours, aköz pou dil ek sa problem dan sa lanpler ki parey ou'n koz lo la Onorab i enportan pou fer kler ki souvandfwa sete resours ansyen APDAR li menm ki ti pe ganny servi par Minister Lasante e non pa *vice versa*.

E sa i adres en konsern ki Onorab Labonte ti *raise*, an sa ki konsern Onorab Labonte pa Onorab Labonte se Onorab Roucou ki ti *raise* sa konsern. Se APDAR ki ti pe servi resours Minister Lasante, mon pa war li dan Lasanble.

E se sa problem ki'n arive aköz ler nou'n anmenn APDAR kot Minister Lasante i ti vin avek en striktir deza byen etabli. E ler in entegre anba DSAPTR, mon pa pe blanm okenn dimoun. E mon pa pe fer okenn alizyon lo fonksyon okenn dimoun. Me *given* lakantite keksoz ki i annan anba Minister Lasante. E sa striktir DSAPTR inevitableman pri dan sa bann problem ki ti'n egziste anba Minister Lasante.

E sa in afekte *delivery* sa program, aköz zisteman si

mon swiv sa ki Onorab Grandcourt, Onorab Roucou in dir. E mon regard bann rapor DSAPTR li menm an sa ki konsern bann travay ki'n ganny fer lo prevansyon e ledikasyon. Avan nou prezant sa Lalwa nou'n regarde sa bann rapor, e nou pou vwar ki sa bann travay pa'n ganny fer.

Ler mon dir pa'n ganny fer, pa'n ganny fer petet alaoter ki nou ti ava ekspekte ganny fer ki si ou ti annan en lazans ki dedye pou drive sa proses. E se sa enn bann problem ki nou'n rankontre ler ou'n segment li, ou'n tir li from kot i ti ete e ou'n al met li dan Minister Lasante. E prezan ekspekte ki poudir dan sa konteks kapab fer li marse dan sa fason.

Onorab Georges in *raise* serten pwen. E mon krwar i enportan ki mon adres serten sa bann pwen. Lasanble i ava pardonn mwan si mon fer serten komanter politik. Me mon krwar i neser pou Lepep Seselwa la deor konpran enn de keksoz ki ganny dir atraver par bann politisyen.

Par egzanp Onorab Georges i dir mwan aköz se pa Prezidan li menm ki vin chair APDAR. E i fer referans avek Chair SMB ki ti Prezidan Rene. Me petet konfizyon ki mwan

mon annan se ki ler Prezidan Rene ti *Chair SMB*, Onorab Georges ki ti dan Lopozisyon ti kont Prezidan Rene ti *SMB* sa letan.

Zot ti annan en problemn avek *SMB*, e zot ti demann fermtir *SMB*. Me ozordi zot pe dir ek nou retourn *APDAR* anba Prezidan. E mon ti a kontan konpran, mon konpran kote zot pe vini aköz Prezidan Herminie pa en dimoun ki per travay. Prezidan Herminie, in montre par son konviksyon e son tenasite ki i en dimoun ki pou akonplir sa ki set out pou akonplir.

Zisteman ozordi son parti, nou parti i annan en mazorite dan Lasanble Nasyonal. Alors, mon konpran kot sa pe vini. Me selman mon oule reasir Onorab Georges ki sa striktir ki la, i pa pou en striktir ki pou etabli parey Onorab Valdana in dir bann kousen ant Prezidan e lenplimantasyon sa ki *APDAR* i bezwen fer.

Rezon aköz i annan en Sekreterdeta pou drive sa proses, se aköz zisteman enn bann keksoz ki mon'n aprann avek Prezidan se ki i pa *dwell* lo en deba akademik li. I plito rod en solisyon, e i *move forward*. E se sa ki nou bezwen annan Sesel. Nou bezwen annan en dimoun ki pou brav pou fer

serten desizyon, zis par egzanp parey ler nou ti zwenn lo sa size *Assumption* nou ti brav pou pran serten desizyon.

I bann keksoz ki ou bezwen fer *then and there*, aköz i neser pou ou pran bann desizyon ki enportan a sa moman ki ou pran e ki donn ou en rezilta. E se sa ki mon krwar nou pe rode avek lenplimantasyon sa Lalwa.

Mon konpran konsern ki en kote lasanble i pou annan. E sa in eksprimen par tou bann Manm. Rekreyasyon en lazans, zot in koz lo resours ankor. E *whether* sa lazans in performen, e par egzanp Onorab Henrie osi in koz lo *whether APDAR* in performen Onorab Romain tousala in koz lo *APDAR* in performen.

Me Madanm Speaker, i enportan pou mwan ankor enn fwa edik Lepep Seselwa, enn bann rezon aköz *APDAR* ti ganny bokou difikilte pandan bann lannen 2018 *onwards* i se ki tanzantan son bann Bidze ti pe ganny *freeze*. Par egzanp enn bann Bidze *APDAR* ki ti ganny *freeze*, e i enportan Onorab Henrie ti enn bann dimoun ki ti koz an faver pou *freeze* sa Bidze.

E la i pe koz lo size reabilitasyon, sete zisteman apepre R13 milyon ki ti pou al

ver reabilitasyon a sa moman. E la mon annan devan mwan rikord enn bann prosedir kot APDAR ti bezwen retournen, pou li demann unfreeze son Bidze. So, nou ti annan en Lasanble an mazorite Lopozisyon ki ti fer tou fason a sa moman pou restrikte APDAR lo bann resours ki i ti bezwen pou li kapab realiz son program.

E menm ler *Leader* Lopozisyon sa letan ti donn son by in pou serten laspe sa program, par egzanp sa Sant Reabilitasyon pli tar nou war ki sa in ganny retire konpletman lo liv, e sa pa'n arive. Me ou konnen sak Gouvernman i vin avek zot Polisi.

E nou, nou Gouvernman son Polisi se etabli en *Rehabilitation Structure* ki en *work rehabilitation structure*. Akoz sa ki ti'n ganny plan par APDAR sete en *Rehabilitation village* ki Onorab Georges e mwan menm atraver ou Madanm Speaker ti ganny sa privez pou nou kapab war akoz nou ti lo *Board APDAR* sa letan.

Mon oule met devan Lasanble pou ki zot konpran ki poudir nou pe fer en deba ki factual la, e non pa base on fake news ki dan sa R13 ekek milyon ki ti ganny *frozen* enn ladan ti

pou en *Wellness Center* ki ti sipoze ganny konstri avek sa larzan. So, se sa bann retar ki nou'n rankontre ki'n fer ki nou pa'n war APDAR kapab annan sa sikse ki nou annan.

Me sa ki mon'n apresye ki mon'n realize ler mon'n parkour APDAR, se ki rezilyans sa dimoun ki ti pe dil APDAR sa letan Dr Herminie in sey kontourn tou sa bann difikilte ziska kot nou'n ariv a en pwen kot APDAR in ganny retire, in ganny *repealed*.

E mon krwar i fer sans pou nou remet li dan son landrwa kot i ti ete avan. Pa zis remet li dan son landrwa kot i ti ete, me redonn li en striktir pli kler, pli nef e osi en sipor pli enportan pou li kapab delivre lo bann program ki'n etabli. Onorab Claudette Louise, mon dakor antyerman avek sa ki ou'n dir ki tou dimoun i konnen kot bann *hotspot* i ete.

Enn bann program APDAR sete pou travay avek bann lazans akoz zot pe fer 2 keksoz la. Enn nou pe redwir demann, so nou pe *demand reduction* par fer ki bann adikt pa bezwen depan lo drog. Me lo lot kote nou bezwen osi travay *towards supply reduction*.

E la letan mon koz lo *supply reduction*, i annan plizyer Manm ki'n koz lo sa size

search and destroy. Mon'n war Onorab Roucou in mansyonnen sa. Mon'n war lezot Onorab in mansyonn sa. Onorab Woodcock in mansyonn sa *as well*. Be ou konnen, sa ki drol se ki pandan sa dernyen 5an nou'n vwar ler drog in ganny sezi sa ki nou tande apre se ki i retourn lo *ghetto* pou re ganny vann.

Sa ki nou pa'n war resaman se ki drog ler in ganny destroy pa'n retournen lo *ghetto*. E i annan en prosedir ki *destroy* li pou fer sir poudir zot protez *the chain of evidence* pou fer ki sa dimoun ki ganny atrape avek sa trafik oubyen pe *traffic* sa *illicit drug* i responsab e i annan lenplikasyon Lalwa lo li.

Alors, i annan bann legzanp ki nou kapab servi pou montre ki poudir diferan lapros pran par diferan Gouvernman. Me sa enn ki la i pe pran en lapros pou ki i pe anmenn nou serten rezilta tanzib. E i nou pa pe remet nou sitwayen a risk. Akoz si parey zot in dir i annan sa bann kontak ki i annan ant bann trafiker e bann diferan dimoun ki trouve dan bann diferan sistenm lafors parey bann Manm dan Lopoziyon pe dir nou. E i paret ki poudir zot konnen, i ti ava bon zot dir nou.

Sa ki enteresan i se ki la ou pe elimin sa posibilite pou ki sa drog i retourn dan kominote pa detri li kot ou pe vwar li lo lanmer. Mon krwar se sa ki lanfaz ki Gouvernman US ozordi pe mete lo la. E atraver APDAR atraver son rol ki i pou zwe dan inform e ed Polisi *design* i ava osi kre avek lenstans ki pran bann desizyon parey pou kapab donn en lide enformen lo kwa ki mannyer keksoz pou bezwen ganny fer.

Madanm Speaker, i annan enn de bann keksoz ki'n ganny dir par egzanp an sa ki konsern bann kestyon ki'n ganny demande, *ok*. Onorab Henrie i dir nou ki he is not over the moon avek sa ki US pe fer avek APDAR. *Well*, i pa louvraz US pou fer personn vin *over the moon*.

Nou louvraz nou se fer e delivre lo program ki nou'n prezant avek pep Seselwa, e montre pep Seselwa ki nou pe gard nou parol pou delivre lo sa program ki nou'n met devan li. E Lepep Seselwa i ava ziz nou ankor dan 5an si nou'n delivre lo sa program.

Ou konnen nou kapab vini bal bise lo sa size politikman, via leternel nou pou kontinyen ale vini. Me rezilta se ki nou pou kontinyen annan adiksyon, nou pou kontinyen annan bann

adikt, kontinyen. E nou pou vwar en logmantasyon dan depans ki Gouvernman i fer pou dil avek sa.

Sa ki nou bezwen fer se ki admet ozordi nou annan en problem e koman en Lasanble dan son antyerte lans en mesaz. E Lasanble dan son totalite i siport mezir Gouvernman pou lit kont labi sibstans dan nou pei. E se sa ki nou pe rode.

Madanm Speaker, mon konpran sa ki Onorab Aglae pe dir mwan e ler i pe koz lo en program pli konpreansiv. Sa ki enportan dan sa ki Onorab in dir, i enteresan. Akoz zisteman avek met *APDAR* koman en lazans nou pe viz al fer en program pli konpreansiv. En program striktire ki pa ganny si oule *diluted* par bann lezot fonksyon ki ler i anba Minister Lasante avan i ti ete.

Si nou regard rapor *DSAPTR*, mon pa konnen si bann Manm in lir sa rapor. Sa rapor i montre ou ki poudir *main component DSAPTR* sete pou sa program *methadone*. Son *main component* sete sa. Alors, nou pa kapab kontinyen, akoz ti annan en difikilte. E mon konnen Onorab *LGB* in fer sa pwen, ou ti'n perdi bokou dimoun kalifye dan sa domenn.

Ou ti'n perdi bann *staff* ki ti konpran mannyer sa striktir i

marse. E finalman ou'n vwar ou dan en sityasyon ko tou pe fer enplimantasyon zis 1 oponan en program ki ekstrememan enportan. E se sa ki'n *backfire* lo nou. E se sa ki'n fer ki nou'n kontinyen annan sa problem ki nou pe gannyen ozordi.

Madanm Speaker, i annan en lot keksoz ki'n ganny dir par egzant e sa nou'n konekte sa size sa *Holistic Center*. E atraver Onorab Andy Labonte in demann mwan serten presizyon *regarding* sa *Holistic Center*. Wi, nou annan en *framework* pou sa *Holistic Center* ki'n ganny prepare. E i annan en *internal estimate* pou son *cost*. E i pa ankor al lo *tender*. So, mon pa kapab donn detay lo son *internal estimate*. Me eski sa *cost* ki nou ti pe mete pou sa *Holistic Center* i pou reponn lapel e bezwen problem ki nou pe fer fas avek.

Oubyen nou ti pe zis dir nou pe al fer *Holistic Center for the sake of* fer en *Holistic Center*. Sa i bann kestyon ki petet ou ti'n devret demande akoz ti ava ed ou pou konpran, akoz sa *Holistic Center* pou trouve dan ou distrik byensir. E i pou *involve* lezot lenfrastruktir tel koman *STP* ki pou vin avek.

E mon apre pou montre ou *the costing for the Holistic Center*, pou ou kapab apresye

ki nou pa pe zis fer en travay dan labsans regard tou lenformasyon ki la. Nou pe regard bann lenformasyon ki nou annan deza pou nou fer sir deza *going forward* nou pan se prepar en keksoz ki bokou pli konpreansiv. E delivre lo sa keksoz ki bokou pli konpreansiv.

E lavantaz ki nou, nou annan se ki nou *leadership* Prezidan i en dimoun ki oule en desizyon ganny pran. Pou li nou pa kapab kontinyen debat lo en size e debat, debat kan ler nou fini nou pou fer miting pou fer en miting en miting pou fer en miting. So, sa ki i oule se ki nou kapab donn en solisyon. E donn en solisyon ozordi oubyen donn en solisyon demen.

E sa i pou anmenn nou ver trouv bann solisyon pou en kantite problem ki nou pe fer fas avek, sirtou an sa ki konsern sa problem adiksyon ki nou pe fer fas avek. Onorab Larsen, in mansyon sa size *Rehab and Data Collection*. Enn bann baz ki APDAR ti ganny formen lo la sete zisteman koleksyon lenformasyon.

E i ti annan en travay konsiderab ki ti ganny fer pou etabli atraver sa letan, zot a rapel ti annan 2 dimoun ki pa ti ganny aksepte koman Minis dan Gouvènmman US pandan

lannen apre 2015. E sa sete Dr Patrick Herminie e Anbasader Dick Esparon. E lede ti ganny sans head en sekretarya pou lapovrete Anbasader Dick Esparon.

E Dr Herminie ti ganny sans, ti pran latet APDAR. I pa ti en *job for the boys*. Me i ti 2 louvraz ki 2 dimoun serye ti fer. E sa letid lo lapovrete ti annan en koneksyon avek *job abuse*. E APDAR li menm ti komisyon en letid. E i annan en baz lenformasyon konsiderab ki nou pa'n servi.

E ler ou pa servi en baz lenformasyon, ki arive? Ou fer desizyon dan labsans *data*, ou pa pe fer bann *informed decisions*.

E byensir sa ki ou pe fer se zis *throw money at the problem* ekspekte ganny en solisyon. E malgre ki Gouvènmman presedans ti koz fortman lo ki mannyer zot pou rod en fason pou elimin program *methadone*, finalman program *methadone* in vin le sel keksoz ki zot ti kapab *rely* lo la.

Ti napa lezot lenstitisyon, ti napa *wellness*, ti napa en sant pou akey bann dimoun. E nou tou nou'n vwar atraver bann dokimanter ki BBC in fer, akoz bann adikt ki mannyer ki leta sa bann letablisman ti'n ganny kit ladan.

Alors, i enportan ler nou koze annou pa regard aköz ozordi nou dan en kote latab. E sa size in vin devan nou alors sa Gouvernman pe propoz li, zot pou vot kont zis aköz sa Gouvernman ki pe propoze. Non. Regard, lentere ki sa size i anmennen pou pei. E pran li dan sa konteks. Onorab Woodcock Madanm Speaker, parey labitid Onorab Woodcock i koz bokou me pa vreman dir naryen.

I koz lo plizyer keksoz, e i anmenn en deba lo in kas bann *improper motive* si oule lo parti US an antye an sa ki konsern en eleksyon. Ou konnen, dan lavi ou annan dimoun ki en *sore loser* i annan en dimoun ki en *humble winner*. Mon pa pou *rub in your face* ki nou, nou'n ganny eleksyon Grand Anse Praslin.

Me selman sa ki mon pou dir se ki dan Lasanble, a plizyer repriz bann Manm ti dir ou pas kot ou bann dimoun al get zot. E nou pa kapab blanm pran size APDAR e trenn li dan size Kart Idantite, trenn li dan sa bann size aköz i napa naryen pou fer avek lede. Mon kapab reponn ou diferaman Onorab. Mon pou swazir apre midi pou reste lwen ek ton ki mon'n komans lo la.

E sa se pou dir ou i enportan pou nou regard lefitir

e regard kote nou le ale. Nou annan en gro problemm adiksyon dan Grand Anse Praslin, en gro problemm adiksyon. E Grand Anse Praslin e sanse i annan 2 MNA dan Lasanble Nasyonal ozordi. Ant zot de zot devret kapab anmenn ase sipor, anmenn ase lenfliyans pou nou kapab ede tackle sa problemm.

Swa nou swazir *to be part of the problem*, swa nou swazir *to be part of the solution*. Madanm Speaker, Onorab Gill mon konpran ou largiman an sa ki konsern striktir sa lazans. E mon konnen toultan Onorab Gill ler ou koze ou koz lo ki mannyer ou perspektiv i anmenn ou pou anmenn en desantralizasyon resours.

E mon konnen Onorab Grandcourt in koz lo ki mannyer nou sanz lafason ki keksoz i ganny fer. Tou sa bann size, i bann size ki nou bezwen aborde dan en fason pli larz. E se pou sa rezon ki Prezidan in koz lo en Minister ki responsab pou *Inner Island*. Pou annan en regard direk li *Inner Islands*.

I neser sa, aköz la nou ava regard lo ki bann resours ki nou bezwen desantralize. Pou zot lenformasyon i annan propozisyon pou nou etabli serten lofis pou serten Servis Gouvernman, menm lo La

Digue. Tousala avek bi anmenn sa bann servis pli pre avek sitwayen. E zisteman enn bann servis ki nou pou le anmennen se servis prevansyon kont labi sibstans anver Lepep Seselwa.

E se pou sa rezon ki nou, nou pe dir ek Lasanble koman en Gouvernman, nou pe realiz lo bann program ki nou'n met dan nou manifesto zisteman pou nou kapab montre avek Lepep Seselwa ki sa vot ki zot in donn nou in en kontra sosyal ki nou'n pran avek zot pou delivre lo la.

Se pou sa rezon ki nou ti dir "*For the many not the few*". Madanm Speaker, mon pou kontinyen aköz mon pou still kouver bann pwen ki bann Manm in leve. Onorab Labonte ti le koz lo *Health Care Agency*, petet ou ava krwar i en size ki nou per pou aborde. *Health Care Agency* ti ganny setup an 2013.

So, sa i ava fer apepre 12an depi ki i an egzistans. E koman en Gouvernman, ou bezwen asize analize si apre 12an sa ki'n la an plas in satisfere en bezwen. Ou bezwen fer *stock take*, ou bezwen fer *analysis* sa ki pe arive. E wi i annan serten prononsman, in annan serten langazman ki pe ganny fer.

Me annou les sa proses *unfold* pou nou vwar kwa ki nou kapab vin avek pou nou kapab *improve* sityasyon. Eski kekyon fondamantal ki nou devret pe demann nou lekor, se eski la deor Lepep Seselwa i satisfere avek sa servis ki i pe gannnen?

Eski Lepep Seselwa i kontan sa servis? Eski i *trust* sa servis ki i pe gannnen? E si nou regard lenformasyon ki nou pe gannnen nou tou la anndan *on a regular basis*, larepons se non. Sa i napa naryen pou fer avek bann travayer, bann profesyonnel. Me petet i annan pou fer avek striktirasyon ki nou bezwen sanze. E ki nou anmenn en meyer striktir pou delivre pou dimoun.

Si par egzanp mon pou donn ou en legzanp, si ou war par egzanp en dimoun i bezwen *bypass* tou sa bann antite Gouvernman i *call* direk Prezidan oubyen i ekrir direk Vis-Prezidan. E nou Prezidan i en dimoun ki resevwar let kontrerman avek Prezidan avan ki ti dir li i pa pou resevwar let. Prezidan Herminie i resevwar son bann let e i get son bann let, i resevwar son bann *call*.

E i angaz tou son Minis pou fer parey, san ki sa i anmennen i montre ou poudir be *then* nou bezwen regard nou striktir ki fer ki aköz Mr

Labonte, si i annan en problem en landrwa i pa kapab ariv kot sa lofis pou donn li en larepons dan sa 14 zour ki'n ganny etabli atraver bann prensip travay Gouvernman, ki i bezwen bypass tousala pou al pli devan.

So, i montre ou ki nou bezwen adrese. Se sa bann defayans ki nou'n zwenn ki nou bezwen adrese. Mon pa pe dir bann defayans ansyen Gouvernman, mon pe dir bann defayans ki egziste ki nou bezwen adrese. Sa i pa en refleksyon lo ansyen Gouvernman. Me i en refleksyon lo kote nou koman en Gouvernman nou'n vwar bann problem i ete, e kote nou oule ale devan.

Si mwan mon kontinyen *dwell* lo sa dernyen 5an, parey avan sa zot in *dwell* lo sa 43an be mon pou fail sa ki mon'n dir Seselwa. E sa ki nou'n dir Seselwa se ki nou koman en Gouvernman, e ki nou Prezidan in koz lo la se ki nou pe *forward looking* ki mannyer nou anmenn Sesel pli devan. Ki mannyer nou zwenn tou dimoun ansanm.

Alors, mon krwar mon'n reponn ou keston HCA. E ki ava annan bann travay ki ganny fer sa size. Ou'n *raise* en size dekriminaliz Kanabis e ou

ava dir ankor enn fwa ki mon pa oule abord sa size. *Well*, i ava en size ki nou a met li devan Seselwa. E i ava annan en desizyon ki ganny pran.

Ou konnen, nou, nou pa en Gouvernman ki per deba. *We are not afraid of a debate. In fact*, enn bann parol ki mon'n tann Prezidan kontan dir. E Prezidan Herminie i kontan dir sa "*Let there be a debate*". "*Let there be a debate*". Ozordi nou pe ganny en deba lo APDAR. Mon kapab dakor, mon kapab pa dakor avek serten keksoz ki ganny dir lo zot kote. *But we have a debate and after the debate, we have to move forward.*

Menm si en kote pa pou dakor, en kote pou oule bouz dan en direksyon. *But at the end of the day*, nou'n ganny en deba ki'n enform nou ki'n enform Lepep Seselwa kote nou oule e ki zistans nou'n anmenn keksoz pli devan.

Onorab Romain, ou'n koz lo olye kre en lot striktir. Zisteman Onorab Romain, problem sete striktir ki ti egzistan pou fer li vin en divizyon anba Gouvernman, anba Minister Lasante se sa ki'n kre en pe problem dan lenplimantasyon. Par egzanp si nou pran program nitrisyon Gouvernman. Program

Nitrisyon Gouvernman i preski pa marse akòz nou napa bann *qualify professionals* pou *run* li *as such*.

Oubyen sa bann profesyonnèl ki ou annan ki *qualify*, ou pa pe donn zot sa lanvironnman pou zot kapab delivre lo la. E nou tou nou konnen poudir enn bann problem ki nou annan dan nou pei, nou annan problem obèse. Nou annan bann problem ki konsèrn bann kalite nou kalite manze ki nou manze.

Nou annan bokou bann problem kardyovaskiler. E sa i en lenpak. So, si nou travay lo prevansyon nou redwir *at the back end the cost* ki i vin avek dil avek sa problem. Se pou sa rezon ki striktirasyon APDAR in vin dan sa kontèks, kreasyon sa lazans in vin dan sa kontèks plas li anba Prezidan me anba *chairmanship* SS in vin dan sa kontèks.

So, nou ava *agree to disagree* Onorab Georges, *in terms* lo ki manner nou oule met keksoz. Me sa ki nou bezwen se ki nou bezwen annan en lazans pou fer sa louvraz ki nou bezwen fer. E sa nou tou lede nou tonm dakor lo la. Madanm Speaker, Onorab Athanase in koz lo *coordination* pou en *integrated service*.

Ler nou pe fer servis entegral, i mean ki nou kapab al direk ver kominote oubyen bann dimoun, bann lazans ki annan bann diferan akter ki bezwen sa. E se sa rezon akòz, ou konnen si nou enkli serten keksoz, enkli *substance abuse* nou enkli tou keksoz ladan. Nou pe *overload the programme*.

Sa ki nou pa bezwen fer, mon pou retoun lo en keksoz ki Onorab Henrie in dir, petet Onorab Woodcock osi in dir. Fodre pa nou pran sa lapros ki nou'n pran dan lepase pou regard keksoz akòz sa dimoun ki pe ansar li. Par egzanp CARE ti en *campaign for awareness and resilience*.

Me CARE son Bidze ti ganny koupe par Lasanble Nasyonal. Bann ki ti dan 6enm Lasanble i ava rapel ki sa ti arive. Akòz? Akòz nou ti annan en problem avek sa dimoun ki pe *chair* CARE. Me nou pa ti pe regard *value* ki CARE ti pe anmennen *to the work* ki arive. Nou'n koz lo bann NGOs ki manner nou redwir larzan pou bann NGO. *But that should not be the case*.

Akòz bokou sa bann NGOs ki pou al ver ed bann dimoun ki pe fer fas avek labi sibstans pe ganny difikilte ozordi pou *raise the funds* pou okip sa bann dimoun. Akòz tou dimoun pe al

menm landrwa, *sport* pe vin menm landrwa. Distrik pe vin menm landrwa, lezot aktivite. Lanvironnman pe vin menm landrwa.

So, sa dimoun ki pe ede pou swazir en area pou dil ladan. E i pa pou kapab ed tou dimoun. Se pou sa rezon ki Gouvernman li i pou bezwen zwe en rol santral. Akoz sa problem ki mannyer i afekte Gouvernman? I afekte *service delivery*, i afekte kapasite Gouvernman pou *recruit* dimoun dan louvraz.

Me pli enportan *is the cost of treating the problem*. Sa size ki devan nou pou anmenn en reform pli larz menm dan nou sistenm, dan nou *criminal justice systems*. Eski i fer sans pou nou kontinyen par egzantp en dimoun i vol akoz i ganny *fix* i vol en *crate* labyer, menm pa en *crate* labyer, 5 labyer pou li al dan Prizon.

Eski pa in ler pou nou komans koz lo *Community Work-Based Programme*? Eski pa in ler pou nou komans koz lo *the cost* ki sa i arive ler sa dimoun i fer sa? Sa *petty crime* ki nou apel li en *petty crime*. Ou bezwen donn li en *legal aid*. Ou donn li en *legal aid*, ou bezwen rimann li *at the cost of the state*. Ou kondann li *over the cost of the state*.

Si ler i ti vini i ti konn vol 5 labyer, ler i desann i konn vol en *pickup* labyer, in fini pas son *course*. Eski nou dan sa Lasanble nou konpran lanvergir problem ki nou pe fer fas avek ki nou bezwen dil avek. Le pwen ki devan nou ozordi se ki nou bezwen konpran poudir koman en Gouvernman sa enn ki la in fini pe pran serten desizyon ki *bold*.

E mon kontan ki Onorab Henrie in dir pou donn nou lespas pou nou travay e mon swete ki sa i en parol senser pou ki nou kapab delivre lo program ki devan nou. Lopozisyon i bezwen zwe son rol *as the critical friend of Government*. *That is your role and you need to get that role*.

E mwan mon napa naryen kont sa, akoz parey mon'n dir oparavan if there is need for a debate, let there be a debate. Nou ava agree pou dezagree. Me i ava annan en deba kot nou tou nou a kapab donn nou lopinyon. Akoz apre tou ki nou Konstitisyon i donn nou? Nou Konstitisyon i donn nou dwa a laliberte lekspresyon.

E sa i en pwen kardinal ki person pa devret bliye dan sa Lasanble. Onorab Sultan in osi koz lo fodre pa ki sa lazans i ganny politize. Mon krwar sa i en pwen ki ou'n servi. E i pa zis

ou ki'n koz lo la, me plizyer lezot Manm lo kote Lopozisyon osi in koz lo la. Ou konnen, i pou depan lo nou, lo zot osi si nou oule politiz sa lazans.

La bomaten zo tin fini politiz sa size, by pa regard sa problem *for what it is*, aköz nou pa pe pran laglwar lo kre en lazans la nou, nou pe vin devan Lasanble e dir kreasyon en lazans i neser pou program e Polisi ki nou'n met devan Lepep Seselwa.

So person pa kapab pran laglwar lo dil ek sa problem. Aköz napa laglwar dan dil ek en problem adiksyon. Napa laglwar ler ou get en zen nonm ki annan menm 28an, son kouler lapo in fini sanze i dan lili lopital e i pe apros son lanmor. Mwan mon'n eksperyans sa dan fanmir personelman. E mon pa *wish* sa lo okenn dimoun.

Alors, i enportan ki nou fer sir poudir okenn fanmir ki pe fer fas ek sa, sa enn ki vini demen, i pa ava fer fas avek sa. Sa nou bi koman politisyen, koman *leaders*. E se pou sa rezon ki leta i donn nou en saler, aköz nou prodiktivite i vin atraver fer bann desizyon ki dan lentere Lepep Seselwa.

E mwan mon pe dir ek Lasanble Nasyonal ozordi apre midi kreasyon sa lazans e met li

anba sipervizyon Prezidan i dan lentere Lepep Seselwa. Madanm Speaker, Onorab Loze in koz lo rehabilitation, in koz lo bann sant, in koz lo bann detay ki'n arive avek sa bann sant.

Mon pa pou retourn ladan me, bokou sa ki Onorab Loze in dir i korek. Nou ti'n fini ganny baryer defann, nou ti'n fini ganny donasyon pou fer sa sant. Me Gouvernman avan in pran en lot desizyon polisi. Gouvernman avan in fini ale, nou dan en lot Gouvernman e nou bezwen regard devan. E nou bezwen *move forward* ki mannyer prezan nou pou etabli en program reabilitasyon ki ava *suitable* ki ava anliny avek sa ki APDAR i anmennen.

E la mon pe koz lo APDAR, mon pe koz lo Lazans pou Prevansyon kont Labi Sibstans, kont labi drog ek reabilitasyon. *Ok*, APDAR i vin dan lespri aköz se lafason ki nou'n abitye apel li. Madanm Speaker, an konklizyon.

An konklizyon sa ki mon oule met devan bann Onorab. E mon demann leskiz okenn dimoun ki mon'n bliy okenn pwen ki mon'n fer. *Sorry* Onorab Naidu, avan mon konklir ou'n koz lo eski pou annan *unit* spesyalize dan lapolis? E yer nou ti koz lo *the Mental Health Care Agency*, ki

manner, ki rol bann lazans parey lapolis pou zwe an *interface* avek APDAR, avek sa Lazans pou prevansyon kont drog en e reabilitasyon.

Parey nou konnen lenstans dan pei ki kapab anmenn plis lentegrasyon ant bann diferan lazans sekirite nasyonal, se Prezidan li menm. E si ou regard, nou pa pe koz lo en konsoliderasyon pouvwar. Me nou pe koz lo en *nexus*, en *focal point* pou annan en stratezi ki ganny dil avek.

Petet enn bann keksoz ki nou'n war oparavan se ki ler nou desantraliz bann *focal points*, i fer ki ler ou al fer enplimantasyon i vin difisil. Mon pou donn zot en legzanp. Par egzanj nou ti desantraliz en *focal point* enportan ki apel *DRMD*. Me ler ou'n desantraliz li, apre nou ti kre en *Flood Free Committee* ki ti ganny *chair* par ansyen Prezidan.

Me ler mon pe regard lenplimantasyon bann proze sa *Flood Free Committee*, mon pe war poudir enn bann problem ki'n arive se ki mank kordinasyon e *DRDM* pa'n kapab zwe sa rol aköz i ti an deor. Se pou sa rezon ki nou, nou'n remet li anba Lofis Vis-Prezidan zisteman pou re anmenn sa kordinasyon.

So, kordinasyon i en eleman enportan si oule bann lazans Gouvernman kapab delivre, aköz ou pa kapab travay sakenn fer pou li. Zot bezwen travay kordinen, pou ki zot delivre ansanm antandenn pou zot kapab delivre en program.

I annan enn bann problem ki bokou dimoun i kontan koz lo la. Nou kontan dir poudir *SLTA* i vini i pase, i re sirfas en semen. demen i vini *PUC* i vini i kas en kou e konmsi napa kordinasyon. So, se sa bann keksoz ki ou bezwen avoid aköz i anmenn avek li inevitableman en pert resours, aköz sak fwa ou bezwen refer en keksoz ki'n fek fer i kout ou larzan.

Se sa kot Gouvernman *US* pe vini ozordi. Alors, Madanm Speaker, on konklizyon. An konklizyon mon poudir ki lamazorite keksoz ki bann Manm in dir, menm bann Manm ki'n opoze zot realize ki poudir i enportan *tackle* sa problem. E sa i premye pwen ki nou tou la anndan nou tonm dakor lo la.

Ki manner nou fer li ekitabman, pa nou tou ki pou tonm dakor lo la. Sa ki mon pe envit zot pou fer apre midi, mon pe envit zot pou zwenn avek nou an relasyon avek kreasyon

sa lazans. E zisteman donn nou sipor pou montre poudir avek tou sa bann dimoun ki pe travay dan sa sekter, tou sa bann benevola ki *LDS* e *US* i kapab vin ansanm lo en pwen kot zot tou lede zot tonm dakor.

E sa se ki nou tou nou dir nou bezwen dil avek sa size labi drog. E nou bezwen rod en fason pou fer prevansyon labi drog e anmenn reabilitasyon. Mon swete ki mon lapel i ava tonm lo mon zorey e ki zot ava war nesesite pou nou vin ansanm ozordi apre midi. Akoz si nou pa kapab fer li lo sa size, ki pe afekte sa kous nou popilasyon nou pou dan problemn *going forward* akoz nou pou kontinyen annan bann ise bouse.

Me ozordi apre midi mon ava pran li koman en pti viktwar kantmenm, ki nou tou nou dakor ki prevansyon i bezwen ganny dil avek. E sa ki mon pa ava ekspekte, ki personn pa ava vot kont sa Prozedlwa ki devan Lasanble Nasyonal. Avek sa Madanm Speaker, mon remerci ou.

(APPLAUSE)

MADAM SPEAKER

Mersi Vis-Prezidan. Nou'n ariv letan pou nou pran en vot lo merit *Bill*. Tou bann ki an faver?

Mersi. Okenn Manm ki vot kont? Bon, vot lo merit *Bill* 18 Manm in vit pour, avek 13 in *abstain*. Nou pou aprezan al dan *Committee Stage*. Clerk, mon ava demann ou pou fer *Second Reading please*.

MADAM CLERK

Mersi Madanm Speaker. A *Bill for an Act to establish an Agency for coordinating the activities of various institutions and organizations engaged in the prevention of drug and alcohol abuse, treatment and rehabilitation of people addicted to drugs and alcohol and for matters connected therewith or incidental thereto*. Mersi Madanm Speaker.

MADAM CHAIR

Mersi. So, nou ava aprezan pran *Bill* dan *Committee Stage*. Mon vwar nou'n ganny en *set of amendment from* Onorab Bernard Georges. E mon pa pe war okenn *amendments from Bills Committee*.

So, ki nou ava fer nou ava fer parey nou'n fer avan. Nou ava pran *Bill each part* avek son bann *clauses*. E Onorab Georges i ava kapab prezant son bann *amendment at the same time*. Alors, nou ava komans, annefe mon vwar i

annan en *proposal to amend the title itself*. Onorab.

HON BERNARD GEORGES

Mersi Madanm Chair. Bonn apre midi Madanm Chair. Madanm Chair, permet mwan avan sa pou mwan remersye Vis-Prezidan pou ton ki in adopte ozordi konpare avek yer. Ozordi nou'n vwar en dimoun ki'n vin devan nou koman en Vis-Prezidan.

Mon pa dakor avek bokou keksoz ki in dir, me at least parey li menm li in dir *lets have a debate and let's agree to disagree* lo serten keksoz. Par kont Madanm Speaker, mon tris poudir ki in annan en latak personnel lo enn mon bann Manm apre midi. E sa se par Onorab Loze lo onorab Woodcock.

E onorab Woodcock ler i ti koze bomaten i pa ti mansyonn okenn dimoun, me i ti mansyonn parti *US* parey Vis-Prezidan in fek *acknowledge*. Etandonnen sa latak Madanm Chair, mon pa krwar i pou apropiye pou nou kontinyen angaz avek Gouvernman lo lamelyorasyon lo sa *Bill*.

Alor, mon pe donn notis ki mon pe *withdraw* tou mon bann propozisyon lamannman ki mon ti'n met devan apre midi. E mon a les onorab Loze

Chair Bills Committee dil avek son *Bill*. Mersi Madanm Chair.

(APPLAUSE)

MADAM CHAIR

Mersi Onorab. Onorab Loze.

HON JOHAN LOZE

Mersi Madanm Chair. Parey in ganny dir lo kote *Bills Committee* nou napa okenn lamannman. Be selman zis an relasyon ek sa ki'n ganny dir, in annan en latak politik ki'n ganny fer lo rezilta eleksyon pa lo la personn li menm, pa lo son personnalite, pa lo son fanmir, pa lo li personnelman.

Politisyen, nou bezwen ase gran e develop en lapo ase epe pou nou diferans si i ant en latak politik avek en latak personnel. Madanm Speaker, mwan mon'n asiz la anndan pandan 5an, onorab Woodcock in maltret mwan ek mon parti voler, kriminel, disan dimoun lo nou lanmen. Mon pa'n al laba mwan, mon'n koz lo son rezilta piblik ki en fe. E in ganny bate par 397 vot. Mersi Madanm Speaker.

(APPLAUSE)

MADAM CHAIR

Ok. Savedir nou pou pran sa *Bill* parey i ti'n ganny prezante. Vis-Prezidan?

(APPLAUSE)

VICE-PRESIDENT
SEBASTIEN PILLAY

Mersi Madanm Speaker. Madanm Speaker, nou pa'n resevwar okenn lezot propozisyon lamannman ki nou ti'n pare pou nou parey nou dir dan lentere annan en deba pou enform en pli bon *Bill* ki nou kapab donn Lepep Seselwa.

Nou atriste par desizyon *Caucus* Lopoziyon. Me nou, nou pa form par sa proses deba ki pe pase dan Lasanble. Alors, nou *subject* nou lekor *to your decision*. Me mon zis dir ki mon en pti pe atriste e ki mon swete ki, sa i pa ava lapros ki nou pran. Akoz Onorab Georges in koz lo angaz avek Gouvènmman.

Onorab Georges i bezwen konpran ki mon pa zis Vis-Prezidan *US*, me mon osi son Vis-Prezidan aköz mon Vis-Prezidan Sesel. Dokter Patrick Herminie i pa zis Prezidan *US*, me i osi son Prezidan aköz i Prezidan Sesel. Me nou, nou donn ou tou langazman e tou lesey ki nou pou fer pou travay avek tou Seselwa pou nou anmenn nou pei pli devan. Mersi Madanm Speaker.

MADAM CHAIR

Vi ki lamannman in ganny retire par Manm ki ti'n *proposed*. E napa lot amannman. Nou pou pran sa *Bill* parey in ganny Gazete. E nou ava pran li *each part*, pou nou pran desizyon e vot. So, nou ava pran *Part 1* ki konpri *clause 1* avek *clause 2* ...

Si napa okenn lamannman, nou ava bouz lo *part 2*. Okenn lamannman? Alors, nou ava al lo *Part 2 Prevention of Drug Abuse and Rehabilitation Agency* ki konpri *Clause 3 (4) and (5)*. Okenn komanter or okenn propozisyon? Si napa okenn amannman savedir nou ava pran en vot ki *Part 1 and Part 2 clause 1 to 5 forms part of the Bill*.

Tou bann Manm ki an faver? Mersi. Okenn Manm ki kont? Mersi Clerk. *On the question that Part1 and Part 2, clause 1 to 5 forms part of this Bill. 18 Manm in vot pour. E 13 in abstain*. Nou ava prezan bouz lo *Part 3 Board of the Agency* ki konpri *clause 6* ziska 10. *Again*, nou pa pe vwar okenn lamannman ki'n ganny propoze. E si napa okenn komanter, nou pou bouz lo lot

part. Which is Part 4 "Administration of the Agency" ki konpri clause 11 to 14. Si napa okenn comments oubyen okenn amendments nou a pran en vot that Part 3 and Part 4, clause 6 to clause 14 forms part of the Bill. Bann Manm ki agree? Mersi. Okenn Manm ki kont? Mersi.

Lo kestyon ki Part 3 ek Part 4, clause 6 to clause 14 forms part of the Bill. 18 Manm in vot pour e 13 in abstain. Nou ava aprezan pran 2 dernyen part, which is Part 5 Finance Accounts and Record ki konpri clause 15 to clause 17. E Part 6 Miscellaneous provisions ki konpri clause 18 to clause 22. Si napa ankor okenn lezot amendments, okenn comments nou ava pran en vot that Part 5 and Part 6, clause 15 to clause 22 form part of the Bill. Tou bann Manm ki agree? Mersi. Okenn Manm ki kont? Mersi.

Lo kestyon ki Part 5 ek Part 6, clause 15 to 22 forms part of the Bill. 18 Manm in vot pour e 13 in abstain. Vi ki napa lezot part dan sa Bill. Nou ava prezan reconvene into Assembly. Mersi. Mon ava demann en Mosyon pou Third Reading. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, anba Order 76, mon demande ki sa *Bill* i ganny lir pou en Trwazyenm Fwa. mersi.

MADAM SPEAKER

Mersi. Mosyon seconde? Onorab Audrey Vidot.

HON AUDREY VIDOT

Motion seconded Madanm Speaker. Mersi.

MADAM SPEAKER

Mersi. Nou ava aprezan pran en vot *on Third Reading of the Bill*. Tou bann Manm ki agree? Mersi. Okenn Manm ki vot kont? Lo *Third Reading of the Bill*, vot i 18 Manm in vot pour e 13 in *abstain*. Mon ava demann Clerk pou fer *short reading of the short title*.

MADAM CLERK

Mersi Madanm Speaker. *This Act may be cited as the Prevention of Drug Abuse and Rehabilitation Agency Act, 2025 and shall come into operation on such date as the President may, by notice in the Gazette, appoint.* Mersi Madanm Speaker.

MADAM SPEAKER

Mersi. *Bill* in pase. Nou ava
aprezan *adjourn*, ziska lendi
9er.

(ADJOURNMENT)